

皇

仿宋
古本

雷公藥性賦

汪昂先生編



上海文書局印行

414.5
288

仿宋古本
雷公炮製藥性賦

附珍珠囊指掌補遺



3 0466 4999 6

上海大文書局印行

雷公炮製藥性解原序

余讀仲景之敘醫輒爲之掩卷蓋其感生死之芒忽薦君父之危殆賤名利之浮榮冀年壽以沒世傷哉其言焉得不原本藥性加意候診者乎三皇御宇太昊首畫八卦開萬世道術之祖而神農徧嘗百味黃帝著爲素問迹其鼎足揚化醫之用居多今攷本經所載草木鳥獸等類則乾木泉震萑葦坤子母牛兌羊艮狗之說酸鹹有五味之別青黃有五色之分則坎水離火震木兌金坤土之說定浮沉明燥溼則本天本地親上親下之說立君臣分佐使佐君一民二之說有畏有喜有惡有反則吉凶利害之說有補有瀉有正治有從治則變通趨時之說無非大易之源流入卦之分布聖人所以順風氣而防天札者端不越此自太史公著扁倉論以爲美好者不祥之器而儒者又好自張大置醫於九流之中欲如皇子之論當心東里之辯六氣又摯止疾於齊王枚乘霍然於太子豈可得哉余以少孤不及摻藥以進慈父間爲母氏嘗之退而攷諸方書多所不合斯用痛心乃于讀書之暇發本經仙經暨十四家本草四子等書靡不悉究然後辨陰陽之所屬五行之所宜著藥性解二卷敢謂拯危濟殆於是焉賴特以志余之悲爲人子事

親之一助爾。且夫甘旨以養之。溫清以奉之。而卒罹夫不可療之災。欲代則不能。欲遍訪而證諸人。則不及。此人子終天之恨。仲景氏傷之。余所不辭而爲之。縷折者也。若夫素問一書。軒岐之精蘊在焉。亦欲同異而折衷之。期於剖微而止。敬以異日公之同好。雲間李中梓撰。

雷公炮製藥性解目次

金石部 三十二種

金銀箔……………	一	黃丹……………	一	胡粉……………	一
銅青……………	一	鐵漿 <small>鐵粉</small> ……………	一	水銀……………	二
輕粉……………	二	銀硃……………	二	蜜陀僧……………	三
丹砂……………	三	鍾乳……………	四	礬石……………	四
禹餘糧……………	五	硝石 <small>六種</small> ……………	五	滑石……………	六
石膏……………	六	青鹽……………	六	食鹽……………	七
雄黃……………	七	紫石英……………	八	赤石脂……………	八
寒水石……………	八	花藥石……………	八	陽起石……………	九
蓬砂……………	九	膽礬……………	九	青礬石……………	九
無名異……………	九	玉屑……………	九	自然銅……………	一〇
石鷲……………	一〇	磁石……………	一〇	硫黃……………	一一
果部 十八種					

陳皮 <small>核葉附</small> <small>三</small> 一三	枳實..... 一三	大棗..... 一四	枇杷葉 <small>實附</small> 一五	水梨..... 一六	胡桃..... 一七	穀部 十一種	麥牙..... 一八	醋..... 一九	白蘊豆 <small>薏花豆附</small> 二〇	豆豉..... 二一	草部 一百五十一種	人參..... 二一	當歸..... 二二	白朮..... 二三
青皮..... 一二	杏仁 <small>肉附</small> 一三	烏梅..... 一四	石榴皮..... 一六	柿實 <small>柿乾附</small> 一六	龍眼..... 一七	神麴..... 一八	飴糖..... 一九	赤小豆..... 二〇	菘豆..... 二一	黃耆..... 二二	川芎..... 二三	蒼朮..... 二四
枳殼..... 一二	桃仁 <small>花毛蟲附</small> 一四	藕皮 <small>荷蓮子葉附</small> 一五	山查..... 一六	芡實..... 一七	橄欖仁 <small>核中附</small> 一七	酒..... 一九	胡麻子..... 二九	芝麻..... 二〇	甘草..... 二二	山藥..... 二三	芍藥 <small>赤附</small> 二四

生地	熟地	知母
貝母	黃芩	黃連
大黃	桔梗	花粉 <small>附與</small>
半夏	紫蘇	白芷
防風	獨活	羌活
柴胡	前胡	香附
麻黃	葛根	麥門冬
天門冬	五味子	升麻
藁本	細辛	連翹
澤瀉	玄胡索	地榆
防己	常山	草龍膽
玄參	丹參	苦參
紅花	三稜	蓬莪朮
天麻 <small>附赤箭</small>	南星	秦艽
遠志 <small>附小草</small>	破故紙	葫蘆巴
二五	二五	二六
二六	二六	二七
二七	二八	二八
二九	二九	二九
三〇	三〇	三〇
三〇	三一	三一
三二	三二	三三
三三	三三	三四
三四	三五	三五
三五	三六	三六
三七	三七	三八
三八	三八	三九
三九	三九	四〇
四〇	四一	四一
四一	四二	四二

何首烏 <small>二種</small>	四二	骨碎補.....	四三	威靈仙.....	四三
牛膝 <small>二種</small>	四三	黃精.....	四四	蒲黃.....	四四
續斷.....	四五	益母.....	四五	肉蓯蓉.....	四五
鎖陽.....	四六	車前子.....	四六	紫菀.....	四六
百部.....	四六	百合.....	四七	款冬花.....	四七
馬兜鈴.....	四七	青黛.....	四七	甘菊.....	四八
薏苡仁.....	四八	牡丹皮.....	四八	兔絲子.....	四九
茴香 <small>大小二種</small>	四九	砂仁.....	四九	白豆蔻.....	五〇
肉豆蔻.....	五〇	草豆蔻.....	五〇	草果.....	五〇
菖蒲.....	五一	黑附子.....	五一	天雄.....	五二
烏頭.....	五二	烏啄.....	五二	側子.....	五二
射干.....	五二	旋覆花.....	五三	大戟.....	五三
商陸.....	五三	葶藶 <small>甜苦二種</small>	五三	牛牽 <small>黑白二室</small>	五四
草薺.....	五四	木通.....	五五	通草.....	五五
燈心.....	五五	石斛.....	五五	石葦.....	五六

蒼耳	荊芥	蒲公英	艾葉	蛇床子	草麻子	蘭葉	王不留行	狗脊	蘆薈	白附	白頭翁	薑黃	茅根	白蒺藜
六六	六六	六六	六五	六四	六三	六三	六二	六一	六〇	六〇	五九	五八	五七	五六
茵陳蒿	香薷	夏枯草	薄荷	金銀花	馬鞭草	水萍	淫羊藿	青蒿	胡黃連	蚤休	白前	牛蒡子	仙茅	青箱子
六七	六七	六六	六五	六四	六四	六三	六二	六一	六〇	六〇	五九	五八	五七	五七
使君子	佛耳草	藿香	稀簽	山豆根	蘆根	決明草	巴戟	萆撥	澤蘭	白蘚皮	白薇	紫草	鬱金	木賊草
六八	六七	六六	六五	六四	六四	六三	六二	六一	六一	六〇	五九	五八	五八	五七

訶梨勒 <small>子附風</small>八四	天竺黃.....八四	蕪荑.....八五	竹葉 <small>苦竹竹蘆附</small>八三	沒藥.....八二	木瓜.....八三	乳香.....八二	蘇木.....八一	沉香.....八一	猪苓.....八一	丁香.....八〇	冰片.....八一	大腹皮.....八〇	益智.....八〇	檳榔.....八〇	酸棗仁.....七九	枸杞子 <small>二種</small>七八	地骨皮.....七九	桑白皮 <small>枝權寄生附</small>七八	厚樸.....七七	黃柏.....七七	烏藥.....七六	蔓荊子.....七六	杜仲.....七六	山茱萸.....七六	山梔.....七五	吳茱萸.....七五	木香.....七四	桂 <small>分爲四種</small>七二	槐實 <small>枝皮附</small>七三	柏子仁.....七二	琥珀.....七一	松香 <small>子花葉附</small>七一	茯苓 <small>赤白二種附</small>七〇	劉寄奴.....六九	覆盆子.....六九	高良薑.....六八	石蓮子.....六八	合歡皮.....六八	萱草根.....六九	木部 <small>五十七種</small>	玳瑁.....七一
--------------------------------	------------	-----------	---------------------------------	-----------	-----------	-----------	-----------	-----------	-----------	-----------	-----------	------------	-----------	-----------	------------	-------------------------------	------------	----------------------------------	-----------	-----------	-----------	------------	-----------	------------	-----------	------------	-----------	-------------------------------	-------------------------------	------------	-----------	--------------------------------	---------------------------------	------------	------------	------------	------------	------------	------------	------------------------	-----------

五加皮	八六	楮實 <small>樹汁</small>	八六	秦皮	八六
檮白皮 <small>白椿皮</small>	八七	密蒙花	八七	辛夷	八七
蕤仁	八七	女貞實	八八	五倍子 <small>百煎藥</small>	八八
牙皂 <small>皂角</small>	八八	巴豆	八九	金鈴子	八九
紫葳	九〇	雷丸	九〇	鈎藤	九〇
血竭	九一	茶茗	九一	阿魏	九一
乾漆	九二	楓香	九二	蜀椒	九二
菜部 十種		乾薑	九三	萊菔 <small>子附</small>	九四
生薑	九二	韭 <small>根子</small>	九四	蒜	九四
白芥子	九四	葱白	九五	冬葵子	九五
胡葵 <small>子附</small>	九五				
白冬瓜	九六				
人部 十種		金汁 <small>二種</small>	九六	尿蛆	九七
乳汁	九六	秋石	七七	月水	九八
人溺	九七				

髮三種	九八	紫河車	九八	靈天蓋	九九
死人枕	九九				
禽獸部 十九種					
黑嘴白鴨 <small>鴨頭</small>	九九	烏骨雞	一〇〇	雄雀	一〇〇
雀卵	一〇〇	伏翼	一〇〇	龍骨 <small>齒附</small>	一〇〇
虎骨	一〇一	犀角	一〇一	羚羊角	一〇二
牛黃	一〇二	麝香	一〇三	鹿茸 <small>鹿角麋角</small>	一〇三
阿膠	一〇四	熊膽	一〇五	腥膈臍	一〇五
狗肉 <small>陰莖</small>	一〇五	羊肉	一〇六	牛肉 <small>牛乳腦角</small>	一〇六
猪肉 <small>四蹄鬚腸膏猪肺</small>	〇七				
蟲魚部 二十六種					
蜜鋒 <small>蟻附</small>	一〇七	牡蠣	一〇七	珍珠	一〇八
石決明	一〇	龜甲 <small>龜板</small>	一〇八	鼈甲 <small>肉鱗</small>	一〇九
蕪蛇	一一〇	白花蛇	一一〇	蝦蟆 <small>肺及</small>	一一一
蝎子	一一二	五靈脂	一一二	蜈蚣	一一二

雷公炮製藥性解


金石部

金銀箔味辛性平有毒入心肺二經主安心神定驚悸鎮顛狂除邪銀之入肺部因其類也其性沉重能制火臟之輕揚故亦入心經過服必中其毒以鷓鴣肉解之

黃丹味辛性微寒有毒不載經絡主吐逆顛狂止痛生肌○按黃丹乃熬鉛所作鉛本水中之精最能制火吐狂等證何者非火而有不瀦者乎

胡粉味辛性寒無毒不載經絡主一切癰腫諸毒及腐爛肉殺三蟲破癥結○按胡粉一名粉錫實亦化鉛所作能破結殺蟲者其亦鎮墜之功歟

銅青味苦澇性平有微毒不載經絡主斂金瘡淘眼暗止血殺蟲能去腐肉○按銅青卽銅綠本醋沃銅上而得其精華醋能收斂故斂瘡止血其去腐肉者亦醋之功眼乃肝竅眼之不明肝之病也得金之精以制木而目之暗者從此明矣鐵漿味甘澇性平無毒入心肺二經主顛癲狂亂解諸毒入腹蛇犬咬傷鎮心神明眼目堪洗漆瘡隨手而愈鐵鏽油調之可敷惡瘡疥疥蒜磨傳蛛蜘蛛咬傷○



按鐵漿即浸鐵色青可染皂者質本金也宜歸肺都性本沉也宜鎮心家明目治漆皆由伐木之功○鐵鏞可敷瘡毒亦以發在外者有散之義歟

水銀味辛性寒有毒不載經絡主疥癩痂瘍白禿皮膚殺蟲蝨墮胎絕孕解金銀銅錫毒鎔化還復為丹服之神仙不死畏磁石砒霜○按水銀療蟲疥等證良由其毒也又殺五金毒者蓋以其性陰柔能消五金為泥耳入耳能食腦至盡入肉令百節攣縮倒陰絕陽性滑重極易入肉最宜謹之能下死胎可灌屍骸內傳極言其煉服之功然後世食之者往往喪生可為妄信者戒

【雷公云】

凡草中取者并朱砂中者俱不可用經別藥製過者勿用曾飲過死屍及半生半死者勿用若在際砂中產出者其水銀色欲紅收得後用葫蘆盛之免致遺失若先以藥膏

天藥并夜交藤自然汁二味同煮一服時其毒自退若修十兩止用煎二味同煮一合煮足為度

輕粉味辛性寒有毒不載經絡主通大腸轉胞諸瘡蟲癬小兒疳積輕明可愛燒火上走者真○按輕粉即水銀所昇者本草言其無毒誤也外科需為要藥但勿輕用服食今見癩癧方中多用之必能損人腸胃不可不戒其值賤貴市中多燒凝水石及石膏為粉以亂真須細辨之

銀硃味苦辛性溫有毒止入敷藥殺蟲餘無他用○按銀硃亦水銀燒就中其毒者令人發脹至死可弗慎耶

蜜陀僧味鹹辛性平有毒不載經絡主皮膚斑點五痔金瘡嗽嘔吐痰禁瘧痢
鎮心驚體如金色者佳水飛用○按蜜陀僧一名沒多僧質極重過服傷人臟

【雷公云】

凡使搗令細於破鍋中安置了用重紙袋盛粉木末於蜜陀僧中
次下東流水浸令滿着火煮一伏時足去粉木紙袋取蜜陀僧用

丹砂味甘生者微寒無毒煉者大熱有毒入心經主鎮心安神益氣明目通血
脈除煩滿止消渴療百病殺精祟鬼邪祛疥癬蟲瘡久服成仙畏碱水大如雞卵
形似芙蓉破之若雲母光明照徹者佳○按丹砂之色屬丙丁火心臟之所由歸
也質性沉滯勿宜多用青霞子云入石見火悉成灰燼丹砂伏火化為黃銀能重
能輕能神能靈能黑能白能暗能明大清云外包火石內含金精先稟氣於甲受
氣於丙出胎見壬結魄成庚增光歸戊陰陽升降各本其原攷茲二說則服食成
仙之說信矣自唐世太平日久膏梁之家弗得其理惑於方士都致殞身習俗成
風至今未已斯民何辜蒙此慘禍其理淵奧察之實難吾願好事者慎之

【雷公云】

凡使宜須細認取諸般尚有百等不可一一論之有砂礪砂如拳許大或重一盞一塊
者而面如鏡者遇陰氣天雨即鏡面上者紅藥汁出有梅柏砂如龍子許大夜有光生

照見一室有白凝砂如菩提子許大上面有小星現有神座砂若經丹壯服之面白延年其次有白金
砂澀水砂陰成砂下鑄砂芙蓉砂鏡面砂箭鏃砂曹未砂土砂金星砂平面砂神水砂不可一一細述
也凡修事砂先於一淨室內焚香齋沐然後取砂以香水浴拭乾即碎搗之後向鉢中更研三伏
時竟取一礪銅子着了砂子內用甘草紫背天葵五方草各磨之著砂上以東流水煮亦三伏時勿
令水盡調失時候約去三分次入青芝草山躑草半兩蓋之下十斤火煨從已至于時方歇候再研
似粉如要服則入熟蜜丸如細麻子許大空腹服一丸如要入藥中用則依此法凡礪自然炭火五兩

硃砂用甘草二兩紫背天葵一錢五
方草自然汁一飲同東流水煮過

鍾乳味甘性溫有毒入肺腎二經主泄精寒嗽壯元氣益陽事安五臟通百節
利九竅下乳汁亦能通聲光潤輕鬆色如煉硝石者佳久研忌歇須用水飛以摻
臂上入肉不見為度蛇床為使惡牡丹玄石牡蒙畏紫石英藁草忌羊血○按鍾
乳性溫而狀有下行之義宜入腎經肺即其母也故并入之諸家本草述其功者
甚衆惟丹溪以為慄悍之劑不宜輕用不煉而服使人病淋

【雷公云】

凡使勿用頭粗厚并尾大者為乳公石不是色黑及經大火燒過並久在地上收者會
經藥炮制者並不得用須要鮮明薄而有光潤者似糖餅管子為上有長五六寸者凡
修專法以五香水煮過一伏時然後曬出又別用甘草紫背天葵汁漬再煮一伏時凡鍾乳八兩用沉
香零香甘松白茅各一兩以水先煮過一度了第三度方用甘草等三味各二兩再煮了曬出拭乾緩
火焙之然後入符龍如粉篩過却入鉢中令有力少壯者兩三人不住研三夜勿歇然
後用水飛淨了以絹白之於日中晒令乾又入鉢中研二萬遍後以磁盒收貯用之

礬石味酸性寒無毒入肺肝二經主寒熱洩痢白沃陰蝕諸惡瘡癬清喉痺除
目痛祛固熱清泄瀉收脫肛同皂莢可吐風痰和蜜蠟能消癰瘻光明如水晶者
佳甘草為使惡牡蠣畏麻黃○按礬石西方之色宜入肺家東方之味宜入肝部
肺肝得令而寒熱諸證可無虞矣然亦收斂之劑弗宜驟用

【雷公云】

凡使須以磁瓶盛於火中撥令內外通赤用錫揭起善旋安石礬藥於赤瓶之中燒藥
藥盡為度度將鉞夾出放冷敲碎入鉢中研如粉後於屋下掘一坑可深五寸却以紙裏
留坑中一宿取出再研每修事十兩用石礬藥六兩燒盡為度又云凡使要光明如水晶酸鹹溫味全
者研如粉於磁瓶中是要得兩三升者然後以六一泥泥於火時家之令乾置研了白礬於瓶內用

五方草紫背天葵二味自然汁各一盞旋旋添白礬於火中逼令藥汁乾用善了瓶口復以泥泥上下
用火一百斤煨從已至未去火取白礬瓶出放冷敲碎取白礬若經大火一煨白如銀自然伏火鍊兩
不失播細研如
輕粉方用之

禹餘糧味甘性寒無毒不載經絡主咳逆寒熱煩滿崩中血閉癥瘕骨節疼痛
四肢不仁大熱痔瘻牡丹杜仲爲使畏貝母菖蒲鐵器○按禹餘糧因禹行山中
乏食採此充糧故以名之則其無毒可知矣太乙餘糧本是一種今諸家往往分
別惟陳藏器所言者近是

硝石味苦辛性大寒有毒入心脾二經主六腑積聚燥急留血閉藏天行疫痢
傷寒發狂停痰作瘡腸風痔漏推陳致新解諸石藥毒種種實熱悉可瀉除能墮
胎孕大黃爲使惡苦參苦菜女菀畏麥句薑○按硝石爲太陰之精宜入心家瀉
火而脾卽其子也故并入之丹溪云本經言其無毒誤也能化七十二種豈無毒
而然乎分爲六種氣味相同俱善消化驅逐但朴硝力緊芒硝馬牙硝力緩硝石
風化硝玄明粉緩而又緩也以之治病病退卽已本經稱其煉服補益豈理也耶
經云熱淫於內治以鹹寒佐以苦寒古方因之故都用大黃佐芒硝耳

【雷公云】凡使先研如粉以磁瓶子於五斤火中煨令通赤用梁腸菜桐子仁和作一處分丸如
珠子盡爲度
小珠子許待珠子赤時投硝石於磁瓶內其硝石自然伏火每四兩硝石用梁腸菜桐

滑石味甘淡性寒無毒入胃膀胱二經主利水道實大腸化食毒行積滯逐凝血解燥渴導乳汁補脾胃降妄火白膩而無黃硃者佳甘草石葦為使惡曾青○按滑石甘宜於中州淡宜於利水胃與膀胱之所由入也利益雖多終是走泄之劑無甘草以和之弗宜獨用也

【雷公云】

凡使有多般勿誤用之有白滑石綠滑石烏滑石冷滑石黃滑石其白滑石如方解石色白於石上畫有白膩文便是綠滑石性寒有毒不可入藥中用烏滑石似黑色畫石

上有青白膩文入用妙也黃滑石似金類類圖畫石上有青及黑色者勿用殺人冷滑石青苔色畫石上作白膩文亦勿用若滑石色似水白青色畫石有膩文者真凡使先以刀刮研如粉以壯丹皮同煮

一伏時出去壯丹皮取滑石却用東流水淘過於日中晒乾方用

石膏味辛甘性寒無毒入肺胃二經主出汗解肌緩脾益氣生津止渴清胃消痰最理頭疼與方解石相似須瑩淨如水晶者真雞子為使惡莽草馬目毒公巴豆畏鐵○按石膏辛走肺甘走胃所以主發散仲景名為白虎蓋有兩義一則以其入肺一則以其性雄苟胃弱不食及血虛發熱者誤用之為害不淺

【雷公云】

凡使勿用方解石此石雖白不愛明其性燥若石膏出剡州若山縣義情山其色瑩潔如水晶性良等也凡使之先於石臼中搗成粉以密絹羅過生甘草水飛過了水令乾

重研細用之良

青鹽味鹹性寒無毒入腎經主明目止痛益氣堅筋骨助水臟除心腹痛破積聚療疥瘡一名戎鹽一名胡鹽○按青鹽味鹹腎所宜也故獨入之水臟既補則

明目堅骨等功何足異耶。

食鹽味鹹性溫無毒入腎肝肺三經主鬼蠱邪疰毒氣洗下部蠱瘡吐中焦痰癖熨疝氣及內腎氣止霍亂及心腹卒痛殺蟲去風明目固齒白如霜雪者佳炒研用○按食鹽之鹹本歸腎臟肺即其母肝即其子也故并入之本草云多食傷筋損肺水腫及咳嗽血虛者忌之何也蓋以鹹走腎過多則腎不能勝而受傷於是盜食母氣而肺氣亦損損肺則金還剋木夫肝主筋而藏血肺主咳嗽而生水數證之來甯能免耶。

雄黃味苦甘性平有毒不載經絡主殺精魅鬼邪蛇虺蠱毒山嵐瘴毒惡瘡死肌疥癬蟲蠶百節中風鼻中瘰肉中惡腹痛佩帶之鬼神不敢近諸毒不能傷胎婦轉女成男解藜蘆毒大塊透明中無砂石者佳研細水飛用○按雄黃或以為黃金之苗今有金窟處無雄黃則斯言未足深信夫孕婦佩之能轉女胎為男言若不經然里中試之者往往獲驗則有奪造化之功非稟太陽之精惡能臻此殺蠱辟邪宜其效矣中其毒者以防己解之。

【雷公云】

凡使勿用黑雄黃自死黃夾賦黃其臭似雄黃只是臭不堪用時人以醋洗之三兩度便無臭氣勿誤用也次有夾賦黃亦似雄黃其內一重黃一重石不堪用次有黑雄黃

亦似雄黃如烏雞頭上冠也凡使要似鴉鵂烏肝色為上凡修事先以甘草紫背天葵地胆碧陵花四件並細瀉每件各五兩雄黃三兩東流水入瓦鑊中煮三伏時方漚出搗如粉水飛澄去黑者晒乾再

研方入藥用其內有割錢石是雄黃中
又有魏越矢黃能割於鐵並不入藥用

紫石英味甘辛性溫無毒入心經主咳逆邪氣寧心定驚補不足塗腫毒又主
婦人子戶風寒十年無孕長石爲使畏扁青附子惡黃連鮑甲麥句薑○按紫石
英爲重鎮之劑又有紫赤色心經之所由入也心主血婦人得之則血受溫補而
胎可結矣

赤石脂味甘性平無毒入心經主養心氣明目益精療腹痛下痢癰疽瘡痔女
子崩漏產難下胞衣惡大黃及松脂畏羌花○按石脂色赤宜入心經腹痛諸證
皆火爲之殃崩漏諸證皆血爲之禍心主血屬火得石脂以療之而更何庸虞哉
寒水石味辛甘性大寒無毒入五臟諸經主內外大熱時行熱渴腹中積聚解
巴豆毒凡使須姜汁煮之汁盡爲度細研用畏地榆○按寒水石卽凝水石性極
寒冷故於五臟靡所不入過服令人腸胃受寒不能飲食陶隱居云夏月能爲冰
者佳如此則舉世不能得矣似乎失言

【雷公云】

凡使先用生薑自然汁煮汁盡爲度細研
成粉然後用之每修十兩用姜汁一盞

花藥石味性經絡諸書不載主金瘡止血產婦血暈火煨用○按花藥之功專
主血證能化瘀血爲黃水服之令人大虛不宜經用若多用服後當以補劑培之

陽起石味鹹性溫無毒入腎經主腎絕陽痿崩中漏下癥瘕結氣有雲頭雨脚及鷲鷲毛者真桑螺蛸爲使畏兔絲惡澤瀉官桂蛇退雷丸忌羊血○按陽起石鹹溫之品宜歸水臟崩漏癥瘕皆腎虛所致故咸療之難得其真勿宜誤用

蓮砂味苦辛性溫無毒入肺經主消痰止咳理喉痺破癥結光明瑩徹者佳○按蓮砂色白味辛宜肅肺部痰嗽等證皆肺火也故咸治之

膽礬味酸苦辛性寒有毒不載經絡主消熱殺蟲止驚癇吐風痰鮮明者佳○按膽礬之功大抵與白礬相類惟能止驚爲少差耳

青礬石味辛甘性平有毒入肺大腸胃二經主蕩滌宿痰消磨食積研絕細用○按礬石辛宜於肺甘宜於胃大腸者肺家傳送之官也故都入之大損元氣不可漫用

無名異味甘性平無毒不載經絡主金瘡折傷內損止痛生肌及長肉消癰疽腫毒○按海內人云石無名異絕難得土無名異不甚貴重豈本經說者爲石今所有者爲土乎用時以醋磨塗患處

玉屑味甘性平無毒入肺經主除煩止渴養神明目寧心定驚滅癩痕滋毛髮助喉聲美顏色搗如米苦酒浸之消如泥惡鹿角畏款冬花○按玉屑色白性潤

宜入肺部。肺得其養，則煩渴諸證，何自而生。又主滅癥，云云者，亦以肺主皮毛，功效之所必及也。

自然銅味辛，性平無毒，不載經絡。主破積聚，療折傷，續筋骨，散血排膿，止痛定驚，亦主產後血邪。凡使須搥碎，以甘草水煮過，又用醋浸一縮，以泥包裹之，火煨研細用。○按自然銅實銅坑中所產之石也，其色青黃如銅，不從礦煉，故名之。丹溪曰：自然銅世以為接骨要藥，不知接骨在補氣補血，補胃補腎，俗醫惟冀速效，以罔利而用之，亦未稔其燥散之禍耳。

（雷公云）

石鑄鉛即自然銅也。凡使勿用方金牙，其方金牙真似石鑄，若誤解吐殺人，其石鑄似鉛，乾便用，蓋了膠用火煨兩伏時，去土灰，盡研如粉，用者修專五兩，以醋兩盞。

石燕性涼無毒，味與經絡。諸書不載，主五淋，小便不利，腸風痔瘻，婦人產難，兩手各握一枚，立驗。研細水飛用。○按圖經云：石燕出零陵郡，今祁陽縣沙灘亦有之，形似蚶而小，其實石也。觀其主治，都是行下之功，食療贊其補益，似未然耳。

磁石味辛鹹，性寒無毒，入腎經。主周身溼痺，肢節中痛，目昏耳聾，補勞傷，除煩躁，消腫毒，令人有子，能吸重鐵者佳。入火煨紅，醋淬七次，研絕細用。柴胡為使。惡牡丹芥草黃石脂。○按磁石入腎，何也。蓋以性能引鐵，取其引肺金之氣入腎，使

子母相生爾水得金而清則相火不攻自去故主治如右然久服多服必有大患勿喜其功而忽其害也。

（雷公云）

凡使勿誤用玄中石井中麻石此二石真相似磁石只是吸鐵不得中麻石心有赤波粗是鐵山石也誤服之令人生惡瘡不可療如欲驗過一斤磁石四兩吸鐵一斤者此名延年抄四兩吸得鐵八兩者號曰續采石四兩只吸得五兩上下者方為磁石凡修專一斤用五花皮一鎰地榆一鎰故棉十五兩三件並細剉於石匕搥碎作二三十塊將磁石入磁盞中下草藥以東流水煮三日夜攪出試磁以布袋之向大石上再搥令細入乳鉢中研極細如塵以水飛過又研如粉用之

硫黃味酸性大熱有毒入命開經主下焦虛冷陽絕不起頭禿疽痔癬疥心腹痲痺脚膝冷疼虛損泄精整淨無夾石者良甘草湯煮過用畏朴硝細辛飛廉忌百般禽獸血○按硫黃為火之精宜入命門補火蓋人有真火寄於右腎苟非此火則不能有生此火一熄則萬物無父非硫黃孰與補者太清云硫稟純陽號為將軍破邪歸正返濁還清挺立陽精消陰化魄戴元禮云熱藥皆燥惟硫黃不燥則先賢常頌之矣今人絕不用之誠虞其熱毒耳然有火衰之證舍此莫療亦畏而遺之可乎中其毒者以豬肉鴨羹餘甘草湯解之

（雷公云）

凡使勿用青赤色及半白半黃半赤半黑者有黃色如雞雛初出者為真凡礬四兩先以龍尾蒿自然汁一鎰東流水二鎰紫背天葵汁一鎰栗遠子華汁四鎰合之攪勻入瓦鍋用六一泥固濟底下將硫黃碎之入於鍋中以前藥汁旋旋添入水煮之汁盡為度再以百部末十兩桐蟲末二斤一錢草一斤細剉之以東流水并藥等同煮硫黃二伏時去諸藥取出用甘草湯洗了入鉢中研二萬遍方妙

■果部

陳皮味辛苦性溫無毒入肺肝脾胃四經主下氣消食化痰破結阻嘔咳定霍亂療吐瀉利小便通五淋逐膀胱留熱殺寸白諸蟲核治腰痛疝痛葉治乳癰脇癰肉能止渴多食令人氣逆生痰去白者兼能除寒發表留白者兼能補胃和中微炒用產廣中陳久者良○按陳皮辛苦之性能泄肺部金能制木故入肝家土不受侮故入脾胃採時性已極熱如人至老成則酷性漸減收藏又復陳久則多歷梅夏而烈氣全消溫中而無燥熱之患行氣而無峻削之虞中州之勝劑也乃大全以爲多用獨用有損脾胃師心之過耳

青皮味苦酸性溫無毒入肝脾二經主破滯氣愈低而愈效削堅積愈下而愈良引諸藥至厥陰之分下飲食入太陰之倉消溫瘧熱甚結母止左脅鬱怒作痛去肉微炒用○按青皮卽橘之小者酸能瀉木宜走肝經溫能補土宜歸脾部其性峻削多服傷脾虛羸禁

枳殼味辛苦酸性微寒無毒入肺肝胃大腸四經主下胸中至高之氣消心中痞塞之痰泄腹中滯塞之氣推胃中隔宿之食削腹內連年之積疏皮毛胸膈之病散風氣癢麻通大腸閉結止霍亂療腸風攻痔疾消水腫除風痛去瓢核麩炒

用陳久者良。○按枳殼辛歸於肺，酸歸於肝，大腸者肺之腑也，胃者上焦之腑也，故均入之，括下枳茹，其效更速。

【雷公云】

凡使勿用枳實，該性效不同，若使枳殼取辛苦，發并有油，能治一切瘴塊，陳久年深者，爲上用時，先去蠶殼炒過，待變無黑，取出用布拭去黑，後再搗如粉用之。

枳實味苦酸，性微寒，無毒，入心脾二經，主消胸中之癖，滿逐心下之停水，化日久之稠痰，削年深之堅積，除腹脹，消宿食，定喘咳，下氣逆，麩炒用。○按枳實即枳殼之小者，苦宜於心，脾者心之子也，故并入之，其性猛烈，有冲牆倒壁之功，氣弱者忌之，考青皮、陳皮同一種，但採有遲早，分老嫩而名也，四者主治，咸以導滯爲功，然嫩者性酷，治下老者性緩，治高之別爾。

杏仁味甘，苦性溫，有小毒，入肺、大腸二經，主胸中氣逆而喘嗽，大腸氣祕而難便，及喉痺、瘡、癰、痰、結、煩、悶、金瘡、破傷、風熱、諸瘡、中風、諸證、蛇傷、犬咬、陰戶痛、癢，並堪搗敷，沸湯炮去皮尖炒用，得火良，惡黃芩、黃芪、葛根、畏藁草、解錫毒，及中狗肉毒，雙仁者能殺人，杏子不可多食，能損筋骨，眼目。○按杏仁入肺者，經所謂肺苦氣上逆，急食苦以瀉之是也，大腸則共肺爲傳送者也，宜并入之，考左慈祕訣，稱杏仁爲草金丹，久服成仙，方書又云，服杏仁者，往往至二三年，或瀉或臍中出物，皆不可治，兩道相背，然杏仁主散痰，從腠理中發散而去，且有小毒，則方書之說

最為近理。祕訣所言。意者功在法製。亦未可知。然終屬虛渺。勿宜盡信。

【雷公云】

凡使須以沸湯浸少時去皮膜及尖劈作兩片用火石并烏豆杏仁三件於鍋中下東流水煮從已至未其杏仁色褐黃則去尖修治一斤用白火石一斤烏豆三合水旋

添勿令開屬為妙也

桃仁味苦甘性平無毒入肝大腸二經主瘀血血閉癥瘕鬼邪血燥便結殺三蟲止心痛沸湯泡去皮尖炒用花主殺鬼疰悅顏色利二便下諸蟲勿用千葉者令人鼻衄毛主血癥積聚崩帶諸疾桃蟲主殺精鬼邪惡不祥葉主惡氣客忤陰戶生蟲痛癢及瘡中蟲桃實多食令人發熱○按桃仁行血宜入肝經性潤宜大腸典術云桃為五木之精故花仁子葉俱能壓邪殺鬼

【雷公云】

凡使須去皮尖用白朮烏豆二味和桃仁同於瓦鍋中煮一伏時後瀉出用手劈作兩片其心如黃金色乃用之花勿用千葉者能使人鼻衄不止目黃凡用揀令淨以絹

袋盛於簷下懸令乾用鬼蠲蠶勿使乾蠶子其鬼蠲蠶只是千葉松花結子在樹上不落者於十一月內採得可為神妙凡修事以酒拌蒸從已至未焙乾以銅刀切片焙取肉用

大棗味甘性平無毒入心脾二經主和百藥益五臟潤心肺養脾胃補精氣生津液通九竅強筋骨祛邪氣悅顏色去核用殺烏頭毒忌生葱○按棗之入脾者經所謂五味入口甘先歸脾是也心則生脾者也宜並入之多服能壅脾作脹而中滿及齒痛風疾者咸非所宜

烏梅味酸性溫無毒入肺腎二經主生津液解煩熱止吐逆除瘴瘴止久痢消

酒毒。又主皮膚黑點。麻痺不仁。去核用。○按烏梅入肺者。經所謂肺欲收。急食酸以收之。是也。腎則其所生者也。宜並入之。多食最能損齒。風寒初起。瘧疾未久者。不可驟以此收斂也。

藕味甘性平無毒。入脾經。主散瘀血。止吐衄。解熱毒。消食止渴。除煩解酒。和蜜食之。能肥腹臍。不生諸蟲。煮熟食之。能實下焦。大開胃脘。其節尤佳。其皮散血不凝。蓮子主清心醒脾。補中養神。進飲食。止瀉痢。禁泄精。除腰痛。久服耳目聰明。宜去心蒸熟用。蓮鬚主益腎瀆精。荷葉主雷頭風。破血止渴。葉蒂主安胎。逐瘀血。留好血。止血痢。○按藕味甘溫。宜歸脾臟。脾實裏血。故治血證。多服蓮子。令人氣滯。多服蓮鬚。令人祕結。荷葉形如仰盂。其象爲震。震爲雷。屬木。化風。故治雷頭風。枳朮丸用之。取其引生少陽經清氣耳。葉蒂在中。故能中守。又能行血者。性溫之功也。

枇杷葉味苦性平無毒。入肺經。主除嘔和胃。解渴止嗽。下氣清痰。刷去黃毛。蜜灸用。枇杷主潤五臟。止吐解渴。○按枇杷葉之入肺。苦能泄氣。故也不去黃毛。射入肺中。發咳不已。枇杷不可多食。亦能發熱生痰。

【雷公云】

凡使採得後。秤淨者一葉重一兩。乾者二葉重一兩。者是氣足。堪用。使粗布拭去毛。令盡。用甘草湯洗一。葉用。用綿再拭。令乾。每一兩以酥一分。炙之。以酥盡爲度。

石榴皮味酸瀋性溫無毒入大腸腎二經主章漏下痢筋骨風痛脚膝難行目流冷淚腸風下血殺牙蟲染鬢髮其子止渴其花百葉者主心熱療吐血爲末吹鼻中止血及金瘡血○按腸滑則患血痢腎滑則患遺泄榴者留也故入茲二經然痢積未盡者不可先以此澀之多服能戀膈成痰其子不宜過食能損肺壞齒其花色赤屬火宜入心家而主血

【雷公云】

凡使皮葉根勿令犯鐵若使石榴壳不計乾濕先用漿浸一宿至明取出其水如蒸汁若使枝根葉並用漿水浸一宿方可用之

山查味甘酸性平無毒入脾經主健脾消食散結氣行滯血理瘡瘍○按山查之甘宜歸脾臟消食積而不傷於刻行氣血而不傷於蕩產科用之療兒枕疹小兒尤爲要藥

梨味甘性寒無毒入心肺二經主心經客熱肺臟煩熱止嗽消痰清喉降火解渴除煩消風潤燥○按梨之入心經所謂以甘瀉之是也火清而金不受燥故亦入肺經性冷而利多食損脾丹溪曰梨者利也流利下行之謂也乳婦及金瘡忌用

柿味甘瀋性寒無毒入心肺大腸三經主潤心肺通耳鼻消痰嗽清火熱除渴解酒祛腸內宿血止口中吐血忌同蟹食柿乾潤燥降火補虛殺蟲腸厚止痢柿

蒂主呃逆。○按柿之色赤，宜歸心臟，性潤宜歸肺家。大腸則共肺為傳送者也。故亦入之。性冷傷脾，不宜多用。若同蟹食，令人腹痛大瀉。柿乾及蒂，總屬寒涼，亦能清火。

芡實味甘，性平無毒，入心腎脾胃四經。主安五臟，補脾胃，益精氣。按遺泄、煖腰膝、去溼、瘰癧、明目、治健忘。○按芡實之甘，宜歸脾胃。土得其宜，則水不受剋，火亦無盜食之虞。故又入心腎二經。多食壅氣，最難消化。嬰兒食之不長，老人食之延年。

胡桃味甘，性平無毒，入肺肝腎三經。主通血脈，潤肌膚，補下元。同松脂可敷癩癧。同熱酒能理撲傷。去衣用，過食動風生痰。○按胡桃入肺，故主肌膚入肝，故主血脈。其性屬火，能補相火，故亦入腎經。火能剋金，多食則傷肺，故能動風生痰。瀉痢及感冒風寒者忌用。

龍眼味甘，性溫無毒，入心脾二經。主補血氣，養肌肉，益虛氣，美顏色，除健忘，治怔忡，增智慧，明耳目，久服延年。○按龍眼甘溫之品，脾家所悅，心者脾之母也。母無顧子之憂，則心血可保。故入茲二經。然甘能作脹，凡中滿氣膈之證，均宜遠之。

檳榔味甘，性溫無毒，入脾胃二經。主開胃下氣，消食化酒，治渴止瀉，解諸魚

毒核中仁可塗口唇燥裂。○按橄欖甘溫之性宜入脾胃然性熱能致上壅亦不可多食。

■穀部

麥芽味甘鹹性溫無毒入脾胃二經主溫中下氣開胃健脾催生下胎去宿食除脹滿止吐逆破癥結消痰痞炒去芒再炒焦黃研用蜜爲之使。○按麥芽甘而且溫宜職中州夫麥性泥滯不過水浸生芽氣雖少清性猶未化功效何若是殊哉全在多炒使其性枯爾不然是卽食矣皆復能消耶丹溪云大麥有火能生熱病其芽能行上焦滯血除腹內寒鳴然多用久服令人消腎。

神麩味甘性溫無毒入脾胃二經主調中止瀉開胃消食破癥結逐積痰除脹滿又主胎上搶心血流不止亦能下鬼胎。○按神麩甘溫爲脾胃所喜故兩入之本小麥麵造成須得六神氣者良不爾與麵餅何異其法於六月六日用麵五斤象白虎蒼耳草自然汁一碗象勾陳野藜自然汁一碗象騰蛇青蒿自熱汁一碗象青龍杏仁去皮尖五兩及北方河水象玄武赤小豆煮熟去皮四兩象朱雀一如造麩法懸風處經年用。

【雷公云】

凡使瀉作末後掘地坑深二尺用物裹內坑中經宿取出焙用。

酒味苦甘辛。性大熱有毒。入十二經。主驅邪氣。辟穢惡。禦霧露。解瘴癘。溫脾胃。破癥結。助藥力。厚腸胃。駐顏色。通行血脈。榮養肌膚。忘諸甜物。及乳同食。○按酒之爲用。無微不達。故諸經皆入之。主療雖宏。能發溼中之熱。過飲則相火冒炎。肺金受燬。輒致痰嗽。脾因火而困倦。胃因火而嘔吐。心因火而昏狂。肝因火而善怒。膽因火而忘懼。膀胱因火而精枯。甚者勞嗽吐衄。哮喘蠱脹。癩癰癰疽。流禍不小。倘或不節。死亡立至。可不謹乎。

醋味酸。性溫無毒。入肝經。主胃脘氣痰。癥瘕積聚。產後血暈。去瘀生新。同胡粉止鼻中血。同雌黃治蜂蝎蛇傷。漬黃柏可治口瘡。磨南星可敷瘤瘰。調飛麵堪塗癰腫。和石灰除腋氣。反蛤肉。○按經曰。東方之木。其味酸。醋之所以入肝也。能傷筋損齒。不宜多食。

飴糖味甘。微溫無毒。入肺脾二經。主和脾潤肺。補虛止渴。消痰理嗽。建中斂汗。○按肺喜潤。脾喜甘。宜飴糖之入二經也。建中湯用之。取其甘緩丹溪以爲能生胃火。此損齒之因。非土制水。乃溼土生火也。中滿嘔吐。及溼熱之證。皆不宜服。

胡麻子味甘。性平無毒。入肺脾二經。主傷中虛羸。補五內。益氣力。潤肌膚。填腦髓。堅筋骨。療金瘡。止痛除瘡。及傷寒溫瘧。大吐後虛熱羸困。利大小腸。催生落胞。

久服耳目聰明辟穀延年水淘去浮者酒蒸晒乾去粗皮留薄皮○按胡麻性潤而味甘脾肺之所由歸也仙經需為要藥取其補虛殊勝脾家有火大腸燥結者始為相宜不然恐有洩痢之患

【雷公云】

凡使有四角入後者兩頭尖色紫黑者又呼胡麻並是誤也其巨勝有七稜色赤味微酸是實又呼烏油麻作巨勝者亦誤修專一斤先以水淘淨者去之沉者瀝出令乾以酒拌蒸從己至亥取出攤曬乾於白中春去粗皮一重拌小豆相對同炒小豆熟即出去小豆用之上有薄皮留用力在殼也

白藟豆味甘性微溫無毒入脾經主補脾益氣和中止瀉醋製能療霍亂轉筋解酒毒及河純毒一切草木毒葉主蛇蟲咬傷花主赤白帶下○按藟豆性味皆與脾家相得宜獨入之然此劑最為泥膈惟入健脾藥中則能補脾若單食多食極能壅氣傷脾本草稱其下氣恐非

赤小豆味甘酸性平無毒入心經主消熱毒排癰腫解煩熱補血脈止洩瀉下水氣利小便除大便血解小麥毒○按赤小豆南方心火之色也故猶入之經曰諸瘡痛癢皆屬心火又曰心主血故主療如右小腸者即受感而與心應者也故亦能利之衍義曰久服令人黑瘦結燥亦以利小便之故耳

芝麻味甘性生寒熟溫無毒入胃大小腸三經主行風氣通血脈滑腸胃潤肌膚生嚼可敷小兒頭瘡麻油主治相同能殺蟲治疥癬解百毒○按芝麻味甘宜

歸胃府。性滑利。宜入大小腸。總是潤澤之劑。故能通血脈。血脈通則風氣自行。肌膚自潤矣。乳母食之。令兒無熱病。不宜久食。令人滑精消瘦。發渴困脾。有牙疼及脾胃疾者。尤所當戒。

豆豉味苦。性寒無毒。入肺經。主傷寒頭痛。寒熱惡毒。瘴氣煩躁滿悶。虛勞咳吸。○按豉之入肺。所謂肺苦氣上逆。急食苦以洩之之意也。傷寒瘴氣。肺先受之。喘吸煩悶。亦肺氣有餘耳。何弗治耶。

菘豆味甘。性寒無毒。入心胃二經。主除熱毒。厚腸胃。散風消腫。下氣補臟養神。留皮用。○按菘豆寒則入心而瀉火。甘則入胃而和中。禹錫具稱其補益。宜長食之。又堪作枕。能明目。治頭痛。

■草部

人參味甘。性微溫無毒。入肺經。補氣活血。止渴生津。肺寒可服。肺熱傷肺。去蘆用。茯苓爲使。惡鹵鹹。及藜蘆。○按參之用。臟腑均補。何功之宏也。蓋人生以氣爲樞。而肺主氣。經所謂相傳之官。治節出焉。參能補氣。故宜入肺。肺能得補。則治節咸宜。氣行而血因以活矣。古方用以解散。亦血行風自滅之意也。至於津液藏於膀胱。實上連於肺。故有生津液之功。肺寒者氣虛血滯。故曰可服。肺熱者火炎氣

逆血脈激行。參主上升。且能瀆血。故肺受傷也。性本疏通。人多泥其作飽。不知少服則壅。多則反宣通矣。

【雷公云】

凡使要挾大塊如雞髓並似人形者。採得陰乾去四邊蘆頭並黑者。燻入藥中。裏中少使發心熱之患也。

黃耆味甘。性微溫無毒。入肺脾二經。內託已潰瘡瘍。生肌收口。固表虛盜汗。腠理充盈。惡龜甲白蘚皮。○按黃耆之用。專能補表。肺主皮毛。脾主肌肉。故均入之。已潰瘡瘍及盜汗。皆表虛也。故咸用之。裏虛者忌服。恐升氣於表。愈致其虛。表邪者忌服。恐益其邪也。惟表虛邪湊不發汗者。可酌用之。生者亦能瀉火。

【雷公云】

凡使勿用水煮。草真相似只是生時藥。短并根黃先須去頭上破皮了。蒸半日出。後用手摩令細。於棉紙上瀉用。○熊氏曰。黃耆動三焦之火。

甘草味甘。性平無毒。入心脾二經。生則分身梢而瀉火。炙則健脾胃而和中。解百毒。和諸藥。甘能緩急。尊稱國老。白止乾漆苦參為使。惡遠志。反甘遂海藻大戟芫花。忌猪荊菜。○按味甘入脾。為九土之精。安和七十二種金石。一千二百種草木。有調攝之功。故名國老。然性緩不可多用。一恐甘能作脹。一恐藥餌無功。惟虛人多熱。及諸蒼毒者。宜倍用。中滿及初痢者忌之。所謂脾病人毋多食甘也。

【雷公云】

凡使須去頭尾尖處。其頭尾吐京。每片切長三寸餘。劈破作六七。凡使磁器中盛。酒浸蒸從巳至午。出曝乾細。漚使一斤。用酥七兩塗。上炙至盡。為度。先燻令內外赤黃。用良

當歸味甘辛。性溫無毒。入心肝肺三經。頭止血而上行。身養血而中守。尾破血

而下流。全活血而不走氣。血昏亂服之而定。各歸所當歸。故名。酒浸用。惡藺茹。畏
萆薢。海藻。密蒙。○按當歸血藥也。心主血。肝藏血。脾裹血。故均入之。用分爲四。亦
親上親下之道也。雷公云。一齊用。不如不使服。亦無效。未可盡信。性泥滯。風邪初
旺。及氣鬱者。宜少用。

【雷公云】

凡使先去塵並頭尖硬處一分已來酒浸一宿若要破血即使尾若要止痛止
血即用頭硬實處若養血即用中身若全用不如不使服食無效單使妙也

川芎味辛甘。性溫無毒。入肝經。上行頭角。引清陽之氣而止痛。下行血海。養新
生之血以調經。久服令人暴亡。白芷爲使。畏黃連。小者名撫芎。主開鬱。○按川芎
入肝經。能補血矣。何云暴亡。以其氣升陽。其味辛散。氣提清。善於上部有功。然宜
中病卽已。若久用則氣逆且耗。故有此患。凡氣升痰喘。火劇中滿等證。不宜用之。
山藥味甘。性溫無毒。入脾肺腎三經。補陰虛。消腫硬。健脾氣。長肌肉。強筋骨。療
乾咳。止遺泄。定驚悸。除瀉痢。乳製用。紫芝爲使。喜門冬。惡甘遂。○按丹溪曰。山藥
屬土。而有金與水。宜入脾肺腎而補虛。經曰。虛之所在。邪必湊之。腫硬之謂也。得
補則邪自去。肺自健。於是土盛生金。金盛生水。功效相仍矣。然單食多食。亦能滯
氣。

白朮味苦甘。性溫無毒。入脾經。除溼利水道。進次強脾胃。佐黃芩以安胎。君枳

實而消痞。止洩瀉。定嘔吐。有汗則止。無汗則發。土炒用。防風地榆爲使。忌桃李雀肉青魚菘菜。○按白朮甘而除溼。所以爲脾家要藥。胎動痞滿吐瀉。皆脾病也。用以助脾。諸疾自去。有汗因脾虛。故能止之。無汗因土不得生金。金受火尅。皮毛焦熱。既得其補脾。又藉其甘溫。而汗可發矣。傷寒門有動氣得。不宜用之。

蒼朮味甘辛。性溫無毒。入脾胃二經。主平胃健脾。寬中散結。發汗祛溼。壓山嵐氣。散溫瘧。泔浸一宿。換泔浸炒用。使忌同白朮。○按蒼朮辛甘祛溼。脾胃最喜。故宜入之。大約與白朮同功。乃藥性謂其寬中發汗。功過於白朮矣。又謂其補中除溼。力不及白朮。於理未然。夫除溼之道。莫過於發汗。安有汗大發。而溼未除者。溼去而脾受其益矣。若以爲發汗。故不能補中。則古作以稱之。爲山精。煉服可長生也。亦以其結陰陽之精氣耳。俗醫泥其燥而不常用。不知脾爲土臟。所喜惟燥。未有脾氣健而諸臟猶受其損者。獨火炎土燥。脾虛作悶者。忌之。恐益其火也。

白芍藥味酸苦。性微寒。有小毒。入肝經。主怒氣傷肝。胸腹中積聚。腰臍間瘀血。腹痛下痢。十疾崩漏。調經安胎。赤者專主破血。利小便。除熱明目。雷丸烏藥沒藥爲使。惡石斛芒硝。畏硝石鱉甲小蘗。反藜蘆。○按白芍酸走肝。故能瀉水中之火。因怒受傷之證。得之皆愈。積聚腹痛。雖脾之病。然往往亢而承制。土極似木之

象也。經曰：治病必求於本。今治之以肝，正其本也。目疾與婦人諸證，皆血之病。得之以伐肝邪，則血自生病自己。故四物湯用之，亦以婦人多氣也。今竟稱其補血之效，而忘其用可耶。新產後宜酌用之，恐酸寒伐生生之氣也。血虛者煨用，痛痢者炒用。

【雷公云】

凡採得後於日中晒乾，以竹刀刮去粗皮，將蜜水拌蒸，從已至未晒乾用之。

生地黄味甘苦，性寒無毒。入心、肝、脾、肺四經。涼心火之煩熱，瀉脾土之溼熱，止肺經之衄熱，除肝木之血熱。忌見鐵器，當歸為使。得麥門冬、酒良。惡貝母、畏蕪荑、萊菔及子。○按生地黄總是涼血之劑，故入四經以清諸熱。老人津枯便秘，婦人崩漏及產後血攻心者，尤為要藥。實脾藥中用二三分，使脾家永不受邪。血虛寒者忌之。

熟地黄味甘苦，性溫無毒。入心、肝、腎三經。活血氣，封填骨髓，滋腎水，補益真陰。傷寒後脛股疼痛，新產後臍腹難禁，利耳目，烏鬚髮，治五勞七傷，能安魂定魄。使忌畏惡，俱同生地。性尤泥滯，姜酒浸用。○按熟地黄為補血之劑，而心與肝藏血生血者也，故能入焉。其色黑，其性沉陰重濁。經曰：濁中濁者，堅強骨髓。腎主骨，故入之。精血既足，則脛股臍腹之證自愈。耳目髮鬚，必受其益，而勞傷驚悸，並可痊。

矣。

【雷公云】

採得生地黃去白毛磁鍋上柳木甑蒸之勿令氣洩拌酒再蒸又出令乾勿令犯鐵器令人腎弱並白髮男搗藥女搗衛也

知母味苦性寒無毒入腎經瀉無根之腎火療有汗之骨蒸止虛勞之陽勝滋化源之陰生勿犯鐵器之損腎燒去毛鹽酒炒用○按知母入腎為生水之劑水感則火熄所謂壯水之主以制陽光也口渴乾咳眼花目炫便赤腰痛暮勞煩躁不眠此皆陽盛陰衰之證服之皆愈若肺家寒嗽及腎氣虛脫無火者禁用

【雷公云】

凡使先用塊結上細鹽酒炒用

貝母味辛苦性微寒無毒入心肺二經清心潤肺止嗽消痰主胸腹氣逆傷寒煩熱淋瀝瘰疬喉痺金瘡人面瘡癭瘤諸惡瘡去心研用厚朴白薇為使惡桃花畏秦芫礬石莽草反烏頭○按貝母辛走肺苦走心善能散鬱瀉火故治胸腹云云等疾

【雷公云】

凡使先於柳木火中炮令黃礬除去肉口鼻上有米許大者心一小顆後拌糯米於鍋上同炒待米黃熟然後去米取出其中有獨顯團不作兩片無紋者號曰丹龍精不入

藥中若誤服令人筋血脈永不收用黃糖及鹽汁合服立愈

黃芩味苦平性寒無毒入肺大腸膀胱膽四經主崩淋熱疰痛痢惡瘡癬毒收口去翳明目調經安胎中枯而飄者瀉肺火消痰利氣除風溼留熱於肌表細實

而堅者瀉大腸火。養陰退陽。滋化源。除熱於膀胱。山茱萸。龍骨爲使。惡蔥實。畏丹砂。牡丹。藜蘆。沙參。丹參。○按芩枯飄者。有上升之象。故入肺。堅實者。有下行之理。故入大腸。諸經。性甚寒。苟無實火。不宜用之。

黃連味苦。性寒無毒。入心經。主心火炎。目疾暴發。瘡瘍紅腫。腸紅下痢。瘡滿泄瀉。小兒疳熱。消口中瘡。驚悸煩躁。天行熱疾。黃芩。龍骨。連翹。滑石爲使。惡菊花。羌花。玄參。白蘚。白殭蠶。畏款冬花。解巴豆。烏頭毒。忌猪肉。冷水。○按黃連味苦。瀉心。治心火諸病。不可缺。瀉痢雖屬脾經。正由心火不能生土。况心與小腸相爲表裏。心火瀉則小便亦利。而腸胃自厚矣。因寒得瀉者。忌之。又久病氣虛。心火不感者。用之。則愈虛。虛火反熾。

【雷公云】

凡使以布拭去黏毛。然後用漿水浸二伏時。漉出於柳木火中焙乾。用若膠。此藥得十兩。不得食猪肉。若服至三年。一生不得食猪肉也。

大黃味苦。性大寒無毒。入脾胃大腸心肝五經。性沉而不浮。用走而不守。奪土鬱而無壅滯。定禍亂而致太平。名曰將軍。又主癰腫。及目疾。痢疾。暴發。血瘀。火閉。推陳致新。黃芩爲使。無所畏。錦紋者佳。○按大黃之入脾胃大腸。人所解也。其入心與肝也。人多不究。昔仲景百勞丸。廬黃丸。都用大黃。以理勞傷。吐衄。意最深微。蓋以濁陰不降。則清陽不升者。天地之道也。瘀血不去。則新血不生者。人身之道也。

也。蒸熱日久。瘀血停於經絡。必得大黃以豁之。則肝脾通暢。陳推而新致矣。今之治勞。多用滋陰數服不效。坐而待斃。嗟乎。術豈止此耶。至癰腫目疾及痢疾。或熱瘀所致。故並治之。傷寒脈弱。及風寒未解者。禁用。

【雷公云云】

凡使細切。內放如水。旋煎緊重。從已至未。晒乾。又瀝水。蒸從未至亥。如此蒸七度。曬乾。却瀝薄。澆水再蒸。一伏時。其大黃管如烏膏。樣。子日曬乾。用之為妙。

桔梗味辛。性微溫。有小毒。入肺經。主肺熱氣奔。痰嗽鼻塞。清喉利膈。能載諸藥入肺。節皮為使。畏白芨。龍眼。龍膽草。○按桔梗味辛。故專療肺疾。下部藥中勿用。恐其上載而不能下達也。

【雷公云云】

凡使勿用本梗。真似桔梗。咬之。只是膠。嚼不堪用。凡使去頭尖。硬二三分。已來。並兩畔附枝子。於槐砧上。細剉。用百合水。浸一伏時。流出。緩火。熬令乾。用每修事四兩。用生百

合五分。搗作膏。投水中。浸。

天花粉味苦。性寒無毒。入肺心脾胃小腸五經。主肺火盛而喉痺。脾胃火盛而口齒腫痛。清心利小便。消痰除咳嗽。排膿消腫。生肌長肉。止渴退煩。熟補虛。通月經。枸杞為使。惡乾薑。畏牛膝。乾漆。反烏頭。○按天花粉。色白入肺。味苦入心脾胃者。心之子。肺之母也。小腸與心相為表裏。故均入焉。本功清熱。故主療頗多。其理易達。惟曰補虛通經。此甚不可泥也。夫苦寒之劑。豈能大補。以其能清火。則陰得其養。非真補也。月水不通。亦以熱閉。熱退則血盛。經通非真能通也。此治本窮源。

之說耳。倘因寒致疾者，可誤使哉。子名瓜蒌，主胸痺，仁主潤肺，下氣止痰嗽，療乳癰乳閉，並宜炒用。

半夏味辛平，性生寒，熟溫，有毒。入肺脾胃三經。下氣止嘔吐，開鬱散表邪，除溼化痰涎。大和脾胃，須湯淋十遍。姜礬甘草製用。射干柴胡爲使。惡皂莢，畏雄黃生薑。乾姜秦皮龜甲反。烏頭忌。羊肉羊血飴糖海參。○按半夏味辛入肺，性燥入脾胃，中其毒者，口噤發吐，煩渴及血證，勿用。惟氣證發渴者不禁。

【雷公云】

凡使勿用白傍發子，真似半夏，只是咬著，誤微酸不入藥用。若修事半夏，四兩用搗了白芥子末二兩，頭醋六兩二味，攪令潤，將半夏數中洗三遍，用之。半夏上有陳涼，若洗

不淨，令人氣逆，肝氣怒滿。

紫蘇味甘辛，性溫無毒。入肺脾二經。葉能發汗散表，溫胃和中，除頭痛肢節痛。雙面紫者佳，不敢用麻黃者，以此代之。梗能順氣安胎。子能開鬱下氣，定喘消痰。○按辛走肺，甘走脾，辛散之劑，下氣最捷。氣虛者少用之。

白芷味辛，性溫無毒。入肺脾胃三經。去頭面皮膚之風，除肌肉燥癢之痺。止陽明頭痛之邪，爲肺部引經之劑。主排膿托瘡，生肌長肉，通經利竅，止漏除崩，明目散風，驅寒燥溼。當歸爲使，惡旋覆花。○按白芷味辛，爲肺所喜，而溫燥爲脾胃所喜，宜其入矣。然香燥而發散，主治雖多，能傷氣血，不宜多用久用。

【雷公云】

凡採得後勿用細條低處生者此名張公藤葉勿用馬蘭並不入藥中採得後刮削去皮細對用黃精亦細對用竹刀切二味等分兩度蒸一伏時候出於日曬乾去黃精用

之

防風味辛甘。性溫無毒。入肺經。瀉肺金。療諸風。開結氣。理目痛。惡乾姜。藜蘆白。欬羌花。解附子毒。○按防風辛走肺。為升陽之劑。故通療諸風。氣之結者。肺之疾也。目之痛者。風之患也。宜並主之。東垣云。卑賤之卒。聽令而行。隨所引而至。乃風藥中潤劑也。能瀉上焦。元風虛者。不得概用。今人類犯此弊。

獨活味苦甘辛。性微溫無毒。入肺腎二經。主新舊諸風。溼痺。頸項難伸。腰背痠疼。四肢攣痠。黃色而作塊者。為獨活。○按獨活氣濁屬陰。善行血分。斂而能舒。沉而能升。緩而善搜。可助表虛。故入太陰肺少陰腎。以理伏風。

羌活味苦甘平。性微溫無毒。入小腸膀胱二經。散在表風邪。利周身節痛。排巨陽腐肉之疽。除新舊風溼之證。紫色而節密者。為羌活。○按羌活氣清屬陽。善行氣分。舒而不斂。升而不沉。雄而善散。可發表邪。故入手太陽小腸足太陽膀胱。以理遊風。其功用與獨活雖若不同。寔互相表裏。用者審之。

【雷公云】

採得後細剉碎。淫羊藿蒸二日。後曬乾。去淫羊藿。用芫蕪人心。

柴胡味苦。性微寒無毒。入肝胆心包絡三焦胃大腸六經。主傷寒心中煩熱。痰

實腸胃中結氣積聚寒熱邪氣兩脇下痛疏通肝木推陳致新半夏爲使惡皂莢畏女菀藜蘆犯火無效○按柴胡氣味升陽能提下元清氣上行以瀉三焦火補中益氣湯用之亦以其能提肝氣之陷者由左而升也凡胸腹腸胃之病因熱所致者得柴胡引清去濁而病謝矣故入肝胆諸經衍義曰本經並無一字言及治勞今治勞多用之誤人不小勞有一種真臟虛損復受邪熱邪因虛而致勞者宜用後世得此數言凡遇勞證概不敢用此所謂侏儒觀場隨衆喧喝矣惟勞證不犯實熱者用之亦能殺人誠所當慎咳嗽氣急痰喘嘔逆者禁用以其上升也傷寒初起忌之恐引邪入少陽經也

【雷公云】

凡使莖長軟皮赤黃莖出在平川平野即今銀州銀縣也西時生處多有白粉綠葉於此翔處是柴胡香直上雲間若有過往聞者皆氣爽凡採得後去莖並頭用銀刀削

去赤薄皮少許却以粗布拭淨細用之勿令犯火立便無效也

註云

柴胡乃少陽經藥也久服令人肝胆平

前胡味苦甘辛性微溫無毒人肺肝脾膀胱四經主傷寒痰嗽痞滿心腹結氣解熱開胃推陳致新亦止兒夜啼佐使畏惡同柴胡○按前胡辛可暢肺以解風寒甘可悅脾以理胸腹苦能洩厥陰之火溫能散太陽之邪

【雷公云】

凡使勿用野蒿根緣真似前胡只是味稍酸若誤用令人反胃不受食若是前胡味甘氣香凡修事先用刀刮去蒼黑皮並莖細切用水浸令潤於日中曬乾用之

香附味甘辛。性溫無毒。入肺肝脾胃四經。疏氣開鬱。消風除癢。便醋製用。○按香附味甘辛。故主發散疏通。以入肺肝脾胃。類稱女科聖藥者。蓋以婦人心性偏熱。多氣多鬱。血因氣鬱。則不能生耳。不知惟氣實而血不大虛者宜之。不然。損其氣。燥其血。愈致其疾。惜乎未有發明。而俗多受女科聖藥一句之累矣。性燥。故便製以潤之。性散。故醋製以斂之。

麻黃味甘苦。性溫無毒。入肺心大腸膀胱四經。主散在表寒邪。通九竅。開毛孔。破癥結。除積聚。去根節者。大能發汗。根節能斂汗。厚朴爲使。惡辛夷。石葦。陳久者良。○按麻黃專主發散。宜入肺部。出汗開氣。宜入心。與大腸膀胱。此驍悍之劑也。可治冬月春間傷寒。瘟疫。夏秋不可輕用。惟在表真有寒邪者可用。或無寒邪。或寒邪在裏。或表虛之人。或陰虛發熱。或傷風有汗。或傷食等證。雖發熱惡寒。其不頭疼身疼而拘急。六脈不浮緊者。皆不可用。雖可汗之證。不宜多服。蓋汗乃心之液。若不可汗而汗。與可汗而過汗。則心血爲之動矣。或至亡陽。或至衄血不止。而成大患。丹溪以麻黃人參同用。亦攻補之法也。醫者宜知之。

【雷公云】

凡使去節並味若不盡服之令人悶用銅刀剪去節並頭攪碎
上用銅刀細剉三四十餘竹片掠去上除盡澆出蒸乾用

葛根味甘。性平無毒。入胃大腸二經。發傷寒之表邪。止胃虛之消渴。解中酒之

奇毒。治往來之溫瘧。解野葛巴豆丹石百藥毒。○按葛根療熱解表。故入手足陽明也。太陽初病未入陽明而頭痛者。不可便服以發之。恐引賊入家也。又表虛多汗者禁用。

麥門冬味甘。性平微寒無毒。入肺心二經。退肺中隱伏之火。生肺中不足之金。止消渴。陰得其養。補虛勞。熱不能侵。去心用地黃車前為使。惡款冬苦瓠。畏苦參青蘘。忌鯽魚肥大者佳。○按麥門冬。陽中微陰。夫陽乃肺藥。微陰則去肺中伏火。伏火去則肺金安而能生水。水盛則能清心而安神矣。故能治血妄行。調經和脈。天門冬味苦甘。性寒無毒。入肺腎二經。保肺氣不被熱擾。定喘促。陡得康寧。止消渴。利小便。強骨髓。悅顏色。殺三蟲。去伏戶。去心用地黃貝母垣衣為使。畏曾青。忌鯉魚。○按天門冬氣薄主升。故入肺。味厚為陰。故入腎。虛熱者宣之。虛寒者忌用。

【雷公云】

採得了去上放一重便劈破去心用柳木或燒柳木柴蒸一伏時酒酒令通更添火蒸出曝去地一尺已來作小架上籠天門冬將蒸了天門冬酒令乾用

五味子皮肉味甘酸。核中苦辛。且都有鹹味。五味俱備。故名。性溫無毒。入肺腎二經。滋腎經不足之水。收肺氣耗散之金。除煩熱。生津止渴。補虛勞。益氣強陰。菴蓉為使。惡萎蕤。勝烏頭。北產者良。○按五味屬水。而有木火土金。故雖入肺腎。而

五臟咸補。乃生津之要藥。收斂之妙劑。然多食反致虛熱。蓋以收補之驟也。如火嗽。輒用寒涼。恐致相激。須用此酸斂以降之。亦宜少用。肺火鬱及寒邪初起者。禁用小兒尤甚。以酸能釣痰引嗽也。

【雷公云】

凡小類皮也。也者有白撰鹽類一重其味酸鹹苦辛甘味全者真也。凡用以銅刀劈作兩片用蜜浸蒸從巳至申卻以漿水浸一宿焙乾用之。

升麻味甘苦。性微寒。無毒。入大腸脾胃肺四經。引葱白散手陽明之風邪。引石膏止足陽明之齒痛。引諸藥遊行四經。升陽氣於至陰之下。故名升麻。又主解百毒。殺精物。辟瘟疫。除蠱毒。止瀉痢。白芷為使。形輕而堅實。青綠色者佳。○按升麻主提氣解肌。故入此四經。然係奉命之使。不能益人。若下元不足者。用此升之。則下虛而元氣益虧矣。藥性乃曰元氣不足者。用此於陰中升陽。恐非是。惟陽氣有餘而下陷者。宜之。若初病太陽證。便服升麻。以發陽明之汗。是引賊入門。亦非所宜也。

【雷公云】

採得後用刀刮去粗皮一重。用黃精自然汁浸一宿。漉出曬乾。細磨蒸了。曬乾後用之。佳。

藁本味苦辛。性微溫。無毒。入小腸膀胱二經。主寒氣客於巨陽之經。若頭痛流於巔頂之上。又主婦人疝瘕。陰中寒腫痛。腹中急疼。惡藺茹。畏青箱子。○按藁本上行治風。故理太陽頭痛。下行治溼。故婦人諸證風濕俱治。功用雖匹。尤長於風。

耳。

細辛味辛性溫無毒入心肝胆脾四經止少陰合病之頭痛散三陽數變之風邪主肢節拘攣風寒溼痺溫中氣散死肌破結氣消痰嗽止目淚療牙疼治口臭利水道除喉痺通血閉獨活會青棗根爲使惡狼毒山茱萸黃耆畏硝石滑石反藜蘆忌生菜狸肉華陰者良○按細辛辛溫宜入心肝等經以療在裏之風邪其氣升陽故上部多功然諸證犯寒者可用若因火熱屬陽證者忌之單服末不可過半錢多則氣塞不通而死。

【雷公云】

凡使一一揀雙葉服之害人須去頭上田瓜水浸一宿至明漉出曬乾用

連翹味苦性微寒無毒入心肝胆胃三焦大腸六經瀉六經之血熱散諸腫之瘡瘍利小腸殺白蟲通月經療五淋破癭瘤解痘毒鼠粘子爲使○按連翹苦寒雖瀉六經而心經爲最諸瘡淋閉等證俱屬心火故能療之藥性曰除六經熱與柴胡同功然此治血熱柴胡治氣熱之別耳。

澤瀉味甘鹹性寒無毒入膀胱腎三焦小腸四經主去胞垢退陰汗治小便淋瀝仙藥療水病濕腫靈丹畏海蛤文蛤色白者佳○按澤瀉下降爲陰專主滲洩宜入膀胱諸經其行水之功過於猪苓衍義曰小便既多腎氣焉得復實扁鵲曰

多服病人眼。藥性曰。令人面光無子。乃本草稱其補虛明目。治洩精消渴。珍珠囊註其生新水。止虛煩。恐無是理。卽六味丸中用之。以其滲去脾濕。退命門火爲向導爾。又藥性賦云。補陰不足。蓋以補陰之功不足也。後世不察。謂其可以補陰分之不足。大失本旨。

【扁鵲云】

多服病人眼一名水瀉一名及瀉一名苦字一名鶴鷄生汝南汝澤五月八日採根陰乾

實味甘無毒。主風痺消渴。益腎氣。強陰補不足。除邪濕。久服面生光。令人無子。

九月採。

【雷公云】

不拘多少細剉酒浸一宿漉出曝乾任用也

葉味鹹無毒。主大風。乳汁不出。產難。強陰氣。五月採。

玄胡索味苦辛。性溫無毒。入心肺脾胃四經。活精血。療產後之疾。調月水。主胎前之證。一切因血作痛之證。並治酒炒行血。醋炒止血。生用破血。炒用調血。○按玄胡索可升可降。爲陰中之陽。故能行上下四經。此理血之劑也。苟非血證。用之無益。

地榆味苦微甘。性微寒無毒。入大腸肝二經。主下部積熱之血痢。止下焦不禁之月經。又主金瘡。除惡肉。崩中帶下。得髮良。惡麥門冬。○按地榆沉寒屬陰。專入

肝腸以理下焦血證有熱者宜之若虛寒下陷血衰泄瀉者勿用。

防已味辛苦性平溫無毒入十二經尤善腰以下至足溼熱腫感癢中風手脚攣急口眼喎斜疥癬蟲瘡止嗽消痰利大小便去留熱垣衣爲使惡細辛葶藶殺雄黃毒○按防已爲陽中之陰於經絡無所不入又主降故下部多功象之於人則險而健者也用之當則可展其能不當而反階之禍惟十經真有溼熱壅塞及膀胱積熱下疝脚氣此誠要藥無可代者然臭味拂人妄服之令人減食其不可用有四若飲食勞倦元氣旣虧而以防已洩大便則重亡其血一也發渴引飲熱在肺經氣分而防已乃下焦血藥二也外傷風寒邪傳肺部以至小便黃赤不通此上焦氣分禁忌血藥三也久病之後津液不行此上焦虛渴宜補宜甘溫若用苦寒之劑則速其危四也分木漢二種卽根苗爲名漢主水氣木主風氣爲少異耳。

【雷公云】

凡使勿使水條以其水防已黃蘗皮紙上有了足子不堪用夫使防已要心
花大黃色者佳細對車前根相對同蒸半日後出曝車前草去之細剉用

常山味苦辛性微寒有毒入肝經最開結痰專理瘧疾毒令人吐惡葱菘菜及醋苗名蜀漆雞骨者良○按丹溪云常山屬金宜伐肝邪然其性酷下咽令人大吐傷損脾胃惟精壯與痰實者宜之老人小兒及虛弱久病勿用。

【雷公云】

凡使春使莖葉夏秋多用根用酒浸一宿至明
漉出日乾蒸搗炒用勿令老人久病服之大忌

草龍胆味苦澀性寒無毒入肝胆腎膀胱四經退肝經之邪熱除下焦之溼腫
明目定驚治疳止痢能殺疳蟲小豆貫衆爲使惡防葵地黃○按圖經龍胆秋令
開花冬間結實屬金與水金能制木水入腎家胆與膀胱乃肝腎同部之腑也故
均入焉夫目得肝血而能視肝得腎水而後生今益腎清肝目之受明所自來矣
驚疳疰痢皆肝胆證也何弗治耶

【雷公云】

採得後陰乾欲用時用錐刀切去鬚上頭判了甘草湯
中浸一宿至明漉出晒乾用勿空服食之令人瀉不禁

玄參味苦鹹性微寒無毒入心肺腎三經主腹中寒熱積聚女子乳癰諸疾補
腎氣除心煩明眼目理頭風療咽喉消癭瘤散癰腫解熱毒惡黃耆乾姜大棗山
茱萸反藜蘆勿犯銅器餌之噎喉損目○按玄參氣輕清而苦故能入心肺以清
上焦之火體重濁而鹹故能入腎部以滋少陰之火所以積聚等證靡不療之

【雷公云】

凡採得須用蒲草重重相隔入煎蒸兩伏時後出曝乾使
用時勿令犯銅器餌之隨人疾損人目揀去蒲草用之

丹參味苦性微寒無毒入心經養神定志破結除癥消癰散腫排膿止痛生肌
長肉治風邪留熱眼赤狂悶骨節疼痛四肢不遂破宿血補新血安生胎落死胎
理婦人經脈不調血崩帶下○按丹參色赤屬火味苦而寒故入手少陽經以療

諸般血證。

苦參味辛性寒無毒。入胃大腸肝腎四經。主結氣積聚。伏熱黃胆。腸風燥渴。瀉有餘瀝。逐水消癰。明目止淚。去溼殺蟲。療大風。及一切風熱細疹。以糯米泔浸一宿。去浮面腥氣。曝用。玄參爲使。惡貝母。漏蘆。免絲子。反藜蘆。○按苦參屬木。有火性下降。下入少陰腎。又入手足陽明。及足厥陰經者。以其善主溼也。蓋溼勝則生熱。熱勝則生風。而結氣等證。從茲有矣。今以苦參燥溼。治其本也。東南卑溼。尤爲要藥。丹溪曰。能峻補陰氣。或得之而腰重者。以其氣降而不升。非傷腎也。

【雷公云】

凡使不計多少。先須用糯米泔浸一宿。上有溼穢氣。並在水面上浮去。須重重淘過。卽蒸。從巳至申。出曝乾。細出用之。

紅花味辛性溫無毒。入心肝二經。逐腹中惡血。而補血虛。除產後敗血。而止血。暈。療跌撲損傷。瘡毒腫脹。老人血少便結。女子經閉不行。催生下胎衣。及死胎。酒漬用。其苗生搗敷腫毒。其子吞數粒。主天行痘瘡不出。○按紅花下行血海。宜入足厥陰。而逐血。潔古云。苦溫爲陰中之陽。故又入手少陰。而補血。然長於行血。欲其補血。須少用。或佐補劑。

三稜味苦性平無毒。入肺脾二經。主行氣行血。多年癥癖。如石能消。爲水麵裏煨。醋炒用。○按三稜爲血中氣藥。脾裏血。肺主氣。宜並入焉。蓋血隨氣上。氣聚則

血下流。故主癥癖之患。非三稜不治。然有斬關之勢。虛人忌之。

蓬莪朮味苦辛。性溫無毒。入肺脾二經。開胃消食。破積聚。行瘀血。療心疼。除腹痛。利月經。主奔豚。定霍亂。下小兒食積。○按蓬莪朮與三稜相似。故經絡亦同。但氣中血藥為少。異耳。性亦猛厲。但能開氣。不能益氣。虛人禁之。乃大全謂氣短不能續者。亦宜用之。過矣。即大小七香丸。集香丸。都用以理氣。豈用以補氣乎。欲其先入血。則錯炒。欲其先入氣。則火炮。三稜亦然。

【雷公云】

凡使於炒盆中用醋搗令盡。然後於火畔吸令乾。重節過用之。

天麻味辛。性平無毒。入肝膀胱二經。療大人風熱眩暈。治小兒驚悸風癩。祛諸風。麻痺不仁。主癱瘓。語言不遂。利腰膝。強筋力。活血脈。通九竅。利周身。療癰腫。溼紙裏煨用。無畏忌。苗名赤箭。主用略同。○按天麻去風。故入厥陰。去溼。故入膀胱。真有風溼功效。若神。癰腫之證。溼生熱也。宜亦治之。赤箭用苗。有自表入裏之功。天麻用根。有自內達外之理。不宜同劑。反致無功。

【雷公云】

雷風草根。切勿使天麻。但只是葉。並不同。其雷風草根。並葉。皆自有青點。使雷風草根。切勿使天麻。二件誤用。即令人有腸結之患。修事天麻。十兩用葉。藜子一盤。

緩火熬煎。然後先安置天麻。十兩於甑中。只用火熬過。葉藜子。蓋內外再用三層紙。蓋并繫。從巳至未時。又出工疾子。再入熬炒。存前天麻瓶內。用砂藜疾子。於中依前蓋。又隔一伏時。取出。如此七遍。洗盛出。後用布拭上氣汗。用刀劈。焙之。細剉。單搗。若用雷風草。修事法。亦同。天麻一盤。

南星味苦辛。性平有毒。入脾肺二經。主中風牙關緊閉。痰盛麻痺。下氣破堅積。癰消腫。利胸膈。散血墮胎。搗敷疥癬瘡毒。並蛇蟲咬傷。沸水泡七次。以牛膽汁收其沫。入膽久懸。風處更佳。畏附子。乾薑。生薑。○按肺受風邪。脾多痰飲。南星專主風痰。故並入二經。味辛主散。所以消癰墮胎。及療疥癬等疾。大抵與半夏同功。但半夏辛而能守。南星辛而不守。其燥急之性。甚於半夏。故古方以牛膽苦寒之性。製其燥烈。且膽又有益肝鎮驚之功。小兒尤爲要藥。丹溪曰。南星欲其下行。以黃柏引之。

秦艽味苦辛。性微溫無毒。入胃大小腸三經。主骨蒸腸風。瀉血活筋。血利大小便。除風溼。療黃疸。解酒毒。去頭風。菖蒲爲使。羅紋者佳。○按秦艽苦則湧洩爲陰。故入大小腸。以療諸溼。辛則發散爲陽。故入陽明經。以療諸風。骨蒸之證。亦溼勝風溼所致。宜並理之。

【雷公云】

凡使秦艽。並非於脚文處認取。左文列爲秦。即治疾。右文爲艽。即發脚氣。凡用秦先以布拭去黃白毛。盡無後用。還元湯浸一宿。日曝乾用之。

遠志味苦。性溫無毒。入心腎二經。補不足。除邪氣。益智慧。明耳目。寧怔忡。定驚悸。利九竅。治健忘。壯陽道。益精氣。長肌肉。助筋骨。及婦人血禁失音。小兒驚風。客忤。皮膚熱。面目黃。久服悅顏色。延年。甘草湯泡去心。用得茯苓冬葵子龍骨良畏。

珍珠藜蘆蚌蠟齊蛤忌猪肉生葱冷水殺天雄附子毒葉名小草王夢洩○按遠志苦入心經溫能滋腎而不足等證咸本二經故都治之

【雷公云】

遠志凡使先須証去心若不去心服之令人悶去心了用熱甘草湯浸一宿取出晒乾用之

破故紙味辛苦性大溫無毒入腎經主五勞七傷陰虛精滑腰痛膝冷囊溼腎寒酒浸一宿水浸三日蒸用惡甘草忌羊肉羊血芸薑○按破故紙苦能堅腎且性大溫故專走少陰然氣燥不宜多用命門有火及津枯者忌之

葫蘆巴味苦性溫無毒入腎膀胱二經得桃仁大茴療膀胱疝氣得硫黃黑附理腎臟虛寒○按葫蘆巴雖入腎與膀胱致諸本經無佐使不能獨成功也

何首烏味苦甘瀉微溫無毒十二經絡所不收觀其藤夜交乃補陰之劑也消凜癩散癰腫治五痔止腸風烏鬚髮美容顏補勞瘦助精神長肌肉堅筋骨添精髓固腰膝除風濕明眼目及治婦人產後帶下諸血老年尤爲要藥久服令多子延年去粗皮酒浸拌黑豆末蒸之水中復加黑豆及酒曝乾九次爲度春夏採鮮者赤白合用兼補氣血茯苓爲使畏猪羊肉無鱗魚蘿蔔忌鐵器○按首烏大能補益全在蒸晒如法大者剖開其中有烏獸山嶽之形亦神物也傳云五十年如拳大號山奴服之一年髭鬚青黑百年如椀大號山哥服之一年顏色紅悅一百

五十年如益大號山伯服之一年齒落重生二百年如斗大號山翁服之一年顏如童子行及奔馬三百年如拷棗大號山精服之一年延齡益算純陽之體久服成仙邇來漸能用之惜未能如法製之耳

骨碎補味苦性溫無毒入腎經主折傷補骨碎去毒風疼痛固齒牙療蝕瘡殺諸蟲去毛細剝蜜拌蒸晒乾用○按骨碎補溫血而下行專入腎家以理骨病齒者骨之餘也故能固之又能殺蟲者蓋以蟲生於濕今能去毒風而蟲之巢穴搗矣豈能生耶

【雷公云】

能止諸雜痛

凡使採得後先用銅刀刮去上黃赤毛盡便細切用蜜拌令潤架柳紙曝一日後出乾用又乾驚記去云毛細切後用生蜜拌蒸從巳至亥照前曝乾搗一用泡猪腎空心

威靈仙味苦性溫無毒入十二經主諸風宣通五藏去腹內冷滯心胸痰水久積癥癖膀胱惡水腰膝冷疼兩足腫滿又療折傷忌麵及茶茗牛肉牛乳採時不聞流水聲鐵脚者佳○按威靈仙升可降爲陰中之陽故於經絡無所不入丹溪云屬水故於肝臟多功治痛風之要藥也其性好走多服疎人五臟眞氣然風注痛疼非此不除中病卽已不宜多用

牛膝味苦酸性平無毒入腎經補精氣利腰膝填骨髓除腦漏祛寒濕破血結

通月經墮胎孕。理膀胱氣化遲難。陰中作痛欲死。去蘆酒浸一宿用。惡龜甲螢火陸莢。畏白前白蘚皮。忌牛肉。○按丹溪云。牛膝引諸藥下行。宜入足少陰經。以理諸疾。婦人得之。應歸血海。故血有功。脾虛氣陷。及腿膝濕腫者。不宜用之。有二種。土牛膝所稟薄。故短而細。主破血氣。川牛膝所稟厚。故肥而長。主補精髓。竹木刺入肉。塗之可出。

【雷公云】

凡使去頭并塵土了用黃精自然汁浸一宿提出細焙乾用

黃精味甘。性平無毒。入肺脾二經。補中益氣。除風濕。安五臟。駐顏色。久服延年。○按黃精甘宜入脾。潤宜入肺。久服方得其益。實勝於根。花勝於實。但難辨耳。與鉤吻相似。然鉤吻有毛。鉤二個。誤服殺人。

【雷公云】

凡使勿用鉤吻。道似黃精。只是葉有毛。七子二個。是則認處。誤服害人。黃精葉似竹葉。凡採得。以溪水洗淨。後蒸。從巳至午。刀磨切。曬乾用。

蒲黃味苦。性平無毒。入肝經。生用則性滑。主行血。通經墮胎。消瘀排膿。利小便。祛心腹膀胱熱。炒用則性澀。主止血。除崩漏帶下。一切吐衄血痢血尿血腸下血。止精洩。定兒枕痛。忌見鐵器。宜隔紙焙黃。蒸之再焙用。○按蒲黃主血。而肝藏血。故獨入焉。仙經用之。亦以多功於血耳。

【雷公云】

凡使勿用松黃。並黃蒿。其二件全似。只是味異。凡欲使蒲黃。須隔三重紙焙。令色黃。蒸半日。卻焙令乾。用之妙。

續斷味苦辛性溫無毒入肝腎二經主傷寒不足折傷金瘡諸癰腫治漏尿血益氣力續筋骨散諸血煖子宮療腰痛縮小便止夢泄利關節調血和血生肌止痛酒浸一宿焙乾用地黃爲使惡雷丸○按腎主骨而藏精肝主筋而藏血續斷補精血而理筋骨宜入此二經矣胎產之證尤爲要藥

【雷公云】

凡使勿用草毒利真似蠶斷者誤服之令人筋軟深得後微切剉之又去向裏硬筋了用酒浸一伏時焙乾用

益母草味辛甘性微寒無毒入諸陰經主行血養血安胎利產消浮腫惡毒疔瘡治頭風血虛目疾癰疹發癢堪作浴湯子名充蔚益精明目除水氣療血逆大熱頭痛心煩下腹中死胎理產後血脹○按益母本功治血故入諸陰之經行血而不傷新血養血而不滯瘀血所以爲胎產聖藥又能消瘡腫者取其行血而且辛甘發散也

肉蓯蓉味甘酸鹹性微溫無毒入命門經興陽道益精髓補勞傷強筋骨主男子精泄尿血瀉有遺瀝女子癥痛崩帶官寒不孕酒浸一宿去浮甲劈破中心去白膜蒸半日酥灸用潤而肥大者佳○按蓯蓉性溫爲濁中之濁故入命門而補火惟尺脈弱者宜之相火旺者忌用多服令人大便滑

【雷公云】

凡使先須清酒浸一宿至明以板刷上去沙土淨甲盡劈破中心去白膜一重如竹絲草樣是此偏隔人心前氣不散令人上氣不出凡使先用酒浸並刷淨蒸卻從午至酉

出又用
酥炙佳

鎖陽味甘鹹。性溫無毒。入腎經補陰虛。固精髓。潤大便燥結。宜酥炙用。○按鎖陽鹹溫。宜入少陰。本經不載。丹溪續補。以其固精。故有鎖陽之名。主用與菘蓉相似。老人枯閉。最為要藥。大便不實者忌之。

車前子味甘。性寒無毒。入肝膀胱小腸三經。主淋瀝癰閉。陰莖腫痛。溼瘡泄瀉。赤白帶濁。血閉產難。炒細研用。常山為使。根葉主金瘡。功用同子。○按車前子利水。宜人足太陽。行血。宜入足厥陰。然逐水之劑。多損於目。本草云。明目者。以其清肝熱。如釜底抽薪。非因洩水之功也。

紫菀味苦辛。性溫無毒。入心肺二經。主咳逆上氣。痰喘吐衄。補虛勞。安五臟。水洗淨。蜜炙用。款冬為使。惡天雄瞿麥雷丸。遠志畏茵陳蒿。紫色潤軟者佳。○按紫菀苦能入心。而泄上炎之火。辛能入肺。而散結滯之氣。行氣養血。專治血痰。為血癆要藥。

【雷公云】

凡使先去莖。有白綠。色者。號曰羊鬚草。自然不同。採得後。去頭上了。用東流水淘洗。令淨。用密袋一宿。至明。於火上焙乾。用。凡修治。一兩用蜜二分。

百部味甘苦。性微寒。有小毒。入肺經。主肺熱咳逆。傳屍骨蒸。殺疔蝨。寸白蟲。及虱。竹刀劈開。去心。酒浸用。○按百部專療咳嗽。宜入肺經。而小毒故能殺蟲也。

【雷公云】

凡採得後用竹刀劈破去心皮花作數十於簷下懸令風吹後乾却用酒浸一宿漉出焙乾細細用或一顆有八十二條者號曰地仙苗若修事願之壽長

百合味甘性平無毒入心肺大小腸四經主鬼魅邪氣熱咳吐血潤肺甯心定驚益志攻發背消癰腫除脹滿利二便○按百合性潤故入心肺諸經雖能補益亦傷肺氣故不宜多服

款冬花味苦辛性溫無毒入心肺二經主中風喉痺肺痿肺癰潤心肺止咳嗽除痰喘定驚悸洗肝明目杏仁為使得紫菀良惡皂莢硝石玄參畏貝母辛夷麻黃黃耆黃芩黃連青箱○按款冬辛甘發散為陽故入心肺以理痰嗽諸證畏惡甚多用者慎之

【雷公云】

凡採得須去向外裏花蕊殼並向裏質如粟零殼者並殼葉以甘草水浸一宿却取款冬葉相拌過一夜曬乾去葉用

馬兜鈴味苦性寒無毒入肺經主清肺除咳嗽痰喘治血痔漏瘡根名青木香下毒甚速○按馬兜鈴專主手太陰經矣何以治痔漏之證也良以肺與大腸相為表裏肺移熱於大腸故有此證今清其表而裏病自愈矣

【雷公云】

凡使採得後去葉并莖用生絹袋盛於草屋角畔懸令乾劈作片去腸膜取淨子用

青黛味苦甘性寒無毒入肝脾二經除鬱火解熱毒止下痢殺諸蟲治小兒疳蟲消瘦驚癇邪氣唇焦口渴上膈稠痰療傷寒赤斑面黃鼻赤○按青黛色青屬

木味甘屬土宜入厥陰太陰以理諸熱之症

甘菊味甘微苦性平無毒入肺脾肝腎四經能補陰氣明目聰耳清頭風及胸中煩熱肌膚濕痺枸杞根桑白皮蒼白朮為使○按丹溪曰菊花屬金而有土與水大能補陰宜入肺肝等經蓋煩熱諸證皆由水不足而火炎得此補陰則水感而火自熄矣須用味甘者佳若苦者為苦蕒大傷胃氣慎之

蕒苡仁味甘微寒無毒入肺脾肝胃大腸五經利腸胃消水腫祛風濕療脚氣治肺痿健脾胃○按蕒苡仁總理濕熱故入上下五經蓋受熱使人筋攣受濕使人筋緩者可用若受寒使人筋急者忌之勢力和緩須多用見效

【雷公云】

凡使勿用穢米類大無味其穢米時人呼為梗穢是也若蕒苡仁類小色青味甘或著粘人齒用一兩以糯米一兩同蒸令糯米熟去米取使若更以鹽湯煎之別是一般修

專

牡丹皮味辛苦性微溫無毒入肝經治一切冷熱氣血凝滯吐衄血瘀積血跌撲傷血產後惡血通月經除風痺催產難畏兔絲子忌蒜○按丹皮主用無非辛溫之功禹錫等言其治冷當矣本草曰性寒不亦誤耶夫肝為血舍丹皮乃血劑固宜入之本功專行血不能補血而東垣以此治無汗骨蒸六味丸及補心丹皆用之蓋以血患火爍則枯患氣鬱則新者不生此劑苦能瀉陰火辛能疏結氣故

為血分要藥。

【雷公云】

凡採後候日乾用錐刀劈破去骨細剉如大豆許用清酒浸蒸從巳至未出日曝乾用

兔絲子味甘辛。性平無毒。入腎經。主男子腎虛精寒。腰膝冷痛。莖中寒精自出。凝有餘瀝。鬼交泄精。久服強陰堅骨。駐顏明目。輕身令人多子。酒浸五宿蒸熟。杵作餅。曬乾研用。山藥松脂為使。惡霍菌。○按雷公云。兔絲子稟受中和。凝正陽氣。故宜入補少陰。溫而不燥。不助相火。至和至美之劑。宜常用之。

【雷公云】

凡使勿用天碧草子。其樣真相似。只是天碧草子味酸澀。并不入藥。用其兔絲子。粟中和正陽之氣。所給補人。衛氣助。人筋脈。得去粗蕪。取用。苦酒浸二日。漉出。用黃糖。并二千餘成粉。并黃糖。自然汁。與兔絲子相對用之。

自然汁。浸一宿。至明。微用火煎。至乾。天日中。熱。燒。盡。

茴香味辛甘。性溫無毒。入心脾膀胱三經。主一切臭氣。腎臟虛寒。癩疔腫痛。及蛇傷。調中止嘔。下氣寬胸。又有一種小茴。氣味稍薄。然治膀胱冷痛。疝氣尤奇。○按茴香氣厚。為陽中之陽。故入少陰。太陰。太陽。以理虛寒。諸證。雖辛溫快脾。亦能耗氣。今內相都入煎。燻油膩之物。與火無異。久則致疾。深宜戒之。

砂仁味辛。性溫無毒。入脾胃肺大小腸膀胱腎七經。主虛寒瀉痢。宿食不消。腹痛心疼。咳嗽腹滿。奔豚。霍亂轉筋。祛冷逐痰。安冷止吐。下氣化酒。食炒去衣。研用。○按砂仁為行散之劑。故人脾胃諸經。性溫而不傷於熱。行氣而不傷於剋。太陰

經要劑也。宜常用之。

白豆蔻味辛。性溫無毒。入肺脾胃三經。主消寒痰。下滯氣。退目中翳。止嘔吐。開胃進食。除冷瀉痢。及腹痛心疼。炒去衣。研用。白而圓滿者佳。○按白豆蔻辛宜入肺。溫為脾胃所喜。故併入之。大抵辛散之劑。不能補益。藥性稱其補上焦元氣。恐無是理。但不甚刻削耳。世俗不察而信之。誤人不小。治寒氣神效。肺胃中有火及虛者忌之。

肉豆蔻味苦辛。性溫無毒。入肺胃二經。療心腹脹痛。卒成霍亂。脾胃寒弱。宿食不消。虛冷瀉痢。小兒傷乳吐瀉。尤為要藥。糯米粉裹煨。忌見鐵器。○按肉豆蔻即肉菓。辛溫之性。宜入脾胃。有未去之積者。不可先用。

【雷公云】

凡使須以糯米作粉。使蒸湯。揲裹豆蔻子。鹽灰中炮。待米團子焦黃。熱然後出去米。其中有子。取用。勿令犯銅。

草豆蔻味辛。性熱無毒。入脾胃二經。主風寒客邪在胃。其餘與白者同功。而性尤燥急。不及白蔻有清高之氣。○按草蔻性溫發散。故入脾胃。而主風寒。多食大損脾胃。衍義謂其虛弱不食者宜此。恐非。胃火者大忌。

【雷公云】

凡使須去蒂。并向裏子。後取皮。用茱萸同于鍋上。緩炒。待茱萸微黃。黑即去。茱萸取草豆蔻皮及子。并用之。

草果味辛。性溫無毒。入脾胃二經。主瘧疾。胸腹結滯。嘔吐。胃經風邪。○按草果

辛溫發散。與草薺同功。故經絡亦同。多食亦損脾胃。虛弱及胃火者亦忌之。

菖蒲味辛。性溫無毒。入心脾膀胱三經。主風寒溼痺。效逆上氣。鬼疰邪氣。通九竅。明耳目。堅牙齒。清聲音。益心志。除健忘。止霍亂。開煩悶。溫心腹。殺諸蟲。療惡瘡。疥癬。勿犯鐵器。去根毛用。秦皮秦艸爲使。惡地膽麻黃。忌羊肉羊血飴糖。生石上一寸九節者佳。○按菖蒲通神明。宜入心經。祛風溼。宜入肺與膀胱。功驗雖宏。然主散而不主收。勿宜久用。

【雷公云】

凡使勿用泥。菖夏菖其一件相似。如竹根。癭形。黑氣。穢味。腥。不堪用。凡使採石上生者。根條嫩黃。繁硬。節細長一寸有九節者是。真也。採得後用銅刀刮去黃黑硬節皮。一重

用嫩葉。枝條。相拌。蒸出。濕乾。去柔條。燥用。

黑附子味辛甘。性大熱。有大毒。通行諸經。主六腑沉寒。三陽厥逆。癥堅積聚。寒溼拘攣。霍亂轉筋。足膝無力。墮胎甚速。擇每隻重一兩者。去皮臍。以薑汁臠水煮數沸。又用黃連甘草童便合煮一時。於平地上掘坑埋一宿。取出。晒乾。曝乾。用地膽爲使。惡蜈蚣。畏人參甘草黃耆防風黑豆。按附子爲陽中之陽。其性浮而不沉。其用走而不息。故於經絡靡所不入。宜致墮胎祛癥積等證者。辛甘大熱。能補命門衰敗之火。以生脾土。故仲景四逆湯用以回腎氣。理中湯用以補脾。入味丸用以補腎脾。譬如躁悍之將。善用之。奏功甚捷。不善用之。爲害非輕。丹溪以爲仲景

取其行地黃之滯而不能有補則古方用黑附一味可以回陽不補而能之乎丹溪之言於理未當雖然彼或鑿誤用之弊有激而發爾如法制之毒性盡去且令下行若痼冷陽脫但微炮之

天雄性味經絡功用與附子同主療頭面風去來疼痛遠志為使惡腐婢○按天雄即附子之長而尖巔頂不正者其氣親上故潔古云主上焦陽虛

烏頭性味經絡功用亦同附子主中風惡風洗淨出汗莽草為使惡藜蘆反半夏瓜薑貝母白蘂白芨○按烏頭即春間採附子之嫩小者一云原生苗腦

烏啄主男子腎溼陰癢癰腫使反性味功用同前○按烏啄即烏頭之有兩岐者如烏之啄故名

側子主發散四岐為風塵藥○按側子即附子傍出小顆其氣轉揚故主發散

【雷公云】

側子只是附子旁有小顆如棗核者是主用治風疹神妙也木鼈子只是諸家附子側烏中有患者謂曰木鼈子不入藥用若服之令人喪目

射干味苦性微溫有毒入肺肝脾三經主咳逆上氣咽喉諸證開胃進食鎮肝明目消癰毒逐瘀血通月經行積痰使結核自消又肝經溼氣因疲勞而發便毒者取三寸與生薑同煎服利兩三行效○按射干溫能下氣行血宜入肺肝若能消痰宜入脾經久服令人虛

【雷公云】

凡使先以米泔浸一宿漉出然後用
葶竹葉者從未至亥漉出日乾用之

旋覆花味鹹甘性温有小毒入肺肝大腸膀胱四經主結氣風氣脇下滿膈上
痰如膠漆利大腸逐水溼○按旋覆花專理風氣水溼而肝主風肺主氣膀胱大
腸主水溼故均入之丹溪曰走散之藥病人涉虛者不宜多服

【雷公云】

凡採得後去表殼蕊皮並蒂
子花蕊蒸從巳至午曬乾用

大戟味苦甘性大寒有毒入十二經主水脹蠱毒癥結腹滿急痛發汗利大小
腸通月經墮胎孕赤小豆為使惡山藥畏菖蒲蘆葦鼠屎反甘草芫花海藻○按
大戟陰中微陽逐十二經水能損真氣量虛實用之

【雷公云】

凡使勿用附生者若服令洩氣不禁即煎葶子湯解之採得
於糖砧上細切與海芋葉拌蒸從巳至申去芋葉膠乾用之

商陸味酸辛性寒有毒入脾膀胱小腸三經主水脹蠱毒疔瘰癧腫惡瘡墮胎
孕○按商陸專主逐水與大戟相似夫水之為病由於膀胱小腸不利而脾家之
所深惡者也故咸入之有赤白二種白者可服赤者有毒堪用貼腫誤服殺人

【雷公云】

凡使勿用赤葛緣相似其赤葛有消腎傷筋骨之毒故勿用商陸花白年多者仙人採
之作鑰可下酒也每修事先以鋸刀刮去粗皮小薄切以東流水浸二宿然後漉出架

煎蒸以黑豆葉一重與商陸一重如斯蒸從午至
亥取出去豆葉乾了細切用若無豆葉用豆代之

葶藶味辛苦性寒有小毒入肺心脾膀胱四經主水腫結氣膀胱留熱定肺氣

之喘促。療積飲之痰厥。同糯米焙黃。去米用。榆皮為使。惡蠶蠶燈草石龍芮。○按葶藶辛走肺。苦走心。膀胱者肺所縮也。脾土者心所生也。故皆入之。大傷肺氣。滲泄下元。用之不當。殺人甚捷。稍涉虛者忌之。有甜苦二種。苦者太猛劣。甜者性少緩。

【雷公云】

凡使勿用赤鬚子。真相似葶藶。只是味微甘。若葶藶子之苦。入頭。凡使以糯米相合。於焙上微微焙。待米熟。去米。單搗用。

牽牛子味苦辛。性寒有毒。入大小腸二經。主下氣。通二便。祛壅滯。氣急。退水腫。消風毒。治腰膝痛。墮胎孕。酒蒸。去皮用。○按牽牛子專主水氣。故入大小腸經。丹溪曰。屬火。善走。有兩種。黑者兼水。白者兼金。病形與證俱實者用之。然驅逐致虛。不脹滿。不大便秘者。勿用。仲景治七種溼證。及小便不利。俱不用之。可也。蓋受溼之根在下焦。是證水分中氣病。皆因上焦虛弱。不能氣化所致。若復用辛辣之劑。以瀉太陰之金。危亡至矣。可不謹乎。

【雷公云】

草金鬚牽牛子是也。凡使其藥。秋末。即有實。冬收之。凡用。曝乾。却入水中淘淨者。去之。取沉者。曝乾。用酒蒸。從巳至未。曝乾。臨用。春去黑皮用。

葶藶味苦甘。性平無毒。入脾腎膀胱三經。主風寒濕痺。腰背痛。中風不遂。遍身頑麻。膀胱宿水。陰痿失溺。利水道。益精明目。薏苡為使。畏葵根。大黃。柴胡。牡蠣。忌牛肉。○按葶藶之入三經。何也。蓋腎受土剋。則水臟既衰。肝挾相火。而凌土溼。脾

主肌肉溼鬱肌腠。則生熱生風。以致營衛不利。關節不利。而草薺長於去水。用之以溲溼脾。則土安其位。水不受侮矣。然失用令人小便多。小便既多。則腎氣安得復實。今多泥其入腎。用爲補劑。亦未深原其理耳。

木通味辛甘。性平無毒。入小腸經。主五淋。小便閉。經凝。乳閉。難產。積聚。驚悸。心煩。健忘。耳聾。聲啞。鼻塞。癰瘡。脾疸。喜睡。天行瘟疫。○按木通利便。專瀉小腸。宜療五淋等證。其驚悸等證。雖屬心經。而心與小腸相爲表裏。故並治之。脾胆喜睡。此脾之病。皆溼所釀也。利小腸而溼不去乎。瘟疫之來。感天地不正之氣。今受感之官行。而邪不能容。亦宜療矣。

通草味淡。性寒無毒。入肺大小腸三經。與木通同功。特瀉肺明目。退熱行經。下乳通結。力尤勝之。○按通草色白。宜其瀉肺。味淡。故入小腸。性主通行。故又入大腸。卽本草續註所謂通脫木。今女工用以作花。

燈心味淡。性寒無毒。入心小腸二經。主胸腹邪氣。清心定驚。除熱利水。燒灰敷金瘡。止血瘡。小兒夜啼。吹喉中。治急喉痺。其捷。○按燈心味淡。五臟無歸。而入小腸利水。訣曰。小腸受感。與心應。故又入心經。燒灰性涼。宜治療如右。

石斛味甘。性平無毒。入胃腎二經。補虛羸。煖水藏。填精髓。強筋骨。平胃氣。逐皮

膚邪熱。療脚膝冷痺。久服厚腸胃。定志除驚。去根酒浸一宿。曝乾酥炙用。陸英為使。惡寒水石巴豆。畏疆蠶雷丸。○按石斛入腎。則耑主下部矣。而又入胃者。蓋以其味甘。按助腎而不傷于熱。平胃而不傷于燥之故也。

【雷公云】

凡使先去頭上子用酒浸一宿。漉出曬乾。再用酥蒸從已至西卻徐徐焙乾然後用。

石葦味苦甘。性平無毒。入肺膀胱二經。主勞熱邪氣。五淋癰閉。膀胱熱滿。癰疽發背。除煩下氣。補虛益精。拭去毛。羊脂炒焦用。絡石杏仁為使。得菖蒲良。○按石葦清熱利水。本入膀胱。而肺則下連者也。宜兼入之。既能清熱利水。則無陽亢陰傷之患。

白蒺藜子味苦辛。性溫無毒。入肺肝腎三經。主惡血塊。癥結喉痺。產難乳閉。小兒頭瘡。皮膚風癢。頭痛欬逆。肺痿。除煩下氣。明眼目。去燥熱。療腫毒。止遺泄。其葉可作浴湯。治風癬。去刺酒蒸炒用。烏頭為使。沙苑蒺藜主補腎添精。強陰種子。○按蒺藜行血。宜入肝經。下氣宜入肺經。惡血等症。皆二經病也。故俱主之。其所以入腎者。因肺為之母。肝為之子。未有子母俱利。而腎不受其益者。故能止遺洩。產沙苑者。誠續嗣神丹。而本草不言。惜哉。

【雷公云】

凡使採得後。揀淨了。蒸從午至酉。出日曬乾。春令皮上刺盡用酒拌。再蒸一二時用。

青箱子味苦。性微寒。無毒。入心肝二經。主邪氣皮膚風熱溼瘡。殺三蟲疥蟲。惡瘡痔蝕。下部蠹瘡。鎮肝藏。堅骨筋。益腦髓。明目。一名草蒿。○按青箱子苦者丙丁之味也。青者甲乙之色也。故入心肝二經。本經並不言治眼。而藥性論及日華子皆言之。亦以苦寒之性。能清肝藏熱毒上衝耳。

【雷公云】

凡使懼誤用思葦子并鼠細子兩件類相似只是味不同其思葦子味粗煎之有涎

木賊味甘微苦。性平無毒。入肺經。主目疾。退翳膜。消積塊。益肝臟。得麝香牛角腮。治休息痢。久不瘥。得禹餘糧當歸芎藭。療崩中赤白。得槐鵝桑耳。療腸虛下血。得槐子枳實地榆。治腸澼及痔血。去節水潤焙用。○按木賊之名。以其能伐木也。肝爲木。故宜入焉。夫目得血而能視。藉之以伐肝邪。則血生而愈目矣。

茅根味甘。性寒無毒。入胃小腸二經。逐瘀血。通血閉。止吐衄。下五淋。利小便。理勞傷。補虛羸。除腸胃客熱。治婦人崩漏。○按茅根利水。本入小腸。而胃則其實受。故亦入之。

仙茅味辛。性溫有毒。入肝腎二經。主心腹冷氣。不能食。腰足攣痺。不能行。丈夫血損勞傷。老人失溺。無子。強陽道。補精血。明眼目。堅骨髓。洗淨去皮。銅刀切如豆。大生稀布袋盛。于烏豆水中浸一宿。酒拌蒸。半日晒乾。用勿犯鐵器。忌牛肉牛乳。

○按仙茅性溫。本入腎經。而肝者腎所生也。故兼入之。傳云。十斤乳石。不及一斤仙茅。蓋表其功爾。中其毒者。令人舌脹。急煎大黃朴硝湯飲之。復以末摻舌間。卽解。素有火症者勿用。

【雷公云】

凡採得後用清水洗令淨。刮去皮子。搗碎。上切豆許。大却用生絹布袋盛一宿。蒸用。

鬱金味辛苦。性溫無毒。入心肺二經。主下氣。破血開鬱。療尿血淋血金瘡。楚產蟬肚者佳。○按鬱金本草言其性寒。自藥性論始言其治冷氣。今觀其主療。都是辛散之用。性寒而能之乎。夫肺主氣。心主血。鬱金能行氣血。故兩入之。丹溪云。屬火而有土與水。古人得以治鬱遏不散者。故名。

薑黃味辛苦。性溫無毒。經絡主治。與鬱金同功。更烈。○按薑黃本草亦曰性寒。而陳藏器及日華子。咸謂其熱。辨之悉矣。能傷元氣。用者審之。

牛蒡子味辛。性溫無毒。入十二經。主風濕癢疹。盈肌。咽喉風熱不利。諸腫瘡瘍之潤。腰膝凝滯之氣。潤肺止咳。散氣消痰。酒拌蒸。待有白霜出。拭去。焙乾搗用。一名惡實。一名鼠黏子。○按主治祕訣。及東垣皆云。牛蒡子辛溫。故能入十二經。而通散也。潔古云。吞一枚。可出癰疽頭。亦表其辛散之功爾。本草言其性平。誤矣。

紫草味苦。性寒無毒。入心小腸二經。主心腹邪氣。脹滿作痛。癰腫諸毒。除五疸。

利九竅通水道。小兒血熱痘瘡尤爲要劑。取嫩草去髭用。○按紫草主血熱。本入心經。而小腸者受感而與心應者也。故并入之。邪氣諸症咸本于熱。今清其心而自愈矣。

【雷公云】

凡使先用礬水蒸之待乾取去頭并鬚。劉用每事紫草一斤用礬二兩燉化用。

白頭翁味苦性溫。有小毒。入心腎二經。主溫瘧發狂。癩瘕積聚。癰瘤凍瘕。金瘡鼻衄齒痛。腹痛骨疼。赤毒痢下。男子陰疝偏腫。小兒頭禿羶腥。豚實爲使得酒良。○按白頭翁味苦。本入心經。經曰腎欲堅。急食苦以堅之。故又入腎。溫瘧等症。無非水衰火旺。故治之。

白前味甘辛。性微溫無毒。入肺經。主下氣除嗽。氣寒呃上衝。不得睡臥。氣逆冲喉。呼吸欲絕。腹中時時作水雞聲。甘草水浸一宿。去頭鬚子。焙乾用。忌羊肉。○按白前色白味辛。故入肺經。尚主一切氣症。

白微味苦鹹。性大寒無毒。入心腎二經。主暴中風。身熱腹滿。忽忽不知人。狂惑鬼邪。寒熱酸疼。溫瘧洗洗發作。下水氣。利陰氣。定驚益精。以糯米泔浸一宿。去鬚細剉。蒸用。惡黃芪。大黃。大戟。乾姜。大棗。乾漆。山萸。○按白微味苦入心。鹹入腎。故主治如右。

白附子味甘辛。性溫無毒。入肺脾二經。主中風失音。一切冷風氣。頭面百病。斑點風瘡疥癬。心痛血痺。陰囊濕癢。入藥炮用。新羅出者佳。○按白附色白味辛。故宜入肺以治風痰。甘而且溫。故宜入脾以治皮膚。陽中之陽。能上升。故治面病。

蚤休味苦。微寒有毒。入心經。主驚癇癩疾。瘰癧。陰蝕。癰腫毒瘡。小兒胎風。手足抽掣。下三蟲。去蛇毒。一名紫河車。一名重樓金線。○按蚤休味苦。故入心經。以治驚癇等疾。而能解毒。

白蘚皮味苦鹹。性寒無毒。入肺小腸二經。主頭風黃疸。效逆。淋瀝濕痺。死肌。一切疥癩。惡風疥癬。楊梅諸瘡熱毒。天行時疾。頭疾眼疼。女子陰痛。小兒驚癇。利血脈。通九竅。利小腸。惡蟻蛸。桔梗。茯苓。草薺。○按白蘚皮入肺經。故能去風。入小腸。故能去濕。夫風濕既除。則血氣自活。而熱亦從此逝矣。

蘆薈味苦。性寒無毒。入心肝二經。消風烈。除煩悶。明眼目。治驚癇。煞三蟲。療五疳。及疥癬痔漏。諸瘡。解巴豆毒。○按蘆薈之苦。本入心經。而肝則其母也。故亦入之。在小兒驚疳諸熱。尤為重藥。

【雷公云】

凡使勿用雜家象其象。曬乾了。上有竹斑。光膩。和衆藥搗。此藥先搗成粉。

胡黃連味苦。性寒無毒。入心胆脾三經。主傷寒咳嗽。溫瘧發熱。骨蒸勞熱。三消

五痔補肝胆明眼目止瀉痢益顏色治小兒驚疳霍亂大人五心煩熱婦人骨蒸
虛驚惡菊花玄參白蘚皮忌猪解巴豆毒折之出塵如煙者真○按胡黃連苦寒
能瀉三經之火小兒多熱症最宜

澤蘭味苦性微溫無毒入小腸經通肝脾之血產前後百病皆治通九竅利關
脈又主頭風目痛鼻紅吐血治癰排膿防已爲之使○按澤蘭能通利小腸則肝
脾無壅闕之患故能通關竅以理血脈也行血而無推蕩之患養血而無膩滯之
虞所以爲產科聖藥凡癰瘡皆因血熱故亦治之

【雷公云】

要別識其形雖雜不同大澤蘭形葉皆圓
能生血益氣與藥合小澤蘭通利同用

狗脊味苦甘性微溫無毒入腎膀胱二經主腎氣虛弱風寒濕痺腰膝軟弱骨
節作痠老人矢瀉不節女子傷中淋露酒蒸用草薺爲使惡敗醬○按狗脊入腎
故主骨病入膀胱故主溼病

青蒿味苦性寒無毒入心經主骨蒸勞熱虛煩盜汗明目殺蟲重便浸七宿晒
乾用○按青蒿苦入心故瀉丙丁以理諸疾

萆撥味辛性大溫無毒入肺脾胃膀胱四經主溫中下氣消食開痰治陰疝止
霍亂除瀉痢日久療心腹冷痛醋浸一宿刮去皮粟子令淨方用○按萆撥辛走

肺家溫宜。脾胃膀胱肺經。故咸入之。

王不留行味苦甘。性平無毒。入心肝二經。主金瘡止血。癰疽毒瘡。心煩鼻衄。難產。出竹木刺入肉。治風毒。通血脈。酒蒸焙用。○按王不留行。治瘰癧血症。而心主血。肝藏血者也。故均入之。癰疽等症。血不和也。經曰。營氣不從。逆于肉理。乃生癰腫。此主和血固宜治之。又治風毒者。所謂治風先治血。血行風自滅也。

淫羊藿味辛。性溫無毒。入腎經。主絕陽不起。絕陰不育。莖中作痛。小便不利。益氣力。堅筋骨。丈夫久服。令人無子。每斤去花細剉。拌羊脂四兩。炒盡脂為度。山藥紫芝為使。得酒良。一名仙靈脾。○按仙靈脾入腎。而主絕陽等症。其為補也。明甚。乃繼之曰。久服無子。毋乃惑乎。不知此劑專助相火。令人淫慾不休。慾太甚。則精氣耗。經曰。因而強力。腎氣乃傷。高骨乃壞。且命門之火。乘水之衰。挾土來尅。生之不保。其能嗣耶。

【雷公云】

凡使先須時呼仙靈脾。須用夾刀夾去葉。枝盡後。細剉用羊脂相對拌炒。過然後用。

巴戟天味辛甘。性微溫無毒。入肺腎二經。主助腎添精。除一切風。及邪氣。酒浸用。覆盆為使。惡雷丸丹參。○按巴戟之溫。本專補腎。而肺乃腎之母也。且其味辛。故兼入之以療風。凡命門火旺。以致泄精者。忌之。

【雷公云】

凡使先用拘把子湯浸一宿待稍軟漉出酒浸一時又漉出用菊花同熬令焦黃用

蘭葉味甘性寒無毒入肺經止渴生津益氣散鬱○按丹溪云蘭葉稟金水之精故入肺臟昔東垣方中嘗用之經曰消諸瘴治之以蘭是也今屢驗之

水萍味辛酸性寒無毒入肺小腸二經消水腫利小便逐風寒堪浴遍身瘡癢發汗甚于麻黃○按水萍入肺故主祛風入小腸故主祛濕此是水中大萍非溝渠所生者高供奉採萍歌云不在山不在坎採我之時七月半逐甚癱風與緩風些小微風都不算豆淋酒下兩三丸鐵鑊頭兒都出汗以此觀之其功甚于麻黃可知矣

決明子味鹹苦甘性平無毒入肝經主青盲赤白翳膜時有泪出除肝熱療頭風研末塗腫毒貼腦止鼻紅者實爲使惡大麻子○按決明子入厥陰以除風熱故爲眼科要藥鼻紅腫毒咸血熱也宜其療矣

葶麻子味甘辛有小毒入脾大腸二經主水腫腹滿臟腑燥熱無名腫毒敷之可消口眼喎斜敷之可正塗足心下胞胎如神塗巔頂收生腸甚捷忌見鐵器服過者一生忌食豆誤犯之腹脹猛甚○按丹溪云葶麻子屬陰故入太陰陽明以驅水滿以催產難固矣而無名腫毒熱也口眼喎斜風也何併治之豈其辛甘發

散之功耶。葉主脚氣風腫不仁。搗蒸傳之。

【雷公云】

凡使勿用黑天赤利子。緣在他居上生。是以有毒。藥中不用。其草麻子形似。巴豆而光滑。有黃黑斑點。凡使先須和皮用鹽湯泡半日。去皮取肉研過用。

馬鞭草味甘苦。性寒有小毒。入肝脾二經。主活血通經。治金瘡諸瘡癩。取汁和

酒服。○按肝藏血者也。脾裹血者也。馬鞭草主血分。故入是二經。

蘆根味甘性寒無毒。入肺胃二經。主消渴客熱。止小便利。治五噎膈氣煩悶吐

逆。以蘆根五兩。水三盞。煮一盞服。甚效。○按蘆根主氣逆嘔噦。故入太陰陽明。消

渴之症。亦以氣化不及州都故也。今得蘆根以理太陰。而津液之生必矣。

蛇床子味苦辛甘。性平有小毒。入肺腎二經。主風寒濕痺。諸惡瘡癬。婦人陰中

腫痛。男子陰痿濕癢。久服駐顏輕身。令人有子。酒浸一宿。地黃汁拌蒸焙乾用。惡

牡丹皮。巴豆貝母。○按蛇床理風濕。宜入太陰。補虛痿。宜入少陰。

金銀花味苦甘。性平微寒無毒。入肺經。主熱毒血痢。消癰散毒。補虛療風。久服

延年。○按金銀花解肌膚之毒。故入肺經。爲瘡科要藥。陶隱居云。常服益壽。人多

忽之。更求難得者。是貴遠賤近庸人之情乎。

山豆根味甘。性寒無毒。入心肺二經。主解諸藥毒。止咽喉痛。退熱消癰。○按山

豆根性寒。耑瀉心火。心火去。則金無所損。金得其保。而熱傷之虞。吾知免矣。

艾葉味苦性微溫無毒入肝脾二經主灸百病溫中理氣開鬱調經安胎種子止崩漏除久痢辟鬼邪定霍亂生搗汁理吐衄血○按艾葉溫能令肝脾疏暢而無壅闕之患夫人之一身惟茲氣血兩端今土木既調則榮衛和而百病自却矣至於溫中等效又舉其偏長耳煎服者宜新鮮炙火者宜陳久生用則寒熟用則熱

薄荷味辛性微寒無毒入肺經主中風失音下脹氣去頭風通利關節破血止痢清風消腫引諸藥入榮衛能發毒汗清利六陽之會首祛除諸熱之風邪○按薄荷有走表之功宜職太陰之中風諸患固其耑也而血痢之症病在凝滯今得辛以暢氣而結凝爲之自釋矣

稀簽味苦性溫有小毒入肝腎二經補元氣祛風濕強筋骨長眉髮烏鬚鬢明目得酒良九月九日採者佳○按稀簽功驗如右宜職厥陰少陰二經高郵軍謂其性溫當矣本草言其性寒與主用相違不亦誤乎久服大能補益故張詠進御表云金稜銀線素根紫萸誰知至賤之中乃伏殊常之品臣服百劑耳目聰明漸服滿千鬚髭再黑羅守一墜馬中風不語十服卽痊僧知巖七十口眼喎斜數服頓愈若張益州者可謂識其用矣宜去根連莖葉細剉搗爛取汁熬煉成膏以

甘草熟地煎膏煉蜜。二味收之。出火毒。酒調服。功妙不可具述。所謂有小毒者。以生用令人吐也。今既經製度。則毒去而功全矣。

蒲公英味苦甘。性寒無毒。入脾胃二經。化熱毒。消惡瘡。結核。解食毒。散滯氣。細劉同。忍冬藤取汁入酒。以治乳癰。服罷欲睡。是其功也。睡覺病已安矣。○按丹溪云。蒲公英花黃屬土。宜入太陰陽明經。有一種花葉莖相類。而高大者非也。其真者短小塌地。質脆斷之有白汁。其花幹如葱管空者是也。四時常花。花罷結實。絮中有子。落處則生。則其稟天地中和之性可見矣。故治諸毒。又為黃花地丁者。以攻疔毒者名也。

夏枯草味苦辛。性寒無毒。入肝經。主瘰癧癭瘤。濕痺脚腫。肝虛日痛。冷泪羞明。散血破癥。生肌解毒。土瓜為使。○按夏枯草三四月開花。是時正厥陰風木主令。其為肝經之藥明矣。丹溪曰。夏至即枯者。蓋稟純陽之氣。得陰氣則枯也。

藿香味甘辛。性微溫無毒。入肺脾胃三經。開胃口。進飲食。止霍亂。除吐逆。○按藿香辛溫。入肺經。以調氣。甘溫入脾胃。以和中。治節適宜。中州得令。則臟腑咸安。病將奚來。

荆芥味辛苦。性微溫無毒。入肺肝二經。主結氣。闕血。酒傷食滯。能發汗。去皮毛。

諸風涼血熱。療痛癢諸瘡。其穗治產暈如神。陳久者良。○按荆芥行血療風。則太陰厥陰之入。固其宜也。今人但遇風症。輒用荆防。此流氣散之相沿爾。不知風在皮裏膜外者。荆芥主之。非若防風之入骨肉也。有汗者勿用。

香薷味辛。性微溫無毒。入肺胃二經。主下氣除煩熱。定霍亂。止嘔吐。療腹痛。散水腫。調中溫胃。最解暑氣。○按香薷性溫。其除熱解暑之功。何若是其著也。不知炎威酷暑。則臟腑伏陰。胸腹有凝結之憂。而皮膚多蒸熱之氣。得香薷之辛以散之。溫以表之。而傷暑之症。從茲遠矣。熱服令人泄瀉。久服耗人真氣。江右硬梗石生者良。土香薷苗軟。但能解暑。其他無效。

佛耳草味酸。性熱。有小毒。入肺經。主肺中有寒。及痰嗽勞嗽。款冬花爲使。○按佛耳耑入太陰。大升肺氣。宜少用之。過食損目。以性熱有小毒也。

蒼耳子味甘。性溫有小毒。入肺經。主風寒濕痺。頭風腦漏。疔腫困重。疥癬癢。血崩。大風癩癩。善能發汗。炒令香。杵去刺。用反猪肉。解狗毒。○按蒼耳甘溫。故能走表。肺主皮毛。所以入之。肺主風邪。故治療如右。

茵陳蒿味苦。性微寒。無毒。入膀胱經。主傷寒大熱。黃疸便赤。治眼目。行滯氣。能發汗。去風濕。去根用。犯火無功。○按茵陳耑理溲便。本爲膀胱便之劑。又何以治

疽蓋疽之爲病。肝受傷也。而脾之所惡。濕乘土也。得茵陳以利水。則濕去土安。而疽自愈矣。疽分陰寒陽熱二種。陽疽熱多。有濕有燥。同梔子用。治濕疽。同梔子橘皮用。治燥疽。陰疽寒多。只有一症。同附子治之。

使君子味甘。性溫無毒。入脾胃二經。治小兒五疳。利小便。止白濁。除瀉痢。殺諸蟲。連殼用。○按使君子甘溫。宜主脾胃。然多食令人發呃。傷胃故也。

高良薑味辛。性大溫無毒。入脾胃二經。主胃中冷逆。霍亂腹痛。除寒氣。去冷痺。止吐瀉。療翻胃。消宿食。解酒毒。○按良薑辛溫。脾胃所快。真有寒症者。服之甚驗。若有熱病者。誤投愈劇。

石蓮子味苦。性寒無毒。入心胃膀胱三經。主噤口痢。及濕熱滲入膀胱。爲白濁淋瀝等症。清心解煩。開胃進食。去殼用。○按石蓮苦寒。宜瀉少陰之火。心火既清。則胃與膀胱。不能獨熱矣。故皆入之。此別是一種。非蓮子比也。

合歡皮味甘。性平無毒。入心經。主安五臟。利心志。殺諸蟲。消癰腫。續筋骨。令人歡樂無怒。輕身明目。花主小兒撮口。煎湯洗拭。跌打損傷。熱酒調下。○按合歡味甘。何以獨入心家。經所謂以甘瀉之之說也。心得所勝。而癰瘡諸患。爲之自釋矣。其葉細細相並。至夜則合。又名夜合花。以絨拂可愛。俗又謂之烏絨。

萱草根味甘性寒無毒入脾肺二經主沙淋水氣酒疸身黃小便赤澀身體煩熱大熱衄血安五臟利心志令人喜悅忘憂輕身明目採其嫩苗功亦相儔花名宜男最利胸膈妊婦佩之轉女爲男○按萱草之甘宜歸脾部而肺則其所生者故亦入之稽康養生論云合歡蠲忿萱草忘憂圖經亦具言之當非虛語

劉寄奴草味苦性溫無毒入心肺二經主下氣除癥破血通經療霍亂水瀉止金瘡出血湯火所傷亦堪搗傅酒蒸曝用○按寄奴之苦宜歸心藏而溫煖之性又與脾部相宜故兩入之蓋心實主血脾實裹血所以耑療血症唐本云多服令人利亦以其宣泄耳

【雷公云】

採得後去葉只用實凡使先以布拭去薄壳皮冷淨拌酒蒸從巳至申出晒乾用

覆盆子味甘酸性溫無毒入肝腎二經主腎傷精滑陰痿不足小便頻數補虛續絕益氣溫中安和五臟補肝明目黑髮潤肌亦療中風發熱成驚女子食之多孕久服延年去黃葉及蒂水淘淨酒蒸曝乾用○按覆盆之酸宜歸肝部而腎則其母也且溫補之性適與相宜故咸入之衍義云小便多者服之當覆其溺器故名

【雷公云】

凡使用東流水葉淨子淘并皮蒂盡了用酒蒸一宿以東流水淘兩遍又晒乾方用

■木部

白茯苓味淡微甘。性平無毒。入肺脾小腸三經。主補脾氣。利小便。止煩渴。定驚悸。久服延年。去皮心。研細。入水中攪之。浮者是其筋也。宜去之。誤服損目。赤者崑主利水。抱根而生者。名茯神。主補心安神。除驚悸。治健忘。馬藺爲使。惡白欬。畏牡蒙地榆。雄黃。秦。充。龜。甲。忌醋及酸物。○按茯苓色白。是西方肺金之象也。味淡。是太陽滲利之品也。微甘。是中央脾土之味也。故均入之。夫脾最惡濕。而小便利。則濕自除。所以補脾。既能滲洩。燥脾似不能生津。已。潔古何爲稱其止渴。良由色白屬金。能培肺部。肺金得補。則自能生水。且經曰。膀胱者。州都之官。津液藏焉。氣化則能出矣。誠以其上連於肺。得肺氣以化之。津液從之出爾。藥性所謂白者。入壬癸。亦此意也。而渴有不止者乎。至于驚悸者。心經之虛也。而心與小腸相爲表裏。既瀉小腸。而心火亦爲之清矣。故能定之。丹溪曰。陰虛未爲相宜。蓋虞其滲洩爾。然味尚甘。甘主緩。亦無大害。非若猪苓。一于淡滲。而大傷陰分也。藥性去小便多。而能止。大便結。而能通。與本功相反。未可輕信。赤者屬丙丁。崑入膀胱瀉火。故利水之外。無他長。茯神抱根。有依而附之之義。驚悸者。魂不能附。健忘者。神不能守。宜其治矣。廣誌云。茯神。松脂所作。勝茯苓。衍義曰。氣感者洩于身。不抱木根。結爲

茯苓有津氣而不甚盛。不離其本。結為茯神。攷茲兩書。各相違悖。然仙經服食多需茯苓。而茯神不與焉。兩說之是非。於是乎辨。

琥珀味甘。性平無毒。入心脾小腸三經。主辟百邪。安五臟。定魂魄。止心痛。消闕血。利水道。通五淋。破癥結。去目翳。傳金瘡。○按琥珀乃松脂入地。千載化成。得土既久。宜入脾家。松之有脂。猶人之有血與水也。且成珀者。有下注之義。又宜入心與小腸。內經曰。主不明。則十二官危。使道閉塞而不通。服琥珀則神室得令。五臟安。魂魄定。邪何所附。痛何自生邪。於是使道通。而闕血諸症。靡弗去矣。夫目得血而能視。心寧則營和。而翳何足虞。金瘡者。惟患其血逆于腠爾。能止之和之。未有不瘳者也。丹溪曰。古方用以燥脾土。有功。脾能運化。則肺氣下降。故小便可通。若血少不利者。反致其燥急之苦。別說云。茯苓生成於陰者也。琥珀生于陽而成于陰者也。故皆主安心利水而治榮。

【雷公云】

凡使紅松脂。石珀。水珀。花珀。物象。珀。翳。珀。琥珀。紅松脂。如琥珀。只是濁大脆。文。雷公云。多無紅色。如深黃。多粗皮。皺。石珀。如石。重。色黃。不堪用。花珀。文似新馬尾。松心。文一路。

赤一路。路黃物象。珀其內自有物。命動。此便有神妙。醫。珀其。珀。象。珀之。長。故。說。曰。醫。珀。珀。如。血。色。試。執。手中。能。吸。得。木。子。者。真。也。夫。入。藥。中。用。水。調。餵。柏。子。末。安。于。磁。鍋。中。安。琥珀。于。末。中。了。下。火。煮。從。已。至。申。別。有。異。光。便。搗。如。粉。重。篩。用。

松香味苦甘。性溫無毒。入脾肺二經。主安五臟。除伏熱。解消渴。逐諸風。療癰疽。

惡瘡及白禿疥癩風氣金傷止血殺蟲定痛松子益氣補虛松花清心解煩松葉生毛髮去風濕灸罾凍瘡松節主骨節久風脚痺疼痛久服俱能辟穀延年○按松香甘溫之品與脾部相宜而肺者脾之子也故兩入之伏熱等症悉屬二經烏得不治子花節葉主療小異亦親上親下之道也

柏子仁味甘辛性平無毒入肺脾腎三經主安五臟定驚悸補中氣除風濕興陽道煖腰膝去頭風辟百邪潤皮膚明耳目側柏葉味苦澆性微寒止吐衄崩痢除風冷溼痺烏鬚黑髮灸罾凍瘡久服延年牡蠣桂瓜子為使畏菊花羊蹄草諸石及麩麵○按柏仁辛歸肺甘歸脾濁陰歸腎故均入之柏葉之苦澆屬金而善守最清血分為補陰要藥須用嫩葉春採東夏採南秋採西冬採北纔得節氣生氣

【雷公云】

凡使先以酒浸一宿至明漉晒乾用黃精自然汁日中煎手不住攪若夫天陰即于鍋中着火用瓶器盛柏子仁着火緩緩者成膏為度每煎二兩柏子仁用酒五兩浸乾為

度

桂味辛甘性大熱有毒其在表最厚者曰肉桂去其鱗皮為桂心入心脾肺腎四經主九種心痛補勞傷通九竅煖水臟續筋骨殺三蟲散結氣破闕血下胎衣除效逆療腹痛止瀉痢善發汗其中次厚者曰官桂入肝脾二經主上焦有寒

走肩臂而行肢節。其在嫩枝四發者曰桂枝。專入肺經。主解肌發表。理有汗之傷寒。數者皆斂草木毒。百藥無畏。性忌生葱。○按肉桂在下。有入腎之理。屬火有入心之義。而辛散之性。與肺部相投。甘溫之性。與脾家相悅。故均入焉。官桂在中。而肝脾皆在中之臟也。且經曰。肝欲散。急食辛以散之。以辛補之。又曰。脾欲緩。急食甘以緩之。以甘補之。桂味辛甘。二經之所由入也。薄桂在上。而肺胃亦居上。故宜入之。桂枝四發。有發散之義。且氣味俱輕。宜入太陰而主表。丹溪曰。仲景救表用桂枝。非表有虛。而用以補也。衛有風寒。故病自汗。以此發其邪。則衛和而表密。汗自止爾。衍義乃謂仲景治表虛誤也。本草言桂發汗。正合素問辛甘發散之義。後人用桂止汗。失經旨矣。大抵桂爲陽中之陽。壯年火旺者忌食。惟命門火衰。不能生土。完穀不化。及產後虛弱者宜之。細考桂有數種。論之者無慮數十家。或言種異。或言地殊。各不相侔。咸無所據。詢之交廣商人。所販惟陳藏器所謂雖分數等。同是一物。此說最當。別說亦稱之矣。今採其意。以詳別如右。

【雷公云】

凡使其薄者要紫色厚者去上粗皮取心生味辛者使每斤大厚紫桂只取得五兩取有味厚處生用如未用即重擦熱鍋并紙裏勿令犯風其州上只有桂草元無桂心

用桂草煮向湯木皮遂成桂心凡使即單搗用之

槐實味苦酸鹹。性寒無毒。入心肝大腸三經。主五內邪熱。腸風五痔。湯火傷瘡。

男子囊墜腫痛。陰瘡濕癢。婦人陰中痛瘡。崩中漏下。明目補腦。煞蟲去風。黑髮延年。酒服能催生墮胎。枝耑主洗溼熱諸瘡。治九種心疹。皮主中風拘攣。齒痛疳蠱。消癰解毒。止痛長肉。膠主肝臟風。筋脈抽掣。及急風口噤。四肢不收。或毒風周身如蟲行。破傷危急。花與實同功。又主心痛。及疔腫熱毒。赤白下痢。小兒驚癇。景天爲使。○按槐實之苦能泄心火。酸寒之性能伐肝經。經曰。酸苦涌洩爲陰。其功主降。故又入大腸以理下焦諸症。且催產難。夫蟲之生也。因於溼。風之生也。因于熱。濕熱旣去。又奚庸虞。花枝皮葉。主治大同小異。尤爲痔瘡要藥。

木香味苦辛。性微溫無毒。入心肺肝脾胃膀胱六經。主心腹一切氣。痲痺癢塊。九種心疹。止瀉痢。除霍亂。健脾胃。消食積。定嘔逆。下痰壅。辟邪氣。瘟疫。煞瘧。蠱精。物宜生磨用。火炒令人脹形如枯骨。苦口沾牙者良。○按木香辛入肺。苦入心。溫宜脾胃。肝者心之母也。膀胱者肺所連也。故均入焉。蓋心乃一身之主。氣血之所聽命者也。有主則能塞氣。肺氣調則金能制木。而肝火自伏矣。凡人有怒。則肝氣拂逆。而反忤其元氣。心有縱肝之情。而不能制。則肝氣于是乎盛。或爲拂逆。或爲攻衝。得木香則心氣暢。而正氣亦暢。肝氣何拂逆之有哉。實心之行。夫肝也。非肝之自行也。東垣以黃連制之。恐其氣行過于通暢。不無走泄之患爾。

【雷公云】

凡使其木香是蘆葭根條互盤旋採得二十九日方便
如枳實硬碎其有蘆頭丁善子色青者是木香神也

山梔味苦性寒無毒入心肺大小腸胃膀胱六經主五內邪熱亡血津枯面紅目赤癰腫瘡瘍五種黃病開鬱瀉火療心中懊懣顛倒而不眠治臍下血滯小便不利皮走肌膚之熱仁主心胸之熱解羊躑躅及蠱毒○按山梔味苦歸心輕飄象肺大腸則供肺為傳送者也小腸則受感與心應者也胃亦上焦之腑也膀胱亦肺部之絡也故咸入之以理邪熱諸症潔古曰輕清上行丹溪又曰屈曲下行兩家之說似相左矣不知惟其上行最能清肺肺氣清而化則小便從此氣化而出經曰膀胱藏津液氣化則能出者清也虛火炎者炒黑用煩鬱嘔逆者薑汁炒用此外並宜生服

【雷公云】

凡使勿用類大者號曰伏几梔子無力須要如蘆葭并續長有九路赤色者上凡使先去皮蒸取仁以甘草水浸一宿漉出控乾搗碎如金魚用

吳茱萸味苦辛性熱有小毒入肝脾胃大腸腎五經主下氣消痰寒氣噎塞心腹刺痛霍亂轉筋脚氣攻心止咳逆逐風邪消宿食除血痺鹽湯炮去毒用蓼實為使惡丹參硝石白堊畏紫石英○按吳茱萸辛熱之劑宜入五經以理寒症多食大損元氣腸虛者忌之

【雷公云】

凡使先去葉硬并雜物子用大盆一口使鹽水洗一百轉自然無涎日乾任入丸散中用修事十兩用鹽二兩研作末投東流水四杓中分作一百度洗則有大效若用醋煮

即先洗醋三十餘沸後入茱萸度醋盡酒乾每用十兩醋二盃為度

山茱萸味甘酸微溫無毒入肝腎二經主通邪氣逐風痺破癥結通九竅除鼻塞療耳聾殺三蟲安五臟壯元陽固精髓利小便去梗用蓼實為使惡桔梗防風防已○按山茱萸大補精血故入少陰厥陰六味丸用之取其補腎而不傷于熱耳若舍是而別求熱劑以為淫慾助猶棄賢良而搜佞倖也愚乎哉

【雷公云】

凡使勿用雀兒蘇真似山茱萸只是核入搜不入藥用使山茱萸須去內核每修事去核子一斤取肉皮用只存成四兩已來緩火煮之方用蘇壯元氣殺穢精其核能滑精

蔓荊子味苦甘辛性微寒無毒入肝經主散風寒療頭風除目痛去翳膜堅齒牙利九竅殺白蟲酒浸一宿蒸用惡石膏烏頭○按經曰東方青色入通于肝開竅于目又曰風生木木生酸酸生肝荊實入肝故耑主散風以療目疾主治祕訣云其味苦甘為陽中之陰能涼諸經之血熱

杜仲味辛甘性溫無毒入腎經主陰下溼癢小便餘瀝強志壯筋骨滋腎止腰疼去粗皮酥蜜灸去絲用惡蛇蛻玄參○按杜仲降而屬陽宜職腎家之症然精血燥者不宜多用

【雷公云】

凡使先須剉去粗皮用酥蜜和作二兩炙之以盡為度交乾了細剉用凡修事一片酥一兩蜜二兩二味相和一處用

烏藥味苦辛性溫無毒入肺肝二經主一切氣症及中惡心腹痛蠱毒鬼症天

行疫瘴。咳逆脹滿。霍亂吐瀉。癰癤疥癩。○按烏藥辛宜于肺。溫宜於脾。故主惡中等症。癰癤疥癩。成於血逆。始於氣逆。烏藥長於理氣。故并療之。然辛溫發散。不宜久用。恐損真元。

厚樸味苦辛。性溫無毒。入脾胃二經。去實滿而治腹脹。除溼結而和胃氣。止嘔清痰。溫中消食。乾姜爲使。惡澤瀉寒水石硝石。忌食豆。○按厚樸辛則能發。溫則能行。脾胃之所喜也。故入之以理諸症。丹溪曰。厚樸屬土而有火。平胃散用之。以佐蒼朮。正謂瀉上焦之濕。平胃土。不使太過。以致於和而已。若以爲溫補而泛用之。非也。體重濁而微降。最能耗氣。春夏秋宜用。冬間忌之。氣虛之人及孕婦。亦可不

【雷公云】

凡使要用紫色味辛爲好。或丸散便去粗皮用醋炙過。每條一斤用。蘇四兩炙了。細剉用。若湯飲下。使用自然薑汁八兩炙一升爲度。

黃柏味苦。性寒無毒。入腎膀胱二經。主瀉下焦隱伏之火。安上焦虛穢之蟲。除臍下痛。補腎水衰。止血痢。治癰瘡。明目。利小便。除溼熱。療女子熱崩。鹽酒多炒。免致寒入于腎。惡乾漆。肉厚黃者佳。○按黃柏沉而屬陰。故主腎與膀胱諸症。其性苦寒。能泄亢甚之陽。以堅腎部。則水主旣盛。陽光自遏。而陰血無火爍之患矣。豈真有滋補之功者。若腎家無火。兩尺微弱。或尺獨旺者。均不宜用。

桑白皮味辛甘性寒無毒入脾肺二經主傷寒羸瘦崩中脈絕肺氣有餘虛勞客熱瘀血停留吐血熱渴止嗽消痰開胃進食利二便消水腫能終寸白可縫金瘡皮中白汁塗唇燥及小兒口瘡銅刀切片文火蜜灸勿令涎落桂心麻子爲使忌見鉛鉄桑枝療手足拘攣陰管作痛眼瞠作暈氣逆咳嗽腫毒風癢桑椹開關竅利血脈安神魂黑鬚髮明目桑寄生主除腰痛去風濕健筋骨充肌膚愈金瘡益血脈長鬚髮堅齒牙安胎氣下乳汁止崩漏折其莖深黃色者眞○按桑皮辛則走西方而瀉肺金甘則歸中央而利脾土然肺氣虛脾氣弱者不宜用之恐潤利之品能走眞元爾桑本四發有發散之義椹爲桑英有裨益之功而寄生獨產于海外蓋以地煖不蠹桑木無採捋之苦得氣最厚生意濃密葉上自然生出何曾有所謂節間可容樹子也此說本之丹溪最爲近理圖經諸書胥失之也難得其眞誤服殺人用者謹之

【雷公云】

凡使在樹上自然生獨枝樹是也採得後用鋸刀和枝根並細剝陰乾再用勿令見火切忌切忌

枸杞子味苦甘性微寒無毒入肝腎二經主五內邪熱煩躁消渴周痺風溼下胸脇氣除頭痛明眼目補勞傷堅筋骨益精髓壯心氣強陰益智去皮膚骨節間風散瘡腫熱毒久服延年惡乳酪解麵毒○按枸杞子味苦可以堅腎性寒可以

清肝五內等症。孰不本于二經。宜其治矣。陶隱居云。去家千里。勿食枸杞。此言其補精強腎也。然惟甘州者有其功。至于土產者。味苦。但能利大小腸。清心除熱而已。

【雷公云】

一凡使根得後便東流水變以物割去土了然後待動硬去心用熟甘草湯燉一宿然後焙乾用其根若似物形狀佳者上春食葉夏食子秋冬食根并子也

地骨皮味苦性寒無毒入肺腎二經。療在表無定之遊邪。退傳屍有汗之骨蒸。除熱清肺。止嗽解渴。涼血涼骨。利二便。去骨用。○按地骨皮卽枸杞根也。故均之入腎。又入肺者。蓋以其爲表。則其用在表。肺主皮毛。所以入之。本功外與枸杞相同。

酸棗仁味酸性平無毒。入心脾肝胆四經。主筋骨酸痛。夜臥不寧。虛汗煩渴。安和五臟。大補心脾。炒熟去皮尖。研用。生者治嗜臥不休。惡防已。○按棗仁味酸。本入肝經。而心則其所生者也。脾則其所制者也。胆又其相依之腑也。宜並入之。聖惠方云。胆虛不眠寒也。炒熟爲末。竹葉湯調服。蓋以肝胆相爲表裏。血虛則肝虛。肝虛胆亦虛。得熟棗仁之酸溫。以旺肝氣。則木來剋土。脾主四肢。又主困倦。所以令人多睡。又濟衆方云。胆實多睡熱也。生研爲末。姜茶湯調服。亦以棗仁秋成者也。生則得全金氣。而能制肝木。肝木有制。則脾不受侮。而運行不睡矣。

【雷公云】

酸棗仁凡使採得後曬乾取葉重拌酸棗仁蒸半日子去炭灰了再研用

益智味辛性溫無毒入脾胃腎三經主遺精虛漏小便餘瀝益氣安神和中止嘔去皮鹽炒用○按益智辛溫善逐脾胃之寒邪而土得所勝則腎水無峻尅之虞矣遺精諸症吾知免矣

檳榔味辛甘澹性溫無毒入胃大腸二經主消穀逐水宣利臟腑攻堅行滯除痰癖殺三蟲卻伏尸瘰寸白攻脚氣解諸蠱墜藥性如鉄石治後重如奔馬見火無功○按檳榔甘溫之品宜於胃家沉陰之性宜于大腸故諸功驗取其下墜非取其破氣廣闊多服之者蓋以地煖溼蒸居民感之氣亦上感故服此以降之爾尖長者快銳速效

【雷公云】

凡使存坐穩正堅實不虛者碎破肉有錯紋者妙半白半黑并心虛者不入藥用凡修事榔頭九身形矮扁者是榔身形尖紫文相錯力大欲使先以刀刮去底細切勿經火

大腹皮味苦辛性微溫無毒入肺脾二經主冷熱氣攻心腹疏通關格除脹滿祛壅滯消浮腫酒洗去沙復以大豆汁洗用○按大腹辛宜瀉肺溫宜健脾然宣泄太過氣虛者勿用樹上多栖鳩鳥汗染糞毒最能為害故必多洗方堪用爾

丁香味溫辛性甘無毒入肺脾胃腎四經主寒氣腹痛霍亂反胃鬼疰蠱毒及腎氣奔狃氣壯陽暖腰膝療冷氣飲酒毒消疥癬除冷勞有大如山茱萸者名母

丁香氣味尤佳。○按丁香辛溫走肺部。甘溫走脾胃。腎者土所制而金所生也。宜減入之。果犯寒疴。投之輒應。倘因火症。召禍匪輕。陳藏器云。拔去白鬚。姜汁調塗孔中。重生卽黑。

【雷公云】

凡使有雌雄。類小雌類。大似棗核。方中多使雌力。大高竅中用雄。若用須去了善乳子發人背癩也。

冰片味辛苦。性溫無毒。入肺肝二經。主心腹邪氣積聚。喉閉乳蛾。舌腫痔瘡。通九竅。消風氣。明耳目。殺諸蟲。解蠱毒。又主小兒驚癇。大人痰迷。○按冰片之辛。本入肺家。而肝則受剋者也。故兼入焉。主治諸症。俱是氣閉生熱。而冰片則辛散之極。開氣如反掌。故多用之。然亦從治之法也。世俗因其主用。遂疑其性寒。輒與麝香同用。以爲桂附之助。獨不計人身陽易於動。陰易於虧。丹溪之訓。詎可忽諸。猪苓味淡。性平無毒。入膀胱經。主利便除濕。消腫通淋。去黑皮用。○按猪苓味淡。五臟無歸。端入膀胱利水。今之療瀉者。概用之。謂其去脾家之溼也。不知一於滲泄。逐水太過。水盡則傷腎昏目。不可不知。

【雷公云】

凡欲得用。須刀剝上粗皮。一重薄切。下東流水浸一宿。至明澆出。細切。以升麻葉對蒸。一日。出去升麻葉。令淨。曬乾用。

蘇木味甘鹹。性平無毒。入肝經。主破產後惡血。瘡瘍死血。一切跌撲損傷。調月水。去闕血。和新血。排膿止痛。消癰散腫。及主霍亂嘔逆。赤白痢下。酒蒸陰乾用。○

接蘇木耑主血分宜入肝經然破血之功多而和血之功少勿得多用以傷陰分

【雷公云】

凡使去上粗皮并節子若有中心又黃如紫角者號曰水中尊色其並倍常百等須盤細了重搗拌細條梅枝蒸從已至申時乾用

沉香味辛苦性溫無毒入腎命門二經主祛惡氣定霍亂補五臟益精氣壯元陽除冷氣破癥癖皮膚瘙癢骨節不仁忌見火生磨用○按沉香屬陽而性沉多功于下部腎命之所由入也然香劑多燥未免傷血必下焦虛寒者宜之若水臟微衰相火感炎者誤用則水益枯而火益烈禍無極矣今多以爲平和之劑無損於人輒用以化氣其不禍人者幾希

【雷公云】

沉香凡使須要不枯者如嚼角硬重沉于水下爲上也半沉者次也夫入丸散中用俟衆藥出卽入拌和用也

乳香味辛苦性溫無毒入十二經主祛邪下氣補賢益精止霍亂催產難定心腹急疼療癰癤風癢諸般惡瘡風水腫毒治中風聾唵亦入敷膏止痛生肌瓦上微炒出油燈草同研用○按乳香辛香發散于十二經絡無所不入生南海波斯國赤松脂也垂滴成珠綴珠未落者名珠香圓小光明效速木滴如乳鎔撮地面者名撮香大塊枯黯效遲用者不可不審

沒藥味苦辛性平無毒入十二經主破癥結宿血止療金瘡杖瘡痔瘡諸惡腫毒跌打損傷目中翳暈曆節諸風骨節疼痛製同乳香○按沒藥與乳香同功大

抵血滯則氣壅淤。氣壅淤則經絡滿急。故痛且腫。得沒藥以宣通氣血。宜其治矣。
木瓜味酸。性寒無毒。入肺脾肝三經。主脚氣水腫。心腹冷熱及奔豚。去溼氣。調榮衛。助穀氣。和脾胃。步吐瀉。忌犯鐵器。石搗用。○按木瓜之入三經何也。經所謂以酸補肺。以酸瀉肝。脾則受制於木。而孕育夫金者也。何弗入焉。東垣云。氣脫則能收。氣滯則能和。腰腎脚膝之要藥也。香薷飲用之。取其肅和脾胃。培植肺氣。除夏間之濕。以生至微之金爾。

【雷公云】

凡使勿誤用和圓子。蔓子土伏子其色樣外形真似木瓜。只氣味效并向裏各不同。若木瓜皮薄微赤。黃香甘酸。不澀調榮衛助穀氣。向裏子頭尖一面方是真木瓜。若和圓子色微黃。蒂核粗子小。圓味酸。能傷人。氣蔓子形小似木瓜。味絕。澀不堪用。土伏子似木瓜。味絕。澀子如大樣。油澀又苦。澀不堪用。若婦人令人目澀。目赤多赤筋痛。凡使木瓜。勿令犯鐵。用銅刀刮去硬皮。并子薄切于日中曬。却用黃牛乳汁拌蒸。從巳至未。其木瓜如膏。煎却于日中曬。曬乾用也。

竹葉味甘淡。性平無毒。入心肺胃三經。主新舊風邪之煩熱。喘促。氣勝之上冲。療傷寒。解虛煩。治消渴。療喉痺。止嘔吐。除咳逆。有一種苦竹葉。主舌瘡目痛。去青刮取為竹茹。主胃熱嘔呃。除煩解渴。療吐衄崩中。噎膈氣溢筋。五痔。火燒竹瀝。主陰虛發熱。中風口噤。除自汗。解消渴。止驚悸。清煩躁。痰在手足四肢。非此不達。痰在皮裏膜外。有此可毆。又主小兒天疳驚癇。婦人懷妊悶暈。胎前不損子。產後不得虛。筍補氣止渴。久食益人。○按竹葉生于中半以上。故主治多任上焦。心肺胃

皆臟腑之居上者也。宜並入之。味苦者。耑瀉南方。竹茹者。其除土鬱。故主用小殊。竹瀝者。竹之液也。猶人身之血也。極能補陰。况陰之不足。由于火燥。竹瀝長于清火。則血得其養。本經已載其功。丹溪又詳其效。而世俗不能常用者。蓋泥證類之大寒爾。不知竹即筍之老者也。今人自幼食筍。味老不撤。曾無中其寒涼之害者。瀝則假火而成。何寒之有。證類之所謂大寒者。蓋表其功。非論其氣也。幸高明者準之以理。斯藥無遺用矣。

天竺黃味甘。性寒無毒。入心經。主清心明目。除驚解煩。毆邪逐痰。及小兒驚癇。天芎風熱諸症。○按竺黃之寒。耑瀉少陰之火。火去而驚邪諸症。靡不療矣。產天竺國。即竹節內黃粉。然多有僞者。須辨其片片如竹節者。眞。

金櫻子味酸澇。性溫無毒。入脾肺腎三經。主脾洩下痢。血崩帶下。瀉精氣。止遺泄。除咳嗽。止小便。益腎氣。潤顏色。久服延年。先去刺。剖開去子。復拭去毛用。○按丹溪曰。金櫻子屬土。而有金與水。脾肺腎之入。固其宜也。又曰。經絡墜道。以通暢爲和平。味者取其澁性。煎膏食之。自作不靖。各將誰執。此恐過服者傷脾而發也。須九十月間。半熟時採之。太生令人利。太熟功力薄。

訶梨勒味苦酸澇。性溫無毒。入肺肝脾腎大腸五經。主冷氣心腹脹。久瀉痢霍

亂喘急。腸風瀉血崩中帶下。奔狃腎氣。開胃消食。生津止渴。治嗽開音。酒浸蒸熟。用未熟時風飄墜者。謂之隨風子。肺因火傷。鬱遏脹滿。痰嗽咽喉不利者。含三四枚者殊勝。○按訶梨勒酸以瀉肝收肺。苦以堅腎瀉脾。澀以厚大腸。五經之入。所由來也。終是酸瀆之劑。久瀉痢者宜之。若積初起而用之。與丹溪無止法。意相左矣。衍義曰。氣虛人亦宜緩緩煨熟少服。雖能瀆腸。又能洩氣。故也。丹溪云。訶梨勒文只有六路。或多或少。此是昆梨勒。罽梨勒。榔精勒。雜路勒。並不宜用。

【雷公云】

凡使勿用昆梨勒。罽梨勒。榔精勒。雜路勒。若向梨勒文。只是六路。或多或少。並是雜路。勒昆路。勒個個昆雜路。皆圓露。又或八路。至十三路。號曰。榔精勒。多瀆不入。用凡修事。

先于酒內煨後蒸一次時其訶梨勒以刀削路細圓焙乾用之

郁李仁味酸。性平無毒。入大腸經。主四肢浮腫。腸中結氣。關格不通。膀胱急痛。潤腸破血。利水下氣。消食寬中。忌麪及牛馬肉。○按郁李仁屬陰。性主降。故獨入大腸。然宣洩太過。能疏五臟真氣。虛人不宜多用。

蕪夷味辛。性溫無毒。入肺脾二經。主五內邪氣。腸風痔漏。疥癬風熱。皮膚骨節間風濕。除冷氣。化宿食。消疔積。殺諸蟲。去衣。麪炒黃用。○按蕪夷辛宜于肺。溫宜于脾。故兩入之。風寒溼脾。大腸冷滑者。此為要劑。夫氣須皆因寒而滯。諸蟲皆因濕而生。得蕪夷以溫之。燥之。而症猶不痊者。未之有也。

五加皮味辛苦性溫無毒入肺腎二經主心腹腰膝痛疝氣骨節拘攣多年閉血在皮膚陰痿囊濕小兒腳軟女子陰痒陰蝕補勞傷堅筋骨益志氣添精髓久服延年遠志為使畏蛇皮玄參○按五加皮辛能瀉肺苦能堅腎宜並入之心腹等件何非兩經之症而有不治者耶昔張子聲楊建如王叔牙于世彥等皆服五加皮酒不絕房室得壽三百歲有子二十人延年之說此其徵矣

【雷公云】

今五加皮其樹木是白秋樹其上有葉如蒲葉者其二葉花是雄五葉花是雌剝皮陰乾陽人使陰陰人使陽

楮實味甘性平無毒入腎經主補虛勞壯陰痿助腰膝退水腫堅筋骨益氣力充膚肌悅顏色明耳目久服長生酒浸一宿蒸用樹汁塗癬及蝮螫樹皮主逐水利小便葉主小兒身熱煎湯洗惡瘡長肌肉莖主癰疹作痒單煮洗浴○接楮實濁陰下降宜入少陰補益之功諸書具載獨修真祕旨日服楮實者輒為骨軟疾必非無根之說然甚難解釋姑錄之以待明敏

【雷公云】

凡使採得後用水浸三日將物攪旋淨于水面者去之然後曬乾却用酒浸一伏時丁使蒸從已至亥中時令乾用

秦皮味苦性寒無毒入肝腎二經主散風寒濕痺去肝中久熱兩目赤腫青白翳暈流淚不止及丈夫精衰女子崩帶小兒風熱驚癇大戟為使惡吳茱萸防葵○按秦皮青碧之色宜入厥陰沉陰之品宜入少陰脾胃虛寒者不宜多用

檮白皮味苦瀋性寒無毒入心肝脾三經主月經過度帶漏崩中夢洩遺精腸風痔漏久痢脫肛縮小便除瘡疥祛鬼疰煞傳屍解蟲毒逐蛔虫蜜炙用有一種椿皮功用皆同性微温○按檮白皮血中之藥也心主血肝藏血脾裹血均宜入之孟詵云多食令人神昏血氣微

密蒙花味甘性微寒無毒入肝經主青盲膚翳赤瀆眵泪赤脈貫睛又主小兒瘰疬及疳眼酒浸一宿蜜拌蒸晒乾用○按密蒙耑入肝經故治目之外無他長眼科之要劑也

【雷公云】

凡使先煉令淨用酒浸一宿漉出候乾用將蜜令潤蒸從卯至酉出日乾如此烘蒸三遍又却日乾用修事一兩用酒入兩錢待色變用蜜半兩蒸為度此花名水鏡花

辛夷味辛性温無毒入肺胃二經主身體寒熱頭痛腦痛面腫齒痛眩冒如在車船温中氣利九竅解肌表通鼻塞除濁涕生鬚髮殺白蟲去面點去毛及心用芎藭為使惡五靈脂畏菖蒲蒲黃黃連石羔黃環○按辛夷辛温發散太陰陽明之入固其宜也若肝胃虛熱不受風邪者勿得漫用

【雷公云】

凡使先去粗皮拭上赤肉毛了瀉以焙蒸水浸一宿漉出用漿水煮從巳至未出焙乾用若治眼目中患即一時去皮用向裏實者

蕤仁味甘性温無毒入心肝脾三經主心腹結氣結痰鼻中衄血眼胞上下風腫爛弦左右皆熱障努肉清火止泪益水生光破核取仁去皮尖研用○按心肝

與脾皆血之臟而糲仁入之夫目之有疾血之故也今得其甘以養血溫以和血而腫脹諸患從茲息矣

【雷公云】

凡使先用熱水浸去皮尖作兩片用芒硝木通甘草三味和糲仁同水煮一伏時後攪出去諸藥取糲仁研成膏仁加減入藥中使凡修事四兩用芒硝一兩木通甘草七兩

女貞實味甘苦性平無毒入心脾二經主安五臟養精神補陰分益中氣黑髮髮強筋力去風濕除百病久服可延年冬採取布袋洗淨衣皮酒浸一宿晒乾用○按女貞實苦走心甘走脾性用平和經冬不凋誠補陰之上劑也仙家亦需服食今罕有能用之者亦未旣其功爾

五倍子味苦酸性平無毒入大腸經主齒宣疔蠱風癬疥痒腸風五痔及小兒面鼻口耳疔瘡明目生津止瀉瀉精噉口中治口瘡善收頑痰解諸熱毒百藥煎卽五倍造成主肺脹喘咳噉化能斂而降之○按五倍子酸苦之性常瀉大腸其收斂甚捷瀉痢初起者未宜入劑

牙皂味辛鹹溫有小毒入肝胃二經主風痺死肌頭風目淚中風邪氣勞蟲等物通關竅理癰疽消脹滿化穀食除咳嗽療骨蒸去疥癬搗鼻噴嚏立至敷腫疼痛卽除和生礬可吐風痰拌蜂蜜名爲煎導水浸一宿去皮弦酥炙復去核及黃用柏實爲使惡麥門冬畏空青人參苦參皂角刺主厲風鼻梁崩倒眉髮白落又

主癰疽。其未潰者，能發散。其已潰者，能引排膿藥。直達膿處，成功。諸惡瘡癬，咸不可缺。○肝爲風木之臟，胃爲水穀之腑，牙皂辛溫，有行散之功，宜並入之。多用能耗氣損血，其刺乃質幹之銳者，故於瘡癰無所不達。若療厲風，九蒸曝爲妙。

巴豆味辛，性生溫，熟寒。有大毒，入脾胃大腸三經。主削堅積，蕩臟腑之沉寒，通閉塞，利水穀之道，路排膿消腫，破血通經，煞鬼毒蟲疰，及臍腹諸蟲，去皮心膜，油水煮五度用。羌花爲使，惡藁草畏大黃黃連，藜蘆牽牛，蘆筍醬豉，冷水殺斑蝥蛇蝎毒。○按巴豆，主宣通，則脾胃大腸宜其入。已炒令紫黑，可以通腸，亦可止瀉。蓋通因通用之意也。仲景東垣及諸名家，每每用之。今世俗畏其辛熱之毒，蕩滌之患，輒云劫劑，皆廢不用。不知巴豆爲斬關奪門之將，其性猛烈，投之不當，爲害非輕。用之得宜，奏功甚捷。譬如張飛亦一虎將也。顧人用之何如耳。可概棄哉。倘氣虛羸弱，脾氣久傷者，誠所大忌。

【雷公云】

凡使巴之與豆及剛子，須在仔細認，勿誤用。發人巴，類小緊實，色黃，豆即有二三稜色。黑若剛子，小似粟核，兩頭尖，巴與豆即剛子，勿使凡修事。巴黑豆碎，以麻油并酒等兩以酒與麻油各七合，盡爲度。

金鈴子味苦，性寒，有小毒。入心小腸二經。主溫疾傷寒，理大熱顛狂，利小便，通水道，殺三蟲，愈瘡瘍，善除心痛，宜作浴湯，晒乾酒蒸，去皮核用。川蜀者佳。○按金

鈴子苦寒宜入心家而小腸即其腑也故並入之瘡瘍諸症何非心火所致得金鈴以瀉之洵可愈矣

紫葳味甘酸性微寒無毒入脾肝二經主婦人產後血奔不定血膈遊風崩中帶下癥瘕血閉安胎通淋又主熱風及身痒風癩二便不通酒釐熱毒畏鹵鹹一名凌霄花○按紫葳甘歸脾臟酸走肝家二經乃藏血裏血者也故耑調血症風痒之生亦榮衛不和爾宜並理之丹溪曰治中血痛之要藥也且補陰甚捷蓋有守而獨行者

雷丸味苦鹹性寒有小毒入肺脾胃三經主胃中熱癩癩狂走惡風汗出解蠱毒殺諸蟲逐皮裏膜外之水又作糜膏除小兒百病利丈夫不利女子久服陰痿火炮用荔實厚朴芫花爲使惡葛根扁蓄赤者殺人○按雷丸苦能燥脾而胃則其腑也肺則其子也故均入之蟲以溼熱爲巢穴溼熱去而蟲可殺矣本經旣云利丈夫別錄又云久服陰痿于事相反陶隱居以此致疑不知利者疎利之謂爾非利益也

【雷公云云】

凡使用甘草水浸一宿了將刀刮去黑皮破作四五片又用甘草湯浸一宿後蒸從已至未日乾却以酒拌如前從已至未蒸日乾用之

鈴藤味甘苦性微寒無毒入十二經主小兒熱寒諸種驚癇胎風客忤熱壅夜

啼舒筋活血。色黃而嫩。鈎多者佳。○按鈎藤兼主氣血。故于經絡靡所不入。惟療小兒不入餘方。

血竭味甘微鹹。性平有小毒。入諸陰經。主五臟邪氣。心腹卒痛。止帶下。破積血。療疥癬惡瘡。及金瘡。生肌止痛。得蜜陀僧良。有假者是海母血。頗相似。然味大鹹。有腥氣。爲辨爾。敲斷有光彩。磨指甲紅透者佳。另研用。若與別藥同搗。化作飛塵。○按血竭專主血分。故入諸陰之經。日華子云。諸瘡久不合者。宜敷此藥。然不可多使。却能引膿。

茶茗味甘苦。性微寒無毒。入心肝脾肺腎五經。主下氣醒睡。除痰消食。利便生津。破熱氣。清頭目。善祛油膩。解煎炙毒。○按茶茗清利之品。故五臟咸入。然過食傷脾。令人面黃消瘦。其醒睡者。亦以伐脾故耳。

阿魏味辛。性微熱無毒。入胃經。主破癥積。下惡氣。治霍亂。止腹痛。辟瘟禁瘡。辟鬼祛邪。能消蠱毒。可滅傳屍。○按阿魏辛熱之性。與胃腑相宜。故獨入之。產波斯國。阿盧木內之脂也。唐本註云。體性極臭。而能止臭。亦奇物也。今市家多煎蒜白假充。不可不辨。真者置熟銅器中。一夜。其沾阿魏處。白如銀。

【雷公云】

凡使有認。傷其有三驗。第一驗。將半銖。安于熟銅器中。一宿。至明。沾阿魏處。白如銀。永無赤色。第二驗。將一銖。置于五方草自然汁中。一宿。至明。如鮮血色。第三驗。將一銖。

安在樹上樹立疏便是其凡使先于淨鉢中
研如粉子于熱酒器上蒸過再入藥中用之

乾漆味辛性溫有毒入胃大小腸三經主年深堅結之沉積日久祕結之闕血
殺三蟲絕傳屍捐咳嗽止崩漏除九種心痿療風寒溼痺炒令烟盡用半夏為使
畏雞子油脂鈇漿黃蘆汁蟹○按乾漆端主行化胃與二腸宜其入已然攻堅消
積之劑終損元神不宜過用中其毒者以所畏之物解之

楓香味辛苦性平無毒入脾肺二經主辟惡氣治瘍毒止齒痛消風氣除下痢
止霍亂退癰癧最捷一名白膠一名芸香○按楓香辛宜走肺苦宜燥脾治節得
宜倉廩得令則惡氣等症何患其不瘳

蜀椒味辛性熱有毒入肺脾二經主冷氣欬逆心腹邪氣風寒溼痺癢瘕積聚
霍亂轉筋留飲宿食開腠理通血脈堅齒髮調關節堪辟瘟疫可洗漆瘡微炒能
出汗去目及黃壳用○按蜀椒辛宜肺部熱宜脾家故並入之症屬寒凝誠為要
劑然過于行散多服令人乏氣且發熱疾閉口者能殺人不可不慎

【雷公云】

一名南椒凡使須去目及閉口者不用其椒子先須酒拌令濕蒸從已至
午放冷又制法微炒出汗投器中春之取殼皮去黃壳密收器中任用也

■ 菜部

生薑味辛性溫無毒入肺心脾胃四經主通神明去穢惡散風寒止嘔吐除洩

瀉散鬱結。暢脾胃。療痰嗽。製半夏和藥。要熱去皮。要冷留皮。惡黃芩。○按生薑辛入肺。肺得所勝。則氣通宣暢。主宰精靈。故能通神明。神明通則一身之氣皆爲我使。而亦勝矣。一身之氣勝。則中焦之元氣定。而脾胃出納之令行。邪氣不能容矣。故能去穢惡。經云。秋不食薑者。蓋以燥金主令。天道斂收。薑則味辛。善散肺氣。人肖天地以生。未有干天地之和。而猶受其益者。諺所謂夜不食薑。亦以夜氣斂而薑性散爾。如療病則不可泥也。宜常用而不宜多用。

乾姜味辛。性大熱有毒。入肺大腸脾胃腎五經。生者味辛。能行血。逐寒邪而發表。熟者味苦。能止血。除胃冷而守中。沉寒痼冷。腎中無陽。脈氣欲結者。用黑附爲引。○按乾姜之辛。本職肺家。以其性熱。故又入脾胃大腸。至于少陰之入。黑附爲之引耳。夫血遇熱則走。生者行之。固其宜也。而吐衄下血崩漏淋產症。熟者反能止之。何也。蓋物極則反。血去多而陰不復。則陽無所附。得此以助陽之生。而陰復矣。且見火則味苦色黑。守而不走。血安得不止耶。然必病久氣虛。亡陽而多盜汗。及手足冷者宜用。若初病火熾。遽爾投之。是抱薪救火。危亡立至矣。可不謹乎。丹溪曰。乾薑散肺氣。同五味能止咳。治血虛發熱。該與補陰藥同用。入肺中利肺氣。入腎中燥下溼。入氣分引血藥入血也。東垣云。多用能耗元氣。壯火食氣。故也。乾

姜辛熱。皆言補脾。海藏獨言泄脾何也。洩之一字。非洩脾之正氣。是洩脾中寒濕之邪。蓋以辛熱之劑。燥之。故曰洩脾也。生者能墮胎。

萊菔味辛甘。性溫無毒。入肺脾二經。主下氣消食。除痰止咳。解渴化癖。搗汁磨墨。堪止吐血。熟者補脾。其子下氣猶捷。有推牆倒壁之功。水研可吐風痰。醋研可敷惡瘡。俗名蘿蔔。解麪毒。○按萊菔辛宜肺部。甘走脾家。故兩入之。生者下氣多。食耗血。以辛多于甘也。熟者補脾。多食閉氣。以甘多于辛也。其子力倍。虛者戒之。白芥子味辛。性溫無毒。入肺胃二經。主下氣。止翻胃。消瘡癖。辟鬼邪。毆疰氣。除皮裏膜外痰涎。醋研可敷射工毒。其莖葉堪却冷氣。能安五臟。○按白芥子辛宜於肺。溫宜于胃。故俱入之。氣虛及肺胃中有火者。咸禁食之。

韭味辛。性溫無毒。入肺脾腎三經。主下氣和中。補腎益陽。利腰膝。和臟腑。除胸腹疝癖。痼冷。止白濁遺精。其根搗汁。下膈中闕血。殊效。其子較根葉尤勝。忌糖蜜及牛肉。○按丹溪云。韭屬金。而有土與水。宜入肺脾腎。以主三經之症。然不宜多食。令人神昏目暗。

蒜味辛。性大溫。有小毒。入脾胃二經。主溫中消食。止霍亂轉筋。除吐瀉。及中脘冷痛。溫疫瘴癘。蠱毒疔腫。邪痺毒氣。○按蒜味辛溫。故入脾胃。以理諸症。丹溪云。

性熱快膈。人皆喜食。多用則傷脾損肺。壞肝昏目。生痰發嗽。面無顏色。化肉之功不足多也。有志養生者。宜知自警。

胡荽味辛。性溫微毒。入肺脾二經。主通小腹氣。除四肢熱。止頭疼。消穀食。散痧疹。齊痘瘡。其子煎油。可敷禿瘡。忌斜蒿同風。令人汗死。○按胡荽味辛。肺所樂也。性溫脾所快也。故皆入之。肺主皮毛。脾主飢肉。所以理痧痘等症。多食損精神。發痼疾。令人健忘。腿氣狐臭者。食之愈甚。

葱白味辛。性溫無毒。入肺胃肝三經。善發汗。通骨節。逐肝邪。明眼目。去喉痺。愈金瘡。安胎氣。止鼻衄。治霍亂轉筋。理傷寒頭痛。殺魚肉毒。通大小便。散面目浮腫。止心腹急疼。腳氣奔鈍氣。連鬚搗。可除蛇傷。蚯蚓傷。畏蜜菘菜。常山。同食殺人。○按皮毛腠理。肺所司也。風溼木旺。肝所患也。邪傳入裏。胃所疾也。葱白功專發散。又主通中。三經之入。有由來矣。多食則伐氣昏神。虛者戒之。

冬葵子味甘。性寒無毒。入小腸膀胱二經。主滑胎產。利小便。療熱淋。逆生者得之。卽順。胎死者得之。卽下。能通乳汁。堪潰癰疽。○按冬葵子性最滑利。能宣積壅。宜入手足太陽。以爲催生神劑。然不可預服。恐胞未轉。而先催。空涸其水。反難其產。爾癰疽者。營氣不從。逆於肉理。乳閉者。亦凝滯之所致也。以導之而不膠者。鮮

矣。

白冬瓜味甘。性微寒無毒。入脾胃大小腸四經。主胸前煩悶作渴。臍下水脹成淋。通大小便。大解熱毒。可貼癰疽。又解丹石毒及魚毒。○按冬瓜味甘。宜入脾胃。性走而急。宜入大小腸。煩渴諸症。皆熱也。其性寒。故能解之。丹溪曰。久病與陰虛者。忌服。未被霜而食之。令人成反胃病。

■人部

乳汁味甘。性平無毒。入心肝脾三經。主健四肢。營五臟。實腠理。悅皮膚。安神魂。利關節。明眼目。久服延年。○按乳汁。本血也。心主血。肝藏血。脾裹血。宜並入之。夫婦人之血。降爲月水。升爲乳汁。房術云。女子一身屬陰。惟月水屬陽。故名水中金。惜神農本經不載。而諸家本草。遂以爲血屬于陰。其性大冷。不知月水乳汁。本同一物。月水之熱。人咸知也。今升而爲乳汁。輕清中和。補益實爲過之。何反以爲大冷耶。若果大冷。則必能傷脾。小兒食之。當洩利不止矣。有是理哉。特不宜與食混進。誠能令人瀉爾。

金汁味甘苦。性大寒無毒。入心經。天行狂熱。陰虛燥熱。解一切毒。療一切瘡。埋土年久者佳。○按素問曰。濁陰出下竅。宜制陽光。而心則火之主也。故獨入之。造

法于冬月取竹蘿置缸上。繆皮鋪滿。加草紙數層。尿澆于上。汗淋在缸。新甕盛貯。磁缸蓋之。鹽泥封固。埋地年深。自如清泉。聞無穢氣。又法臘月取淡竹刮去青皮。浸廁中。取汁亦佳。

屎蛆味甘鹹。性平無毒。入脾經。主小兒疳積脹滿。須水中漂淨。貯於桶中。剖蝦蟆飼肥。烈日曝蒸。蓋密即死。文火烘燥用。○按蛆本濁陰下降。流動不拘之物。有行下之理。故端入脾經。以療兒疳。

人溺味鹹。性寒無毒。入心肺二經。主勞熱。吐衄痰喘咳嗽。撲傷闕血。產後敗血。生津止渴。能通二便。童男者尤勝。積垢在器。即名人中白。瓦人文火煨之。存性。酒醋兼制。與溺同功。療口瘡痰結。須露天經年者佳。○按人溺降火最速。丹溪曰。氣有餘。便是火。肺主氣。心屬火。宜均入之。降火而不傷于寒涼。且補益之功甚大。而本草不言惜哉。褚澄云。以童便治血症。百不一死。庶得其用矣。

秋石味鹹。性微寒無毒。入肺腎二經。主滋腎水。返本還原。養丹田。歸根復命。安和五臟。潤澤二焦。消咳逆稠痰。退骨蒸勞熱。能除鼓脹。亦軟堅積。明目清心。延年益壽。

按秋石之鹹。本端入腎。而肺即其母也。故併入之。須用陰陽煉者。兼而服之。得

坎離既濟之義。東坡有煉法可用。

月水性味經絡諸書不載。主男子虛羸。中傷幾死。解藥箭毒。首經者猶屬純陽。能回生再造。○按月水之補。實令人有起死之功。今時罕有能用之者。惜哉。

髮味苦。性微溫無毒。入心經。主咳嗽。五淋。二便不通。燒灰吹鼻。立止衄血。亦主小兒驚癇。胎髮及童男女剃下者尤佳。多產婦人髮燒灰酒服。極善催生。○按髮爲血之餘。而心則主血者也。故獨入之。丹溪稱其補陰甚捷。良有故爾。

【雷合云】

凡使須用男子二十已來無疾。應頭紅白于頂心剪下者佳。凡于丸散膏中先用。若參水浸一宿。瀝出。入瓶以火燒之。通赤。放冷。研用。

紫河車味甘。性大溫無毒。入心脾腎三經。主諸虛百損。五勞七傷。骨蒸潮熱。體弱氣短。吐衄來紅。男子精衰。婦人無孕。的是仙丹。取肥壯者洗淨。抽去紫筋。切碎。入童便二碗。入鉛餅重湯煮爛。一晝夜方開。杵成膏用。世俗有埋地日久。化作清泉者。此名河車水。主天行時疫熱狂。小兒疳疹熱毒。○按紫河車味甘。宜其歸脾。父之精也。宜歸腎臟。母之血也。宜入心家。夫其精血所結。未有男女。先立胚胎。渾然大虛。實乾坤之橐籥。鉛汞之根基。九九數足。兒則載而乘之。故名河車。又曰紫者。以紅黑色相雜也。合坎離之色。得妙合之精。雖成後天之形。實稟先天之氣。補益之功。更無足與儔者。第其性溫。若有火症者。必得便制。斯無他患爾。

天靈蓋味鹹性平無毒所入經絡諸書不載主傳屍鬼疰并療火傷取得後用糠灰火罨一夜待腥穢之氣出盡用童便于磁鍋內煮一伏時埋于地下可深一尺亦一伏時取出聽用陽人使陰陰人使陽○按天靈蓋卽頂蓋骨也神農本經不載後世醫家始用之此本同類之物見則當憐而悲之乃取而食之殊非仁人之用心世稱孫思邈有大功于世以殺命治命尙有陰責況于是乎若必不得已而用之當取年深潰朽者良以其絕屍氣也

死人枕味鹹性平無毒所入經絡諸書不載主傳屍鬼疰邪氣石蛭取之煎湯用用畢送還原處○按死人枕卽腦後骨也夫鬼邪乘人非藥石可攻用死人枕者所謂引之以類也石蛔者久蛭也醫療旣窮蛭蟲轉堅藥劑不能療所以需鬼物驅之用畢卽送還原處者一則使邪疰之氣有所依歸一則勿以療人而傷鬼也古有神醫徐嗣伯劉大用者用之輒驗

■禽獸部

黑嘴白鴨味甘性微寒無毒入肺腎二經主大補虛勞最消毒熱利小便除水腫消脹滿利臟腑退瘡腫定驚癇綠頭者亦堪用白目者能殺人忌龜鱉肉○按肺之色屬白腎之色屬黑黑嘴白鴨宜其入此二經肺腎受補誠爲勞疰仙方得

童便煑服功妙不可盡述

烏骨毛雞風甘性微温有小毒入五臟諸經主虛羸折傷癰疽及心腹惡氣亦能安胎過食生火動風○按丹溪曰雞屬土而有金與木火則所稟者惟少水爾今得其毛骨之黑是五行具備故于五臟靡弗入也于卦為巽巽為木故能生火又為風故能動風日華子以為除風溼痲痺于理未合

雄雀味甘鹹性熱無毒入命門經主益氣壯氣其腦主耳聾及凍瘡頭血主點雀盲糞名白丁香主癩癰癩點目內努肉血膜除癥瘕伏梁爛疔癰積塊○按雀之鹹熱宜入命門而補火然相火久熾其水必衰勿宜過服以傷腎臟妊娠尤忌食之腦血及白丁香之功咸性熱所致爾

雀卵味酸性温無毒主下氣男子陰痿不起強之令熱多精有子腦主耳聾頭血主雀盲雄雀尿齒痛通用藥療目痛治癰癩女子帶下濕不利陰疝瘕五月取之良注云兩頭尖者是雄雀尿

【雷公云】

雀尿凡使勿用雀兒糞其雀兒口黃未經淫者糞遺味苦底坐尖在上即日雉兩頭圓者是陸人使雄陽人使雌凡採之先去兩時有卵于生者通用然後於鉢中研如粉煎

甘草湯浸一宿頭上青甘草水盪洗乾任用

伏翼味鹹性微寒有毒不載經絡主逐五淋利水道去翳明目令人喜樂媚好

忘憂。久服延年。尿名夜明砂。破腹中血氣。及寒熱積聚。除驚悸。血堪點眼。形重一
觔。色白如雪者佳。○按伏翼原名蝙蝠。以其晝伏夜飛。因稱伏翼。能伏氣。冬月不
食。故多壽。人服之。宜其有延年之功矣。

【雷公云】

凡使要重一斤者。方採之。每修事先拭去肉上毛。去爪腸。即留翅并肉脚。及鑽然後酒
浸一宿。漉出。取黃精自然汁塗之。灸令乾。方用。每修事重一斤。一個用黃精自然汁五

兩爲度

龍骨味甘。性平無毒。入腎經。主丈夫精滑遺洩。婦人崩中帶下。止腸風下血。療
瀉痢不止。得五色具者佳。其齒主驚癲狂疾。俱畏乾漆。蜀椒。滑石。石膏。○按經曰。
腎主骨。宜龍骨獨入之。觀其沾舌。大抵瀆之用居多。故主精滑等症。經曰。瀆可去
脫。是之謂耶。

虎骨味辛。性微熱無毒。入腎經。主邪氣鬼疰。筋骨毒風。變急。酥炙用。畏乾漆。蜀
椒。磁石。○按虎骨入腎。亦以腎主骨故也。其治骨間毒風者何也。易曰。風從虎。夫
風木也。虎金也。木受金制。焉得不從。

【雷公云】

虎骨凡使須用採入。開其眼。有雄有雌。有老有嫩。有殺得者。佳。有中。毒。自死者。勿使却
傷人之慮。夫用虎骨。先于草羊血中。浸一宿。漉出。微熾火上。焙乾。搗成粉。候家藥出。取

之合用也

犀角味苦酸鹹。性寒無毒。入心肝二經。主百毒。蠱注。鬼魅邪氣。傷寒。瘟疫。煩躁

顛狂痘疹血熱癰疽腫毒清心鎮肝明目定驚孕婦忌服須紋細色烏光明滑潤者佳取其茸尖功力具備松脂為使惡雷丸忌鹽○按犀角苦寒本入心家瀉火又入肝臟者蓋以火不妄炎則金能制木也丹溪曰屬陽性走比諸角猶甚痘瘡後用以散餘毒俗以為常若非有餘毒而血虛者與血燥發熱者用之禍無極矣

【雷公云】

凡使勿用双犀樽病水犀卵于犀下角犀成水犀惟細紋色烏黑而光潤者上凡修治之時控其屑入臼中杵令細再入臼中研萬匝方入藥中用之婦人有胎勿令內服凡

修事切大忌鹽也

羚羊角味苦鹹性寒無毒入肝經主傷寒熱在肌膚温風注伏在骨間邪氣不祥驚夢狂越心神不寧小兒卒熱驚搐產後敗血冲心清心解毒明目益氣燒灰又主食噎不通其角多掛痕深入者為真○按丹溪曰羚羊屬木宜入厥陰木得其平而風火諸症無能乘矣

【雷公云】

凡所用亦有神羊角其神羊角長有二十四節內有天生木胎此角有神出可抵千羊之力也凡修事之時勿令單個不復有驗須要拆原對以繩繫之將鐵錘子錘之旋取用勿令犯風錯未盡處須三重紙裹恐力散也錯得了即單搗搗盡背風頭節過然後入藥中用之若更研萬匝了用之更妙免刮人腸也

牛黃味苦性平無小毒入心經主大人癩狂發瘧中風痰壅不語小兒驚癇天弔客忤口噤除邪逐鬼定魄安魂能墮胎孕須體輕微香麝甲色透置舌上先苦後甘清涼透心者為真人參為使惡龍骨地黃龍胆蜚蠊常山畏牛膝乾漆○按

牛黃味苦宜歸心部癩狂等症何不屬心而有不療者耶。

【雷公云】

凡使有四件第一是生神黃耆得者次有角黃是取之者又有心黃是病死者後識者刺之孽破取心其黃在中心中如濃黃醬汁採得便收于水中黃沾水復便如碎菜藜子許如豆大便如帝珠子次有肝黃其牛身上先眼如血色多玩并好照水白有夜光恐懼人或有人別采之可有神妙之事凡修事先搗細研如塵却絹裏又用黃蠟牛皮裹安于井而止去水三四尺已來

一宿至明方取用之

麝香味辛性溫無毒入十二經主惡氣鬼邪蛇虺蟲毒驚悸癰疽中惡心腹暴痛脹滿目中翳膜淚眇風毒溫瘧癩瘡通關竅殺蟲蝨催生墮胎忌大蒜○按麝香為諸香之最其氣透入骨髓故于經絡無所不入然辛香之氣必能損耗真元用之不啻反引邪入髓莫可救藥誠宜謹之。

【雷公云】

凡使多有偽者不如不用其香有三等一者名遠香是麝子請開滿其麝自于石上用臨尖刺碎落德一里草木不生並焦黃人若取得此香價與珍珠同也二名膝香採得甚堪用三名結香被犬獸驚心破了因此走避諸羣中逐亂投水被人收得劈破見心流在脾上結作一個乾血塊可隔山間草間之香是香中之次也凡使麝香勿近火入磁鉢中細研任用

鹿茸味甘鹹性溫無毒入腎經主益氣滋陰強志補腎理虛羸固齒牙止腰膝酸疼破流血作痛療虛勞如瘰女子崩漏胎動丈夫溺血洩精小兒驚癇散石淋癰腫骨中熱痛癢狀如瑪瑙紅玉長三四寸破之中有朽木者佳連頂骨用長城鹿角主逐鬼邪益神氣續絕傷強筋骨消癰腫愈惡瘡及婦人夢與鬼交麋茸及角功相倣而性更熱端王補陽麋鹿角茸四種俱杜仲為使畏大黃○按鹿茸鹹

溫之品。金腎奚歸。功效雖宏。順脈沉細。相火衰弱者。始為相宜。若有火熱者。用之何異。抱薪救火。其角亦然。麋者更甚。夫麋冬至解角。則屬陽。鹿夏至解角。則屬陰。其性熱。所以其功捷。大凡含血之物。肉易長。角難長。唯二茸不兩月長。大至一十二觔。其堅如石。生長神奇。莫過于此。且諸獸之角。終身不易。惟此種一年一易。蓋其性熱。生生不已。舊者未去。新者隨之。氣化縹密。孰能與京。諸賢感述其功。良有以也。

【雷公云】

凡使先以天靈蓋作末。然後解鹿茸作片子。以好羊時。拌天靈蓋末。塗之於鹿茸上。夏火炙之。令內外黃。乾了。用鹿皮裹之。安室上一宿。其樂。鹿茸也。至明。則以慢火焙之。

令曉方。鶴作未用之。鹿五兩。鹿茸用羊時三兩。炙盡為度。又製法。用黃柏自然汁。浸兩日夜。了。濾出。鹿茸。乾。令細。搗。用免。濕人也。鹿角。使。之。勝。如。鹿角。其。角。要。黃。色。緊。重。夫。好。者。緣。此。鹿。食。靈。草。所。以。異。其。衆。鹿。其。耳。得。角。了。須。金。戴。者。並。長。二。寸。第。解。之。以。物。盛。于。急。水。中。浸。之。一。百。日。滿。出。用。刀。刮。去。粗。皮。一。重。了。以。物。盛。水。冷。淨。然。後。用。礬。石。煮。七。日。旋。旋。添。醋。勿。令。少。乾。成。時。不。用。着。火。只。從。子。時。至。戌。七。日。足。其。角。白。色。款。如。粉。即。細。搗。作。粉。却。以。無。灰。酒。煮。其。膠。陰。乾。了。重。重。研。篩。過。用。凡。修。事。十。兩。以。無。灰。酒。一。盆。煎。乾。為。度。也。○孫。真。人。云。鹿。肉。解。藥。毒。不。可。久。服。蓋。服。解。毒。草。也。○孟。詵。云。主。益。氣。不。可。以。真。誤。其。茸。中。有。小。白。蟲。復。之。不。見。入。人。鼻。必。為。蟲。額。藥。不。及。也。

阿膠味甘鹹。性微溫無毒。入肺肝腎三經。主風淫木旺。肢節痿痺。火盛金衰。喘嗽痰血。補勞傷。療崩帶。滋腎安胎。益氣止痢。明澈如冰。質脆易斷者真。山藥為使。畏大黃。蛤粉炒成珠用。○按阿膠用黑驢皮造成。黑屬水。端入腎。能剋火。蓋以制熱。則生風之義。故宜入肝。且火得制。則金亦無侵。故又宜入肺。夫東阿井係濟水。

所生性急下趨清而且重用之煎煮攪濁澄清所以能清上炎之火及上逆之痰也。

熊膽味苦性寒無毒入膽經主時氣熱感變為黃疸小兒風痰壅塞驚癇疳癪殺蟲散毒可敷惡瘡及痔入水分塵如練不散者真惡防已地黃○按熊膽入膽從其類也清火定驚之功較勝諸膽

【雷公云】

凡收得後煉就器中安每一斤熊胆入生椒十四個處去滓并椒入瓶中收任用之

胆膈膈味鹹性大熱無毒入脾命門二經主助腎添精補中益氣鬼氣尸疰夢與鬼交宿血癥結心腹疼痛置睡犬傍驚狂跳走入水不冰者真酒浸一宿紙裹于文火上炙脆細剉搗用○按胆膈膈鹹熱之品本入命門補火脾家所快者熱也故亦入之助陽之功獨甲諸劑今出登萊州即海狗腎也其狀頭似豕尾似魚止生兩足價值殊貴類多偽者須細辨之

【雷公云】

凡使先須細認其偽者多生瘡中有獸號曰赤烏龍濟人採得然後取腎將入諸處在藥中修合恐有誤其物自殊有一對共有兩重薄皮裹凡氣暢安皮上自有肉黃毛三

莖共一六年上陰濕常如新並將于睡著大塚是置于犬頭其偽者如狂即是真也若須酒浸一日後以紙裹紙火上火令香細剉單搗也

狗肉味鹹酸性熱無毒入命門經主壯元陽補絕傷安五臟益氣力其陰莖最助房事及治婦人帶漏十二痰血主補陰辟邪療顛狗忌蒜○按狗亦鹹熱之品

命門之所由歸也。助火最速。有熱症者。所宜深戒。炙而食之。令人發渴不止。九月食之。傷神。孕婦食之。生子缺唇。且無聲。丹溪曰。人之陰。皆陰虛也。虛則陽必亢。用狗爲補。寧不熾其火。以其其病耶。世人信其補虛。以爲指陽虛也。不知凡虛屬陰。若果陽虛。死亡立至。倉扁復生。無能措手。豈此之能補乎。雖然。丹溪生平主義。只是滋陰。故有此論。而溫補之功。諸家異道。當非虛語。惟命門脈弱。素無火症者。始爲相宜。不然。則未獲其功。先嘗其禍矣。

羊肉味甘。性大熱。無毒。入脾肺二經。主虛勞。寒冷。腦風。大風。補脾益氣。安心定驚。○按羊肉之甘。宜其歸脾。于卦爲兌。實屬西方之金。故亦入肺臟。十劑云。補可去弱。人參羊肉之類是也。夫人參補氣在中。羊肉補形在表。凡補虛者。當分用之。不得概視也。六月食之。傷神。孕婦及水腫骨蒸瘧疾。一切火症。咸宜忌之。

黃牛肉味甘。性平。無毒。入脾經。主安中益氣。健脾養胃。強骨壯筋。其乳補虛弱。養心肺。潤皮膚。解熱毒。止消渴。滑大腸。腦治頭風。膽主風痰。角腮主白帶。及行血。○按色黃。味甘。屬土。于卦爲坤。故入脾家用之。倒倉。誠有再造之功。然此爲稼穡之資。不輕屠殺。其自死。及有病老邁者。不惟無補。反能損人。市中多犯此弊。食者慎之。

猪肉味甘。性温無毒。入脾經。主補脾益氣。然多食能動風痰。四蹄主撻傷下乳。及諸瘡。臍腸主內痔。腎主腰疼。膽能扶胃。肺能止咳。心能定驚。舌能健脾。油可敷瘡。腦治頭眩。腦鳴。膏能潤肺利血脈。解風熱。○按猪肉之甘。自宜入脾。遍身之用。各以類從。丹溪謂其熱能生痰。痰多則氣不升降。故外感者食之而愈劇。患瘡食之者而復成。善頤生者。節食為貴。

■ 蟲魚部

蜂蜜味甘。性平無毒。入脾肺二經。主益氣。補中潤燥。解毒祛邪。定驚。養脾氣。除心煩。通便閉。解虛熱。療心疼。悅顏色。和百藥。除衆病。畏生葱。惡羌花。每觔煉得十二兩半。用蠟主痢。下諸瘡。○按蜂蜜甘宜歸辛。潤宜歸肺。其用最多。良有百花之精。且取人溺以釀之故也。七月勿食生蜜。令人暴下霍亂。

【雷公云】

凡煉蜜一片只得十二兩半或一分。是數若火少火過並不可用之也。

牡蠣味鹹。性微寒無毒。入腎經。主遺洩帶下。喉痺咳嗽。榮衛虛熱。去來不定。必脅下老痰。瘡積宿血。温瘧瘡腫結核。貝母為使。喜甘草。牛膝。遠志。蛇床。惡麻黃。吳茱萸。辛夷。火煨微紅。杵絕細用。○按牡蠣本是鹹水結成。故專歸腎部。軟堅收斂之劑也。

【雷公云】

有石牡石魚鱖真海牡鱖石牡鱖者頭邊皆大小甲砂石真似甘鱖只是圓如龜壳海
牡鱖收得只是文去不得復令人無訛真牡鱖火蝦日炮并用堅試之隨手走起可認
是萬年瑯號曰堅用之妙凡修事先凡二十個約一兩
煮一伏時後入火中燒通赤然後入鉢中研如粉用

珍珠味無效性寒無毒入心經主手足皮膚逆臚鎮心潤顏止渴墜痰點目去

膜塞耳除聾催生下死胎又主小兒驚熱風癩須未經鑽眼者研細篩過再研二

萬下方用○按真珠為水精所孕能能制火且其性鎮重心經之所由入也研之

不細傷人臟腑功未獲奏害已隨之

【雷公云】

須取淨新者以鍋袋盛之然後用地榆五花皮五方草三味各四兩細切了又以牡蠣
約重四五斤以來先置於平底鍋中四物四向安令穩然後置真珠于上丁方下鍋于
三件藥籠中以漿水煮三日夜勿令火歇日滿出之用甘草湯洗之令淨後于日
中搗令細以絹羅重重篩過却更研二萬下了用凡使要不傷發藥透者方可用

石決明味鹹性平無毒入肝經主風熱青盲內障骨蒸勞熱久服益精九孔七

孔者良以麩裏煨磨去其外黑處并粗皮搗細於乳鉢中再研絕細永忌山桃○

按石決明本水族也宜足以生木而制陽光故獨入肝家為眼科要藥命曰決明

者丹溪所謂以能而名也

【雷公云】

凡使只是真珠母也先去上粗皮用鹽并東流水于大磁器中煮一伏時濾出拭乾搗
為末研如粉切入鍋中如此燒之三度待乾再研一萬匝方入藥中用凡修事五兩以
鹽半分取則第二度煮用地榆五花皮阿
膠各十兩服之永不得食山椒令人害目

龜甲味鹹甘性平無毒入心脾肝三經主陰虛不足骨蒸勞熱癥瘕瘡癤五痔

陰蝕四肢重弱。血麻痺風疾。產前後痢疾。驚恚氣。心腹痛。傷寒勞復。肌體寒熱。欲死。小兒顛門不合及頭瘡。女子赤白漏下。及陰癢。逐瘀血。續筋骨。催生益智。自敗者更佳。酥炙用。龜尿主耳聾。久嗽斷瘧。俱畏狗胆。惡沙參蜚蠊。○按龜甲稟壬癸之氣而生。其補陰也。甚捷。心主血。肝藏血。脾裹血。故並入之。骨蒸云云等症。靡非陰虛所致。用此主之。不亦宜哉。欲取其尿者。取龜置磁器中。以鏡照之。既見鏡中影。則淫發而失尿。另有一種夾蛇龜。中心折者。不堪服食。生搗其肉。罾傳蛇毒最良。敗龜版。乃自死之龜。形肉滲爛。甲內性氣具全。故其功力較倍。今本經以卜師鑽灼者為是。恐非灼過者。不過燒炙焦黑而已。與生者何異。又何取義。特加敗字。諄諄以示人耶。

鱉甲味鹹。性平無毒。入肺脾二經。主骨蒸勞嗽。積聚癥瘕。瘰癧肉陰蝕。痔疽瘡腫。瘀血。催生墮胎。婦人五色漏下。九肋者佳。童便浸一宿。濾起酥炙用。其肉益肺補金。大涼血熱。奇形異狀者有大毒。誤食者。以黃耆吳藍煎湯解之。俱惡理石礬。○按丹溪云。鱉甲屬金與土。肺脾之所以入也。須生取之。煑脫者不堪用。肉性大冷。過食傷脾。癥瘕勿食。恐益其疾。孕婦勿食。恐短子項。同雞食成癥。同雞子食。能殺人。同莧菜食。生血鱉。同芥子食。發惡疾。不可不慎。

【雷公云】

泥使綠色九肋多者爲佳治瘰癧消痰定心藥中用之每個當甲以六一助骨了方炙乾然入藥中用又治勞去熱藥中用法依體須用童子小便煎晝夜小便一斗二升爲度後去渣留骨于石上按石臼中搗成粉末以雞肌皮裹之取東流水三兩斗盆盛圓千盆上一宿至明

任用方有萬倍也

蕪州烏蛇味甘性平有小毒入脾肺二經主諸風皮膚不仁散癰癧身體瘙癢熱毒風溼眉鬚脫塞耳治聾須辨眞者佳去頭及皮鱗帶子剉碎酒浸一宿酥炙埋地一宿炙乾用○按烏蛇之用專主去風以理皮肉之症肺主皮毛脾主肌肉故兩入之色黑如漆背有三稜渾如劍脊尾細尖長性善不傷生命都在蘆叢中嗅其花氣亦乘南風而吸雖至枯死兩目不陷儼如生者頭有逆毛二寸一路可長半分已來頭尾相對稱之重二分至一兩爲上粗大者轉重力轉減也

白花蛇味甘鹹性溫有大毒入肺肝二經主肺風鼻塞去癰癧浮風四肢不仁骨節疼痛口眼喎斜半身不遂癩瘋風白癩風髭眉脫落鼻柱塌壞鶴膝風雞嘔風筋骨拘攣凡使須火燒一尺磚令通紅錯沃之使熱氣薰蒸將蛇頭尾各一尺去淨置磚上以盆覆一宿如此三過去骨取肉用亦以眼不陷者爲眞○按白花蛇尚主皮膚之浮風肺主皮毛肝爲風木故都入之然服之者瞑眩一晝夜方醒善螫人中足者輒自斷之補養已痊木接代步不然令人死其毒可知然諸藥不

效者獨能引達成功以其性竄直領藥力至於風處所謂大毒之病必用大毒之藥以攻之是也諸蛇向下惟此蛇鼻向上背有方勝花紋以此得名愚謂凡用之更須日日換酒浸過五宿去酒不用盡去皮骨埋於土坑一宿取出再灸用其毒咸去矣。

【雷公云】

凡使卽云治風爲何治緣蛇管讀卽令引藥至于有風疾處因是號之爲使凡一切蛇上有銼毛二寸一踏可長半寸已來頭尾使之入藥如出得是樣蛇多留其進重三兩三分者不居明處也乾寶記云此蛇不食生命只呼蘆花氣并南風并居蘆枝上最難採不能傷害人也又有重十斤至一鎰者其蛇身烏光頭圓者灸過眼目益光用之中也蛇腹下白腸帶子一查可長一寸已來卽是雄也採得去其頭兼皮絞帶子了二寸許割之以苦酒浸之一宿至明漉出向柳木灰中漚之令乾了却以緊灸之酥盡爲度灸乾後于屋下已地上掘一坑可深一尺已來安蛇于中一宿至明再灸令乾任用凡修事一切蛇并去胆并上皮于乾爛均須酒煮過用之良

蝦蟆味甘性寒無毒入脾經主除邪氣破堅血解結熱療兒疳貼癰腫療火傷凡使去皮及腸脚爪陰乾塗牛酥灸用酥灸主蛀牙惡瘡疔腫凍癩痔漏助陽其肪塗玉則刻之如蠟○按蝦蟆歸脾甘之故也形狀與蟾蜍相似本經未嘗分析自陳藏器極口分殊以爲蝦蟆背有黑點身小能跳接百蟲在陂澤間舉動極急蟾蜍身大嘴黑點多疥磊不能跳不解作聲行動遲緩腹下有丹書八字者然究其功用無甚差別想有牝牡之分而種類之異也

【雷公云】

有多數勿誤用有黑虎有狗黃有黃蟻有蟻有蟻其形各別其蝦皮上腹下有斑點脚短既不鳴則黑皮身小黑帶脚小班點黃斑色前脚大後腿有小尾子一條黃蟻獨

身黃色腹下有疔帶長五七分已來所在六處帶下有熱汗出澀癢即夜鳴聲細口大皮蒼黑色端即黃斑頭有肉角凡使蝦蟇先去皮并腹及爪了陰乾然後塗酥炙令乾每修事一個用牛酥一分炙盡爲度其使黑虎印和頭尾皮爪並陰乾酒浸三日濾出澀乾用之

蝎味甘辛性平有毒入胃經主小兒風癩手足抽掣大人中風口眼喎斜風痰耳聾風毒癰癧出青州緊小者良去鹽土炙黃用○按蝎之主療莫非風症肝爲巽風宜獨入之喜螫人甚者令人死雄者螫人痛在一處取井泥傳之稍溫則易雌者螫人痛牽諸處用瓦屋溝下流傳之或不值天雨可吸新水調用如螫手足竟以冷水浸之微暖即易若餘處不可用水浸者則以冷水浸布貼之小暖則易觀其喜寒若此則爲大熱之劑無疑今諸書不載其性惟日華子稱其平故姑錄之此卽方書所稱蚘螂者是也

五靈脂味甘性溫無毒入心肝二經主心腹冷氣疼痛腸風產後血暈小兒疳疾去目翳辟疫氣解蛇毒酒研飛煉今去砂石爲佳生者行血炒者止血○按五靈脂毒主血症心主血肝藏血故兩入之行氣血最捷勿宜過用以傷臟腑

蜈蚣味辛性溫有毒不載經絡主小兒口噤鬼疰蠱毒諸蛇毒殺精物溫瘧去三蟲心腹寒熱結聚去瘀血墮胎去頭足慢火炙黃用畏蜚蠊蟻蚰大蒜雞屎○按蜈蚣最似百足蟲第百足蟲足較細密死而不僵頭上有白肉面及尖嘴其毒

更甚勿輕宜用。

【雷公云】

凡使勿用百足蟲真似只是頭上有白肉面并鬚尖若誤用此者腥臭氣入頂致死夫使蜈蚣用柳潭木于鐵器中炒木未焦黑後夫木未用竹刀刮去足盡了用

蝟牛味鹹性寒有小毒不載經絡主賊風口眼喎斜驚風筋脈拘攣收大腸脫肛痔痛消渴兒疳火炒過用○按蝟牛之名以頭有角似牛也夏日往往升高涎盡即枯死必用火炒者誠欲去其寒毒爾是即蛞蝓也圖經攷之甚核本草分爲兩種恐非又有一種田螺主眼赤熱瘡醒酒渴點痔瘡類分數種功約和同茲不多贅

白僵蠶味鹹辛性微溫有小毒入心肝脾肺四經主風溫口噤失音疔毒風痰結滯皮膚風動如蟲作小兒驚癇夜啼女子崩中赤白止陰癢去三蟲滅黑點米泔水浸去涎炒去絲用惡疾蒼茯神草解桑螵蛸桔梗雄蠶蛾性熱主固精強陽交接不倦○按丹溪云白僵蠶屬火而有土與金水肝脾肺之所由入也凡使須頭番者力倍蠶蛾亦然

【雷公云】

凡使先須以糯米泔浸一日待蠶委涎出如蝟牛涎浮水面上然後漉出微火焙乾以布淨拭蠶上黃白毛并黑子單搗餘粉用之也

蟬蛻味鹹甘性寒無毒不載經絡主催生下胎衣通乳汁止夜啼定驚瀉逐邪熱殺疳蟲亦能止渴○蟬有五種陳藏器辨之甚悉今以形極大而聲極高一鳴

而無所停斷者。入藥最良。西川有一種蟬花。乃蟬在壳中不出。而化爲花。自頂中生出。功用略同。故不另載。

刺蝟皮味苦甘性平。有小毒。不載經絡。主五痔腸風瀉血。翻胃鼻衄。腹痛積疔。陰腫痛。酒煮用。畏桔梗門冬。○按刺蝟亦有數種。惟蒼白色脚似猪蹄者佳。此外並不宜用。其骨切忌入口。令人消瘦。

土蠶虫味鹹性寒有毒。入心肝脾三經。主留血壅瘀。心腹寒熱。洗洗祛堅積癥。瘕下乳通經。一名廕虫。畏屋遊皂角菖蒲。○按土蠶專主血症。心主血。肝藏血。脾裏血。故三入之。今跌打損傷者。往往主此。或不效。則加間用之。殊不知有瘀血作疼者。誠爲要藥。倘無瘀血。而其傷在筋骨臟腑之間。法當和補。愚者不察。久服弗已。其流禍可勝數耶。

蛻娘味鹹酸性寒有小毒。不載經絡。主小兒驚風癱瘓。大人癩狂淫忤。破血墮胎。通腸治脹。又主疔惡諸瘡。出箭頭入肉。去足翅。火炙勿置水中。令人吐。畏羊肉羊角。○按莊子云。蛻娘之智在于轉丸。宜其有破血通腸之功矣。驚狂皆屬火。亦賴之以洩其亢耳。其性猛驟。最能傷脾。勿得概用。

斑貓味辛鹹性寒有大毒。不載經絡。主寒熱鬼疰。蠱毒。鼠漏疥癬。惡瘡疽。蝕死

肌破石瘰血積。利水道墮胎。凡使去足翅。拌糯米炒。米黃爲度。馬刀爲使。畏巴豆。丹參。空青。惡。曾青。豆花。○按班貓入腹。有開山鑿嶺之勢。最稱猛烈。故輒致腹痛。不可忍。余見里中一壯年。患瘡疾。服班貓數劑。初則大瀉不止。氣悶欲絕。繼則二便來紅。三日而死。自非百藥不效之病。可妄使哉。

穿山甲味甘鹹。性微寒。有毒。不載經絡。主五邪驚悸。婦人鬼魅。悲傷。山嵐瘴癘。惡瘡疥癬。蟻漏痔漏。亦能去風。炙黃用。○按穿山甲形似鯉魚。有四足。能陸能水。山嶺間開鱗甲如死。令蟻入中。閉而入水。開甲蟻浮水面。于是食之。故主蟻漏。其性喜穿山。是以名之。故其用亦主潰癰疽。通血脈。及治吹乳疼痛。

鯽魚味甘。性溫無毒。入脾胃二經。主溫胃健脾。進飲食。補虛羸。療腸癖。水穀不調。腸風血痢。燒灰可傳諸瘡。其子調中。益肝氣。惡猪肉。雉沙糖。○按鯽魚甘溫之品。且是土所化成。其入脾胃宜矣。集要雜錄云。諸魚屬火性。鯽魚屬土。有調胃入腸之功。然多食亦能動火。

鯉魚味甘。性平無毒。入脾肺肝三經。去咳逆氣喘。上氣水腫。脚滿黃疸。煩渴。安胎。妊娠身腫。冷氣。眩癘。氣塊。橫關。伏梁。膽點。眼去翳。滴耳除聾。塗小兒熱腫。血塗小兒丹毒及瘡。脂主小兒癩疾。驚忤。鱗燒灰酒服。破產婦滯血。腸主小兒肌瘡。瘰

癰取蟲骨主陰蝕赤白帶下齒主癰閉石淋皮主癰疹惡瘡忌豬肝天麥門冬○
 接鯉魚之甘本入脾家土能生金金能制木故亦入肺肝二經衍義曰鯉魚至陰
 之物也故其鱗三十六陰極則陽復所以有魚熱中之故叔和曰熱極生風故食
 之多發風熱諸家並不論及惟日華子云鯉魚涼恐無是理萬一風症更使食魚
 則是貽禍無窮矣烟薰者損目天行病後食之再發必死

烏賊骨味鹹性微溫有小毒入腎經主崩漏赤白帶下經閉陰蝕腫痛除目翳
 止泪理金瘡止血治驚氣入腹腹痛環臍陰莖因腹腫瘡多膿汁寒熱癢癩久服
 令人有子惡白藪白芨附子○按烏賊之鹹宜歸水臟治病有殊效今用之者鮮
 夫亦未達其功

【雷公云】

凡使勿用沙魚骨緣真相似只是上文橫不入藥中用凡使要上文橫用鹽齒作水
 浸并煮一伏時了漚出於屋下掘一地穴可盛得前詳烏賊魚骨多少先燒坑了去炭

次了盛藥一宿至期
 取出用之其效倍多

鰻鱺性味甘毒平有微毒不載經絡主虛勞不足陽事衰微傳屍鬼疰蠱毒諸
 蟲婦人陰瘡蟲癢帶下皮膚惡瘡蠶疔痔漏腰背間風寒溼脾諸般草石藥毒脚
 氣癰瘍風白剝風肉燒室內可辟蚊蟲骨置箱中能除衣蠹○按鰻鱺雖有小毒
 而功甚薄或言是蛤蜊之類未可盡信今據稽神錄載主療傳屍甚奇信亦非常

